


O LA TATOU KERISO TUMAU



A'oa'oga Fa'ale-Tusi Pa'ia

O Tu'ufa'atasiga mai le Agaga o Valo'aga

Revelation Publications

Su'esu'ega o le Tusi Pa'ia

O La Tatou Keriso Tumau

(Our Abiding Christ)

Copyright © 2011 by Merlin Beerman and Revelation Publications.

All rights reserved world-wide.

Tulaga mo le Fa'aaogāina

O nei su'esu'ega fa'asolo ua faia ina ia maua ai i se tau e taugofie ma mafai ai ona fa'asoa atu i isi. Fa'amolemole ia va'ai i la matou tuātusi o lo'o i lalo pe a i ai ni fesili pe mana'omia e iloa nisi galuega e fa'atatau i nei matā'upu. O nei mataā'upu e mafai ona kopiina ma fa'aaogā, a e lē tatau ona suia se mea lava e tasi pe fa'atau atu fo'i i se isi. E fautua atu i isi vaega o le ekalesia i atunu'u 'ese'ese ina ia fa'aaogā nei su'esu'ega mo le fa'asalalauina o le tala lelei. E mafai ma e tatau ona tusi mai i lē o lo'o lolomiina nei matā'upu ina ia fa'atagaina le fa'aliliuina po o le fa'aaogāina o su'esu'ega i la outou galuega lautele.

www.RevelationPublications.com

USA 800-952-4457 International 541-747-9346

ROHM@Juno.com

O Fesili ma le Tu'ufa'atasiga e Merlin Beerman

Fa'atonu - V.C. Darmody

Ata - © 2011 e le Revelation Publications

Fa'a-Samoaina - Abbie Leala Lam Yuen Watt

Lomiga o le 2011 i le U.S.A.

ISBN 978-1-934924-06-8

‘UPU MO LE FAITAU TUSI

Ua matou fiafia ona ua e maua le Fa'asologa o Su'esu'ega Fa'ale-Tusi Pa'ia e fa'atatau i *La Tatou Keriso Tumau*. Matou te tatalo o le a e fa'aaogā nei lesona ma ia tosina latalata ai 'oe iā Keriso; o Lē o lo'o ofo mai iā te 'oe ia 'avea ma uō, o le filemū, ma le ola e fa'avavau. O lenei su'esu'ega ua ofo atu o se meaalofoa mo 'oe mai le a'oga o le Tusi Pa'ia. E fa'aaogāina e lau a'oga lenei su'esu'ega i se tasi pe lua ni auala e ui ai. Atonu e i ai pe leai fo'i i tua o lenei su'esu'ega se vaega o lo'o ta'u mai ai tali i fesili. A o i ai e mafai ona e va'ai i ai ma fa'amaonia ai au tali. Pe a uma le fa'asologa o tali, a e mana'o i ai, e mafai ona maua sau pepa fa'amaonia mai le a'oga e sainia e se tasi o faia'oga. Pe a o i ai se tuātusi a e leai se vaega o lo'o maua ai tali o fesili, e mafai ona e meli mai lau su'esu'ega ina ia fa'amaonia ma sainia lau pepa pe a ua mae'a lelei lau matā'upu. O mea uma e te aumaia mo fa'amaoniga o le a toe fa'afo'i atu, fa'apea nisi matā'upu po o ni matā'upu fa'aopoopo e te talosagaina. Pe a i ai ni āu fesili i so'o se taimi, fa'amolemole fa'aailoa mai ma o le a taumafai ia maua vave atu sau tali mai se faia'oga o lenei a'oga. Atonu o 'oe o se Kerisiano i lou olaga atoa, po o le avanoa muamua lenei ua e filifili ai ia a'oa'oina 'oe fa'atatau i le alofa ofoofogia o Iesu; pe o le ā lava le tulaga, o lenei taimi o le a e fa'aalu i le su'esu'eina o le Afioga a le Atua o le a 'avea ma fa'amanuiāga tele. Ia fa'atumulia e le Ali'i 'oe i le filemū a o e sa'ili ia e iloa atili o Ia.

MANATU MO SU'ESU'EGA E FAIA TA'ITO'ATASI

(Suggestions for individual study)

(1) TATALO MO LE O TATTA'IGA

O taimi uma e te su'esu'e ai, ia e tatalo mo le malamalama ma le ta'ita'iga a le Agaga Pa'ia. Ia matala lou mafaufau a o e sauni atu i lau su'esu'ega. Ia tau mamao mai manatu mua'i fa'avae o le a tau fa'atosina 'ese ai lau sa'iliga mo le 'upu moni.

(2) FAITAU LELEI LE FESILI

Ia faitau fa'atelegese fesili ta'itasi ma fa'atele se taimi e fa'aaogā ia manatunatu loloto ai ma ia e malamalama ai. O le a i'u ai i se manuia tele mai lau su'esu'ega.

(3) SA'ILI LE TALI

Fa'aaogā so'o se Tusi Pa'ia e va'ai ai i le fa'asino tusi o lo'o i lalo o le avanoa mo le tali. Faitau le fuai'upu ma fa'asino mau ina ia maua se malamalama a i latou so'otaga. Tusi i lalo se tali manino i le avanoa o i le su'esu'ega. A e mana'o e fa'amaonia lau tali, ia e va'ai i le vaega e i ai tali o lo'o i tua o le su'esu'ega. A mana'o ia malamalama atili, faitau ma fa'atusatusa le fuai'upu mai le fa'asino tusi ma nisi fuai'upu e tau i ai mai fa'aliliuga 'ese'ese o le Tusi Pa'ia. Fa'aaogā se paea'iga o 'upu (concordance), fa'asino matā'upu (references), ma se tusifau'upu (dictionary) ina ia mafai ona va'ai ai i 'upu e lē o malamalama ai ma sa'ili isi mau e tau i ai.

(4) MANATUNATU LOLOTO I FA'AI'UGA

Toe faitau fesili ma tali, ona faitau lea o manatu fa'aopoopo (commentary). Manatunatu loloto i le tāua o mea o lo'o su'esu'eina ma tatalo mo le poto mai le Ali'i ia maua se fesoasoani ia e iloa lona fa'aaogā tatau mo lou olaga.

(5) FA'AAUAU PEA LE SU'ESU'E

O la matou tatalo ia e su'esu'e pea le Afioga a le Atua. Matou te fa'amalosi atu ina ia e feso'ota'i ma le pogai o lenei su'esu'ega ma ia maua nisi matā'upu e tosina ai 'oe ma maua ai se fesoasoani i lou tuputupu a'e fa'aleagaga.

MANATU MO SU'ESU'EGA I SE FA'APOTOPOTOGA

(Suggestions for Group)

(1) FILIFILI SE E TA'ITA'I

E tāua le filifili o se tagata e to'atasi e ta'ita'i i la outou su'esu'ega. E mafai ona filifili se faife'au, se ta'ita'i ekalesia, po o le fa'asoa o lea tiute e ni tagata mai le fa'apotopotoga. O le tiute tau'ave o le ta'ita'i o le fa'aaauu o le talanoāga o taualumaga taulemafaufau ma fa'amalosi tagata uma ia 'auai i le talatalaga.

(2) FUAFUA AUALA E SU'ESU'E AI

Filifili e le fa'apotopotoga pe fa'aaofia ai matā'upu mai fafo i a outou su'esu'ega. O le taimi o le su'esu'ega e aupito manuia pe a fai ma autū tusi fau'upu fa'ale-Tusi Pa'ia.

(3) SU'ESU'E LE LESONA

Fautua i tagata ta'ito'atasi o le 'au su'esu'e ia su'esu'eina le lesona a e le'i o'o i le taimi e fa'atasi ai. O lenei mea o le a maua ai le fa'amanuiāga e aupito sili mo tagata ta'ito'atasi ma e fa'alateleina ai le agava'a i talanoāga o matā'upu.

(4) AMATA I LE TATALO

O taimi uma tou te fa'atasi ai ia vala'aulia le Ali'i e fa'atasi ai i la outou su'esu'ega ma ia 'avea le Agaga Pa'ia ma la outou ta'iala.

(5) FAITAU LELEI FESILI

E tatau ona faitau e le ta'ita'i o le su'esu'ega fesili pe filifili se isi mai le fa'apotopotoga.

(6) FAITAU TALI MA MANATU FA'AOPOOPO

E mafai ona filifili nisi mai le fa'apotopotoga ia tali mai ma aumai manatu fa'aopoopo e tau i ai. Pe a totoe se taimi, fesili i ai mo tali mai fa'aliliuga 'ese'ese ia fa'alatele ai le felafolafoa'iga ma ia malamalama atili ai.

(7) TALANOĀGA

E maua le manuia sili pe afai e lē lauga atu le ta'ita'i i le fa'apotopotoga a e ia ta'ita'i lelei le su'esu'ega. E lelei le fa'amalosia o tagata ta'ito'atasi e tu'u atu se manatu i le mea e mafai. Ia lē faia se tautalaga na o se tagata e to'atasi. E tatau i le ta'ita'i ona fa'alototele tagata uma ia talia manatu ma lagona o isi e ui ina lē tutusa taofi.

(8) MOLIMAU

Ia fa'aavanoa se taimi i le amataga ma le fa'ai'uga o fa'atasiga uma mo ni molimau pu'upu'u. E mafai ona fa'alaua'itele pea ia na o le matā'upu o lo'o su'esu'eina.

FA'ASINO MATĀ'UPU

(Table of Contents)

Fa'atomuaga

Upu mo le Faitau Tusi

Manatu mo Su'esu'ega e Faia Ta'ito'atasi

Manatu mo Su'esu'ega i se Fa'apotopotoga

Lesona

1. O le Fai Fa'ato'aga ma le Vine Moni
2. O le Lālā e Fua Mai
3. Mafuta i le 'Upu e Fa'amamā ai
4. Tumau i le Fa'atuatua
5. O le Pogai o le Mafutaga
6. O le Lalā Mamae
7. Mafuta i le Tatalo
8. O Fua e Fa'amamaluina ai le Atua
9. Tumau i le Usiusita'i
10. Tumau i le Fiafia
11. Tumau i le Alofa
12. O le Faigā Uō e Tumau Pea
13. Filifilia ma Fa'au'uina

O le Fai Fa'ato'aga ma le Vine Moni

Lesona 1

O lenei lesona e fa'avae i luga o le Ioane 15:1.

Ua aga'i atu Iesu ma Ōna so'o i Ketesemane, i lalo o le Mauga o Olive, o se nofoāga e mālōlō ai, e masani ona Ia mafaufau loloto ma tatalo ai. Ua uma ona fa'amanino i Lona 'au so'o Lana galuega i le lalolagi, ma le mafutaga fa'ale-agaga ma Ia e ao ona latou fa'aauau pea. O lenei ua Ia fa'amalamalamaina le a'oa'oga. O lo'o susulu matagofie le masina ma ua aliali mai se vine o lo'o taufului ona fua. Na ia fa'asino i Ōna so'o ma fa'aaogāina e fai ma fa'atusa. DA 674 (FNT 529.1)

(1) I LE TALA FA'ATA'ATUSA A KERISO, O AI NA FA'ASINO I AI LE "VINE MONI"?

O A'u nei o le vine moni, a o Lo'u Tamā o Lē galue vine ia. Ioane 15:1

MAU E TAU I AI: Ioane 15:5; Salamo 80:8; Kenese 49:10, 11; I Tupu 4:25; II Korinito 3:5

"O A'u nei le vine moni" (Ioa. 15:1), na Ia fetalai atu ai. Na te le'i filifilia se pama e lauolaola, se arasi matagofie, po o le aoa e mālōsi, a e na fa'aaogā e Iesu le vine e sosolo ma ona lālā e fa'atusa i ai o Ia. O le pama, o le arasi, ma le aoa o la'au e tū tasi. E lē mana'omia se lagolago. Peita'i o le vine e femiloa'i i la'au e fa'asosolo ai, ma sosolo a'e ai aga'i i luga. E fa'apea Keriso i Lona itū tagata ona fa'alagolago i le mana fa'ale-Atua, ma Ia fetalai, "*Ou te lē mafaia ona fai se mea e tasi, na o A'u*" (Ioa. 5:30). DA 674 / (FNT 529.3)

(2) O AI E FA'ASINO I AI LE "TAGATA E GALUE I LE TOVINE"?

O A'u nei o le vine moni, a o Lo'u Tamā o Lē galue vine ia. Ioane 15:1

MAU E TAU I AI: I Korinito 3:9; Iakopo 5:7; Isaia 61:3; Mataio 20:1

Ua ta'ua e le Ali'i i le lalolagi atoa o Lana tovine. E ui lava ina fāoa e le fili, a e tumau pea na pulca e Ia. Auā o le togiola na saunia e Keriso mo le lalolagi, e aofia ai mea uma o le foafoāga mai le amataga. "Auā ua fa'apea lava ona alofa mai o Le Atua i le lalolagi, ua Ia aumai ai Lona atali'i e to'atasi" (Ioane 3:16). O le meaalofo lava lea e tasi e ala mai ai le tele o fa'amanuiāga mo i tatou i lea aso ma lea aso. O matāua uma o le timu, o 'ave ta'itasi o le malamalama i o tatou loto lē fa'afetai, o laula'au, fugāla'au atoa ai ma fua o la'au e molimau mai i le tele na'uā o le alofa ma le fa'apalepale o le Atua iā i tatou. COL 301 (AFK 121.4)

I vaega maupu'epu'e o Palesitina na totō ai e lo tatou Tamā i le lagi le vine lelei, ma o Ia le galue vine. E to'atele ē na tosina i le matagofie o le Vine, ma latou tala'i Lona tupu'aga fa'ale-lagi. Peita'i o ta'ita'i o Isara'elu ua latou manatu o Ia o le a'ua ua tupu a'e i le nu'u naumati. Na latou ave le la'au ma tu'imomomo ma soli i lalo o o latou vae ele'elea i le agasala. O o latou manatu ia fa'aumatia Ia e fa'avavau. A o le Galue vine fa'ale-lagi e le'i tu'ulafoa'i Lana la'au. Ina ua manatu tagata ua latou fa'aumatia le la'au, na Ia ave le la'au ma totō i le isi itū o le pā. Sa lē toe va'aia le pogati o le la'au. Na fa'alilo mai i tagata lima sauā. Peita'i o lālā o le vine ua sosolo a'e i luga o le pā. E ala i ia lālā ola e mafai ona so'ofa'atasi atu lālā fou o lo'o fa'apipi'i atu i le Vine. Ua 'avea latou ma sui o le Vine. Mai iā i latou ua maua mai ai fua. E i ai se seleselega na tauina e i latou sa ui ane ai. DA 675 (FNT 529.4)

(3) O LE Ā SE ISI SUAFA UA FA’ASUAFAINA AI KERISO I LE TUSI PA’IA O LO’O TA’U MAI AI O IA E “MONI”?

O le malamalama moni lea, na te fa’amalamalamaina tagata uma lava i Lona maliu mai i le lalolagi. Ioane 1:9

MAU E TAU I AI: I Ioane 2:8; Ioane 6:32; Ieremia 10:10

Ina ua fa’aalitino le Atua i Ōna tagata, na fa’aaogāina le malamalama e fa’asino tonu ai Lona fa’atasi mai. A o foafoaina le lalolagi i le amataga na susulu le malamalama mai le pogisā, ma o lea le malamalama, o le ao fa’aniutū i le ao a e o le afi i le pō, na ta’ita’iina ai le ‘autau a Isara’elu. O le pupula mamalu ma le mata’utia na si’omia ai le Ali’i i le Mauga o Sinai, o lea fo’i pupula na tumau i luga o le Nofoa o le alofa sa i le fale apitaga. Ina ua fa’apa’iaina le malumalu e le Tupu o Solomona, sa fa’atumulia ōna itū uma i lea malamalama. Sa fa’apea ona fa’amalamalamaina itū mauga o Petele’ema ina ua ‘auina mai agelu ma le fe’au o le fa’aolataga i le ‘au leoleo mamoe. DA 464 (FNT 364.7-365)

O le Atua o le malamalama. Ina ua fetalai Iesu, “O A’u o le malamalama o le lalolagi,” na Ia fa’ailoa mai ai o Ia e tasi ma le Atua, a e fa’apea fo’i ma Lona so’otaga ma le aigā tagata. O Ia Lē na i ai i le amataga, ma “Na fai atu ia pupula mai le malamalama mai le pōuliuli” (II Kori. 4:6). O le Atua o le malamalama o le lā ma le masina ma fetū. O Ia o le malamalama fa’ale-agaga na susulu fa’avalō’aga i luga o Isara’elu, a e e lē na o le mālō o le ‘au lutaia na tu’uina i ai lenei malamalama. A o fa’asusuluina ‘ave i tulimanu uma o le lalolagi, fa’apea ona pupula le malamalama o le Lā o le Amiotonu i agaga uma. DA 465 (FNT 365.1)

(4) O AI MA O LE Ā LE “UPU MONI”?

Ua fetalai atu Iesu iā te ia. O A’u nei le ala, ma le ‘upu moni, ma le ola; e lē alu atu lava se tasi i le Tamā, pe a lē ui mai iā te A’u. Ioane 14:6

E moni lava Lau afioga talu le amataga; e fa’avavau fo’i Āu fa’amasinoga tonu uma lava. Salamo 119:160

MAU E TAU I AI: Ioane 8:31, 32; 17:17; II Timoteo 2:15; Ioane 15:26; 16:13; Efeso 5:9; I Ioane 5:6

E faia le Afioga a le Atua ma a tatou mea’ai fa’aleagaga. Ua fetalai Keriso, “O A’u o le areto o le ola” (Ioane 6:48)...O le lalolagi o le a fano ona e mana’omia le ‘upu moni e mamā ma e fa’amaoni a’ia’i. O Keriso o le ‘upu moni. o Āna fetalaiga o ‘upu moni, ma e loloto le tāua i lo o le foliga mai luma, ma o le aogā e sili atu i mea e va’aia. O mafaufau e ulufia ma fa’ate’ia e le Agaga Pa’ia o le a iloa le tāua o ia ‘upu. Pe a fa’au’uina o tatou mata i le vaimata pa’ia, o le a mafai ona tatou iloa lelei ma’a tāua o le ‘upu moni, e tusa pe ua tanumia i lalo ma fa’alilo ai. RC 111.2

O le ‘upu moni e lelei, e mamā, e maoa’e. Pe a fafauina le amio, o le a tupu a’e le tagata i lalo o le uiga fa’ale-Atua. O le a maua ai i aso uma i totonu o le loto le ‘upu moni. O le a tatou ‘a’ai loa i afioga a Keriso, e pei ona Ia fetalai mai, o le agaga ma le ola ia. O le taliaina o le ‘upu moni o le a ‘avea ai tatou uma ma fanau a le Atua, o suli o le lagi. O le ‘upu moni e fa’apele i le loto e ‘avea lea o se mana e ola pea. RC 111.3

E mai le Atua le ‘upu moni ma e pa’ia. E sili lona maoa’e ma e aupito malosi i lo se isi mea i le gaosia o le amio ia fa’apei o Keriso. Afai ua fa’apele i le loto, ona sili lea le mana’o i le alofa o Keriso i lo o so’o se tasi lava tagata ola. O le uiga lenei fa’a-Kerisiano, o le alofa lea o le Atua i le agaga. O lenei le ‘upu moni e mamā ma ato’atoa e fa’amautū i totonu o le tagata. Ua fa’ataunu’uina ai nei ‘upu, “‘Ou te avatu fo’i iā te outou le loto fou, ma ‘Ou tu’u i totonu iā te outou le agaga fou” (Esekielu 36:26). O le tagata e ola ma galue i se olaga ona ua ‘a’afia i le ‘upu moni, e fa’aalia mai ai lona uiga fa’atamāli’i.... RC 111.4

E to’atele ē ua fa’apea ua liua a e o le a lē mafai ona tutūmau pe a o’o mai tofotofoga ma fa’aosoosoga....E papa’u lo latou talitonuga fa’aleagaga; e lē tu’uloto ma lē mafaufau i le aogā o le ‘upu moni....E leai se uiga e mamā ma pa’ia; ma o le a ‘avea latou ma tagata vaivai i le ‘autau a le Ali’i, a e pe ana fai na liua moni i latou, atonu e ‘avea ma toa.... RC 111.5

O lo’o tatou ola nei i taimi faigatā. O le mata’u i le Atua, ou te ta’u atu e mana’omia le Afioga Pa’ia e iloa ai le mea moni mo le atina’eina o tatou amio. Pe a pulea le mafaufau ma le loto e le Agaga Pa’ia, pe a ua oti lo’u nei tagata, e mafai loa on atina’e ma fa’alauteleina le ‘upu moni. Pe a gaosia a tatou amio e le ‘upu moni fa’apei ona i ai iā Iesu, o le a iloa mai ai o le ‘upu moni tonu lava lea. E pei ona mafaufau i ai le tagata talitonu, o le a fa’apea ona susulu atili lona malamalama ma fa’ateteleina lona matagofie.... O le a fa’ateleina lona aogā, ma o le a si’itia i luga o tatou naunauta’iga e o’o ai ina taunu’u i le tulaga ua ato’atoa le fa’apa’iaina. - (Review and Herald, Feb. 14, 1899). RC 111.6

(5) E MAFAI FA’APEFEA ONA TATOU FA’AAOGĀ LE ‘UPU MONI’ I O TATOU OLAGA I ASO TA’ITASI MA I’U AI I LE MAFUTA MA KERISO?

Ua outou fa’amamā i o outou loto i le gaua’i i le ‘upu moni e le Agaga, ua i’u i le alofa fa’amaoni i le ‘au uso, o le mea lea ia matuā fealofani ai outou ai le loto naunau. I Peteru 1:22

MAU E TAU I AI: Kalatia 5:16, 25; Roma 8:1, 4; I Ioane 3:18; Efeso 4:15

Pe a ua matuā fa’agaogao’ese ‘oe mai iā te ‘oe lava ia, pe a ua tuli’ese atua pepelo uma o le agaga, o le a fa’atumulua loa le gaogao e le Agaga o Keriso. O le fa’atuatua lea e fa’amamā ai le loto mai mea leaga uma. O le a tausiusi ia i le Agaga, ma o le a ia usita’i i mea a le Agaga. E leai sona manatu mo ia lava, a e o Keriso i mea uma. E na te talia ma le loto maulalo le ‘upu moni o lo’o tatalaina mai, ma e avatu ato ale mamalu i le Ali’i, ma fa’apea atu, “A ua fa’aalia mai ia mea e le Atua iā te i matou e Lona Agaga; auā e su’esu’e ifo le Agaga i mea uma, o mea loloto fo’i a le Atua....A ua maua e i matou e lē o le agaga o lenei lalolagi, a o le agaga mai le Atua, ina ia matou iloa mea ua foa’ifuaina mai e le Atua iā te i matou” (I Korinito 2:10, 12). GW 287.1

(6) E FA’APEFEA ONA ‘A’AFIA O TATOU OLAGA O ASO TA’ITASI I LE MAFUTA IĀ IESU - LE “UPU MONI” MA LE “VINE MONI”?

E iloa fo’i e outou le mea moni, e tu’u sa’oloto fo’i outou e le ‘upu moni. Ioane 8:32

MAU E TAU I AI: Salamo 40:11; 61:7; 51:6; 91:4

O le ala e mafai ai ona tatou mālō i lē o lo’o leaga, o le mea lea na manumālō ai Iesu,- o le mana o le afioga a le Atua. E lē pulea e le Atua o tatou mafaufau pe a tatou lē loto i ai; peita’i, afai tatou te naunau ia iloa ma faia Lona finagalo, ona maua lea e i tatou o Āna folafolaga: “E iloa fo’i e outou le mea moni, e tu’u sa’oloto fo’i outou e le ‘upu moni” (Ioa. 8:32). “Ai se tasi e fia fai Lona finagalo, e iloa e ia le matā’upu” (Ioa. 7:17). E ala i le fa’atuatua i nei folafolaga, o tagata ta’ito’atasi uma atonu o le a mafai ona lavea’iina mai maillei tau fa’asesē ma le pule a le agasala. DA 285 (FNT 185.5)

E sa’oloto tagata ta’ito’atasi uma e filifili po o le ā le mālōsi o le a pulea o ia. E leai se tasi ua matuā pa’ū maulalo, leai nisi e matuā leaga lava, peita’i e mafai ona latou maua le lavea’iga iā Keriso. O lē na i ai le temoni, o le mea sa tataua ona tatalo ai, na ia mafai ona tautala mai e na’o ‘upu a Satani; peita’i ua fa’alogoina le ōlega lē leoa mai le loto. E lē te’ena se tagi mai se agaga o fia ola, e ui ina leai ni ‘upu o fa’aleoina. O i latou o le a loto malilie e ulufale atu i le feagaiga ma le Tupu o le lagi o le a lē tu’uina atu i le pule a Satani, po o vaivaiga o o latou uiga moni. O lo’o vala’auina i latou e le Fa’aola, “Se’i tago o iā i Lo’u mālōsi, ia mā lelei ai ma Ia, e lelei ai fo’i o ia ma A’u” (Isa. 27:5). O agaga o le pogisā o le a tau mo le tagata sa i lalo ifo o la latou pulega, peita’i o agelu a le Atua o le a finau mo lea agaga ma le mana o le manumālō. Ua fetalai mai le Ali’i, “E faoa ea le vete ai lē ua mālōsi? Pe lavea’iina ea le tafeaga a lē ua amiotonu? Ua fetalai mai le Ali’i, ‘E faoa lava le tafeaga a lē ua mālōsi, e lavea’iina fo’i le vete a lē mata’utia; ‘Ou te finau atu fo’i A’u i e ua finau atu iā te ‘oe, ‘Ou te fa’aolaina fo’i au fanau” (Isa. 49:24, 25). DA 258, 259 (FNT 186.1)

(7) O LE Ā LE MEA NA AFIO MAI KERISO - LE VINE MONI - I LENEI LALOLAGI INA IA MAUA E LE AIGĀ TAGATA UMA?

O le gaoui, e leai se tasi mea e sau ai na ona ia gaoui, ma fasi, ma fa’aumatia: ua ‘Ou sau ina ia latou maua le ola, ia maua atili ai lava. Ioane 10:10

MAU E TAU I AI: Ioane 3:16, 17; 6:33; 6:51; Mataio 20:28

E ola meaola uma sa foafoaina e ala i le finagalo ma le mana o le Atua; o le ola latou te maua e ala mai le soifua o le Ālo o le le Atua. E tusa pe tele taleni pe o le tetele o le agava'a, e toe fa'atumulia e le ola mai le Pogai o mea uma. O Ia o le punāvai, o le matāvai, o le ola....O le soifuāga na Ia tu'u'ese i Lona itū tagata, na Ia toe 'ave i luga ma tu'uina i le aigā tagata. O lo'o Ia fetalai mai, "Ua 'Ou sau ina ia latou maua le ola, ia maua atili ai lava" (Ioane 10:10).... SD 237.4

Na tasi Keriso ma le aigā tagata, ina ia 'avea le aigā tagata ia tasi i le Agaga ma le ola ma Ia. E ala i lea so'otaga e usita'i tonu ma le Afioga a le Atua, o le a 'avea Lona soifua e latou te ola ai. Ua fetalai mai o Ia i lē ua salamō, "O A'u nei o le toe tū ma le ola" (Ioane 11:25). SD 237.5

(8) E MAFAI FA'APEFEA ONA FA'AFESO'OTA'I I TATOU IĀ KERISO - LE VINE MONI?

A o i latou uma e na talia o Ia, ma fa'atuatua i Lona suafa, na Ia avatu i ai o lea manuia, ia 'avea i latou ma fanau a le Atua." Ioane 1:12

Mau e tau i ai: Kalatia 3:6, 7; Mataio 10:40; 18:2 - 5

O latou uma o le a mulimuli iā Keriso, e tataua lava ona talitonu iā te Ia; e tataua ona tatala o latou loto ia talia o Ia e pei o se tagata mālō o lo'o latou mafuta. E tataua ona mafuta iā Keriso e pei o le lālā ona so'ofa'atasi lelei i le vine ola. E tūa le so'otaga a le la'au ma le lālā, e fua mai ai fua lelei e tutusa mai lālā uma o lea la'au. E fa'apea ona galue le Ali'i e ala i sui tagata o lo'o so'ofa'atasi atu ma Iesu Keriso. O latou e mafuta i le fa'atuatua iā Keriso o le a, pei o Enoka, e iloa le mafuta mai o le Atua. E to'atele nisi e lagona le lē mautinoa, e manatu e pei latou e mātua oti? - E mafua ona e itiiti le fa'aatuatua

e talitonu ai o Iesu o Lē e tau'aveina a latou agasala. Ona o ē ua solia le tulafono, o lea na afio mai ai Iesu ma 'aveina le itutagata, ina ia tatou maua ai se filemū e mautū e fa'avavau. E i ai la tatou fautua i le lagi, ma so'o se tasi e talia Ia e fai ma āna Fa'aola o le a lē tu'ulafoa'i pei o sē mātua oti e tau'ave le mamafa ma le fetu'u o āna ia lava agasala. SD 287.2

E tataua ona tatou atina'e pea i aso ta'itasi le fa'atuatua, ia mafaufau lelei i Lē o lo'o tau'aveina i tatou i le tulaga o lo'o tatou i ai, o le faitaulaga sili e alofa mutimutivale ma e fa'amaoni; "Auā na tigāina o Ia ina o tofotofoina, o le mea lea ua mafai ai e Ia ona fesoasoani i ē ua tofotofoina" (Eperu 2:18). Ma "Auā e lē ia te i tatou se faitaulaga sili e lē mafaia ona tigā alofa fa'atasi ma i tatou i o tatou vaivai" (Eperu 4:15). O lo'o i ai nei o Ia i le lagi, a e puapuagātia ona o o tatou mafatiāga; o Ia o le Fa'aola o lo'o soifua, o le Puluva o lo'o tula'i e fautua mo i tatou. SD 287.3

E tataua ona fa'amalosia i aso ta'itasi lo tatou fa'atuatua; o le a fa'ateleina le fa'atuatua a o galuea'iina i aso ta'itasi, ma o le a tatou iloa ai o Ia e le'i na ona togiolaina i tatou, a e alofa iā i tatou ma fa'amamā i Lona lava toto i tatou mai i a tatou agasala, ma ua faia i tatou o tupu ma faitaulaga i le Atua ma le Tamā. SD 287.4

E ala mai lenei fa'ata'ita'iga, ua 'ou malamalama lelei nei i le galuega a Keriso i le lalolagi ma le vā feāloā'i a le Atua le Tamā, Iesu Lona Ālo, ma i tatou Lana fanau.

Li'o le Tali: Ioe Lē Mautonu

'Ou te fa'afetaia le alofa o le Atua - le Faifa'ato'aga - i le timu e to'ulu mai ma 'ave o le lā e fa'asusulu mai i luga o i tatou le fanau lē fa'afetai. 'Ou te fa'afetai mo laula'au uma, o fua ma fugāla'au o lo'o molimauina Lona uiga fa'apalepale ma Lona alofa tele na'uā mo a'u.

Li'o le Tali: Ioe Lē Mautonu

'Ou te alofa iā Iesu ma 'ou te iloa o Ia o le "Upu Moni" o lo'o i ai le mana e suia ai lo'u olaga ma le mana e fa'asa'oloto ai a'u. 'Ou te naunau, ma le loto maulalo, ia 'ou maua le 'upu moni o lo'o Ia fa'anaunau e fa'amafola mai i lo'u olaga.

Li'o le Tali: Ioe Lē Mautonu

O la'u fa'anaunauga ia 'ou feso'ota'i ma Keriso - le "Vine Moni" - ma ia usiusita'i i le Agaga; ia leai se manatu e talitonu iā te a'u lava ia.

Li'o le Tali: Ioe Lē Mautonu

E ala i le tu'u atu atoa o lo'u olaga, 'ou te filifili e ulu atu i se feagaiga i le vā ma le Atua o le lagi ina ia leai se mana fa'alelalolagi pe fa'asatani e mafai ona fa'aleagaina, ma ia 'ou u'umau i Lana folafolaga mo le malosi ma le filemū i lo'u olaga.

Li'o le Tali: Ioe Lē Mautonu

<u>MANATU FA'AOPOOPO</u>	<u>TATALO MANA'OMIA</u>	<u>TALI O TATALO</u>

O le Lalā e Fua Mai

Lesona 2

O lenei lesona e fa’avae i luga o le Ioane 15:2.

(1) O AI O LO’O TA’UA O LE “LALĀ” I LENEI TALA FA’AFA’ATUSA NA TU’U MAI E KERISO?

O A’u nei o le vine, o lā outou. O lē tumau iā te A’u, ma A’u iā te ia, o ia lava e fua tele mai; auā e lē mafaia e outou ona fai o se mea e tasi pe a A’u lē i ai. Ioane 15:5

MAU E TAU I AI: Isaia 60:21; 61:3; Fa’ata’oto 11:28; Roma 11:16

E ui o le a ave’esea o Ia mai iā i latou, a e lē suia lo latou so’otaga fa’ale-agaga ma Ia. O le feso’ota’iga o lālā ma le vine, na Ia fetalai ai, e fa’asino i le so’otaga e mana’omia ia fa’atumauiina ma Ia. O le lālā fou e fa’apipi’i i le vine o lo’o ola, o alava ma uaua e tupu ina ua pipi’i i le pogai. O le ola o le vine e ‘avea o le ola o le lālā. E fa’apea fo’i le agaga ua oti i le solitulafono ma le agasala, e maua le ola i le feso’ota’i atu iā Keriso. E ala i le fa’atuatua iā te Ia e ‘avea o lona lava Fa’aola, e amata ai le mafutaga ma Ia. O le tagata agasala e fa’afeso’ota’i atu lona vaivai i le mālōsi o Keriso, o lona gaogao i le tumu o Keriso, o lona ma’ale’ale i le mana e lē mavae o Keriso. Ona i ai lea i le tagata le manatu o Keriso. O le itū tagata o Keriso ua pā’ia i tatou o tagata, ma o le aigā tagata ua pa’i atu i le itū Atua. Ua ‘avea le Agaga Pa’ia ma ‘auāla e tatou te pa’i atu ai i le uiga moni fa’ale-Atua. Ua talia le tagata ona o le Ālo pele o le Atua. DA 675.3 (FNT 530.1)

(2) O LE Ā LE FEAGAIGA E TATAU ONA I AI I LE VĀ O LE “VINE MONI,” O “LĒ E GALUE I LE TOVINE,” MA I TATOU - “O LALĀ” - PE AFAI E TATOU TE TUMAU IĀ TE IA?

Ina ia tasi i latou uma, fa’apei o ‘Oe le Tamā o i totonu iā te A’u, o A’u fo’i o i totonu iā te ‘Oe, ina ia tasi i latou i totonu iā te i Ta’ua; ina ia talitonu le lalolagi ua E ‘auina mai A’u. Ioane 17:21

MAU E TAU I AI: Ioane 17:11, 22, 23; 10:30; Kalatia 2:20

O le feso’ota’iga a Keriso ma Ōna tagata ua fa’aalia e ala mai i lenei tala fa’ata’oto. O i latou uma o ē ua talia Keriso e ala i le fa’atuatua, ua tasi i latou ma Ia. E lē noatia fa’atasi atu le lālā i le vine; e lē o fa’apipi’i atu i ai i se isi faiga e mafai ona fai ai. E feso’ota’i atu lālā i le vine ma ola a’e ai o le la’au ola e tasi. E fafagaina latou mai ā’a o le vine. E fa’apea i latou o ē maua Keriso e ala i le fa’atuatua ona tasi ma Ia i fa’avae ma gaoioiga. E feso’ota’i i latou ma Ia, ma o le olaga latou te ola ai o le soifuāga lea o le Ālo o le Atua, auā o Ia o le ola lava lea. HP 56.3

(3) O LE Ā LE MEA TĀUA E MAFAI AI ONA MAFUTA KERISO I O TATOU LOTO MA O LE FA’AVAE O LO TATOU VĀ FEAGAI MA IA?

Ia nofo mau Keriso i o outou loto i le fa’atuatua, ina ia mauā’a outou. Efeso 3:17

MAU E TAU I AI: Eperu 11:6; Roma 1:17; I Peteru 1:5; Ioane 3:36; Filipi 3:9

Ua tu’u mai e Keriso ala e mafai ai ona tatou feso’ota’i atu pea ma Ia i o tatou olaga atoa; peita’i e lagona le mafuta mai o Keriso pe a i ai le fa’atuatua ola. HP 56.5

Atonu o lo’o e feso’ota’i i le Vine Ola. Atonu o ōu itūtino atoa o lo’o feso’ota’i atu i lea Vine, ma o sua ma mea’ai o lo’o aumai mai le Vine o le a fafagaina ai lālā o lo’o feso’ota’i i le Vine se’ia o’o ina i’u ai i le tasi o ‘oe ma Keriso, fa’apei ona

tasi Ia ma le Tamā. O le a Ia fa’amanuiaina ai loa ‘oe. Peita’i uso e, sa lē iā i tatou se fa’atuatua; ua tatou lē fa’amamaluina le Atua i lea taimi atoa ona o le lē talitonu. *FW 66.5, 67.1*

(4) O LE Ā LA TATOU VAEG A TĀUA I LE ATINA’EINA MA LE TUMAU AI PEA I LE SO’OTAGA MA KERISO?

*E sa’ili mai outou iā te A’u, tou te maua fo’i, pe a outou sa’ili mai iā te A’u ma outou loto atoa. **Jeremia 29:13***

MAU E TAU I AI: Iakopo 4:7, 8; Iosua 22:5; Luka 14:33; Roma 10:3, 4; I Peteru 4:19; Hosea 10:12

E ao lava ona tu’uina atu ato’atoa le loto i le Atua, auā pe a leai, o le a lē mafai lava ona fa’ataunu’uina i totonu ia te i tatou o le liuga ma le fa’afouina e toe maua ai e i tatou Lona fa’atusa. Pe a fuatia i lo tatou uiga fa’aletagata, ua tatou tete’a lava ma le Atua. O lo’o fa’amatalaina mai lo tatou uiga e le Agaga Pa’ia i ‘upu fa’apenei: “O outou fo’i lava o ē na oti i amio leaga ma agasala;” “O lo’o ma’i le ulu uma, o lo’o vaivai le loto uma;” “E afua i le alofivae e o’o lava i le ulu, e leai se mea ua sao.” Ua taofitūina i tatou i mailei a Satani, o i tatou “o ē ua maua e ia, ina ia faia lona lava finagalo.” O le finagalo o le Atua, Na te fia fa’amalōlō ia i tatou, ma fa’asa’olotoina i tatou. A e peita’i e lē mafai ona fa’ataunu’uina o lea finagalo alofa, vaganā ona ua liua ato’atoa i tatou, ma ua fa’afouina lo tatou uiga atoa uma, o lea ua ao ai ona tatou matuā gaua’i atu ia te Ia. *SC 43.2 (LSK 47.2)*

O le taua ua sili i lo taua uma ona faigatā, o le taua lea o lo’o tau ai le tagata ma ia lava. O le gaua’i atu o se tasi, ma tu’uina atu ato’atoa o ia i le finagalo o le Atua, o se tauiviga faigatā lava lea; a e peita’i ua ao lava ona fa’ato’ilaloina le agaga i le Atua, i le fa’ato’ā mafai ona fa’afouina ai e tusa ma le tapula’a o le pa’ia. *SC 43.3 (LSK 47.3)*

Atonu ua fai so’o le paptisoina, peita’i e leai se mana i le papatisoga e mafai ona suia ai le loto o le tagata. E tatau ona feso’ota’i le loto ma le finagalo o Keriso, o le loto ia ō gatasi ma Lona finagalo, e tatau ona ave le mafaufau ia tasi ma Ia, o manatunatuga e tatau ona taofia ia i lalo o Lana pulega. *HP 56.4*

Ia mafaufau loloto tagata uma i le ato’atoa o le avanoa ua tu’u mai, ona fesili lea, Ua fa’amagoto i lalo o le finagalo o Keriso lo’u loto? O lo’o va’aia i lo’u olaga ma la’u amio le ato’atoa ma le tautele o le Vine Ola - Lona lelei na’uā, Lona alofa mutimutivale, Lona fa’apalepale ma le alofa tunoa? *HP 56.6*

(5) O Ā FUA O LE A FUA MAI E I LATOU O Ē O LO’O FESO’OTA’I MA LE VINE MONI?

*Auā o le fua o le Agaga, o le agalelei uma lava lea, ma le amiotonu, ma le fa’amaoni. **Efeso 5:9***

MAU E TAU I AI: Kalatia 5:22, 23; Iakopo 3:17, 18; Roma 6:22

E fa’aalia le ola o le Vine i fua matagofie i ona lālā. “O lē e tumau iā te a’u, ma A’u iā te ia, o ia lava e fua tele mai, auā e lē mafai e outou ona fai se mea e tasi pe a A’u le’i ai” (Ioane 15:5), o le fetalaiga lea a Iesu. Pe a tatou ola i le fa’atuatua i le Ālo o le Atua, o le a va’aia fua o le agaga i o tatou olaga; o le a leai se tasi e lē iloa. *DA 676.4 (FNT 530.4)*

“E vi’ia Lo’u Tamā i lenei mea,” o le fetalaiga lea a Iesu, “pe a outou fua tele mai” (Ioane 15:8). E naunau le Atua ia fa’aalitino iā i tatou Lona pa’ia, agalelei, ma Lona lava uiga fa’apalepale. Peita’i e le’i ta’u atu e le Fa’aola ia galulue le ‘au so’o ina ia fua mai ni fua. Na Ia fetalai atu ina ia tumau iā te Ia. “Afai tou te tumau iā te A’u,” o Lana fetalaiga lea, “a tumau fo’i A’u ‘upu iā te outou, o mea uma lava tou te manana’o i ai, tou te ōle atu ai, ona faia lea mo outou” (Ioane 15:7). E tumau Keriso i ē mulimuli iā te Ia, e ala i Lana afioga. O le so’otaga tāua lava lea e tasi na fa’asino i ai le a’ai i Lona tino, ma inu i Lona toto. O afioga a Keriso, o le agaga ma le ola. O le talia o ia fa’atusa, o le maua lea o le ola o le Vine. Tou te ola “I afioga uma e tulei mai i le si’ufofoga o le Atua” (Mata. 4:4). O le soifua o Keriso iā te outou e fua mai ai fua pei o lo’o i ai iā te Ia. O lē ola iā Keriso, pipi’imau iā Keriso, fa’alagolago iā Keriso, fafagaina i mea’ai mai iā Keriso, o le a fua mai ai fua e pei o Keriso. *DA 677.1 (FNT 531.2)*

(6) E FA’APEFEA ONA FUA MAI NEI FUA I LE OLAGA O LE KERISIANO O LO’O TUMAU PEA?

*Ia tutumu outou i fua o le amiotonu mai ia Iesu Keriso, ina ia vi’ia ai ma fa’ane’ene’eina ai le Atua. **Filipi 1:11***

MAU E TAU I AI: Filipi 1:6; Ioane 14:10; 15:7; Roma 12:2

A o e maua le Agaga o Keriso—o le Agaga o le lē alofa fa’apito ma galue mo isi—o le a e tupu ma fua mai. O fua lelei o le Agaga o le a fa’aailoa i lau amio. O le a fa’ateleina lou fa’atuatua, o le a loloto lou talitonu, o lou alofa o le a ‘ato’atoa. O le a fa’ateleina le atagia o fofoga o Keriso i mea uma e mamā, ta’uleleia, ma matagofie. COL 68 (AFK 21.2)

A o le fua o le Agaga o le alofa, o le ‘oli’oli, o le filemū, o le onosa’i, o le mataalofa, o le agalelei, o le fa’amaoni, o le agamalū, ma le lē gaoiā....” (Kalatia 5:22, 23). O le fua lea e lē mavae, a e maua mai ai isi fua o le seleselega e o’o i le fa’avavau. COL 68.1 (21.3)

“A afu le saito, ona selesele loa lea, auā ua o’o i ōna pō e selesele ai” (Mareko 4:29). O Keriso o lo’o fa’atali ma le naunau mo le fa’aalia o Ia i Lana ekalesia. Pe afai e fa’aalia le ‘ato’atoa o le uiga o Keriso i Ōna tagata, o le a afio mai loa o Ia ina ia ‘aveina i latou mo Ia lava. COL 69.1 (AFK 21.4)

O le avanoa o Kerisiano ta’ito’atasi e lē na ona va’ai atu a e ia fa’ata’alise le afio mai o lo tatou Ali’i o Iesu Keriso. (II Peteru 3:12, margin). Pe a na fai o i latou uma o ē tala’i Lona sua fa e fua mai mo Lona mamalu, se manū e vave ona lūlūina le fatu o le tala lelei i le lalolagi atoa. E vave fo’i ona matua le seleselega tele mulimuli, ma o le a afio mai Keriso e fa’aputuina le saito tāua. COL 69.2 (AFK 21.5)

(7) O LE Ā LE MEA E TUPU I LĀLĀ PE A LĒ FUA MAI?

O lā uma lava o iā te A’u e lē fua, e ‘ave’eseina o ia; a o lā uma e fua, e teuteu e Ia, ina ia fua mai ai atili. Ioane 15:2

MAU E TAU I AI: Mataio 3:10; 15:13; 21:19; 13:40-42

“O Lo’u Tamā o le galue vine ia. O lā uma lava o iā te A’u e lē fua, e ave’eseina e Ia” (Ioa. 15:1b, 2a). E mafai ona foliga mai o lo’o mau le lālā fa’apipi’i i le vine, a e lē o i ai le feso’ota’iga mana’omia. O le a lē tupu ma fua mai. E mafai ona foliga mai o lo’o i ai le so’otaga ma Keriso a e aunoa ma le so’ofa’atasi moni ma Ia i le fa’atuatua. E mafai ona ta’utino le tagata o lo’o ‘auai i tapua’iga ma sauniga, peita’i o le amio ma uiga fa’atino e fa’aalia ai pe o feso’ota’i ma Keriso. Afai e leai se fua, e lē o ni lālā moni. O le vavae ‘ese mai iā Keriso, e aofia ai le matuā pagātia e pei ona fa’atusa i le lālā ua mate. Ua fetalai Keriso, “Afai e lē tumau se tasi iā te A’u, ona lafoa’iina lea o iā i tua pei o le la la’au, ma fa’apopoina, ona fa’apotopotoina ai lea e tagata, ma lafo i le afi, ua susunu ai” (F. 6). DA 676.5 (FNT 530-531)

(8) O LE Ā LE MEA E TUPU I LĀLĀ O LO’O FUA MAI?

O lā uma lava o iā te A’u e lē fua, e ‘ave’eseina o ia; a o lā uma e fua, e teuteu e Ia, ina ia fua mai ai atili. Ioane 15:2

MAU E TAU I AI: Iopu 17:9; Salamo 51:7; Malaki 3:3; Mataio 3:12

“A’o la uma e fua, e teuteu e Ia, ina ia fua mai ai atili” (Ioane 15:2b). Mai le to’asefulu ma le to’alua na mulimuli iā Iesu, e tasi le lālā mamae o le a ave’esea; o le isi vaega o le a teuteuina i le ‘o’ona o puapuagā. Na fa’amanino e Iesu ma le finagalo alofa le galuega a le Galue vine. O le teuteuina e o’o mai ai tigā, peita’i o le Tamā lava o lo’o faia le galuega. E lē galue o Ia ma le so’ona fai po o se finagalo to’atāma’i. E i ai lālā e papa’i i le ele’ele; e tataua ona tā’ese latou mai te’e fa’ale-lalolagi o lo’o fa’apipi’i atu i ai. E ao ona sosolo aga’i i le lagi, ma maua le lagolago mai le Atua. O uluulu tele o lau e tosina ‘esea le ola mai le fua, ia ao ona ‘ave’ese. E tataua ona fa’amamā le gaogaosā ina ia maua le avanoa o ‘ave fa’amalōlō o le Lā o le Amiotonu. O le a teuteuina ma ave’ese mea e afāina ai le tupu a le vine e le galue fanua, ina ia maua ai ni fua ma ia fua mai ai atili. DA 676.6 (FNT 531.1)

(9) O LE Ā LE P’UGA FA’AVAVEGA O LE SELEINA MA LE TEUTEUINA O LĀLĀ?

O a’oa’iga uma fo’i a o i ai, e lē manatu i ai o se mea e oli’oli ai, a o le mea e fa’anoanoa ai; a e mulimuli ane e fua mai ai le fua o le amiotonu e manuia ai ē ua a’oa’oina ai. Eperu 12:11

MAU E TAU I AI: II Korinito 4:17; Isaia 6:7

E fa’atusaina le ‘au so’o e pei o lālā o le vine. E pei ona fa’alagolago lālā i la latou so’otaga ma le la’au mo le ola ma le fua mai, e fa’apea le Kerisiano ona fa’alagolago i le so’ofa’atasa ma Keriso mo le ola fa’aleagaga ma le fuatete mai.

O lē e ta’u mai e iā Keriso e tatau ona fua mai fua e feagai lelei ma lana agava’a. O nei fua o lo’o ta’u mai o “fua o le Agaga” (Kalatia 5:22; Efeso 5:9), pe o “fua o le amiotonu” (Filipi 1:11; Eperu 12:11), o lona uiga o fua ia e amiotonu. O fua nei e fa’aalia mai i le amio ma le olaga. Pe afai o le a leai ni “fua lelei” (Iakopo 3:17) ona mana’omia loa lea ia tipi ‘ese le lālā e lē o fua.

E “fa’amamāina” le amio e ala i tofotofga ma fa’ata’ita’iga o la olaga. O le Tamā, le Faifa’ato’aga fa’alelagi, o Ia e silasila ifo i nei faigā mea. E ui ina peiseā’ī ua mamafa le “a’oa’iga”, a e “ mulimuli ane e fua mai ai le fua o le amiotonu e manuia ai ē ua a’oa’oina ai” (Eperu 12:11).

E lē mafai ona tuputupu a’e pe a lē o i ai se ola. A o i ai pea le ola, e mana’omia fo’i ia atina’e pea ia ola. O le atina’e o le amio o le galuega lava lea e faia o le olaga atoa. *5BC 1042*

Le Tamā pele o i le lagi, ‘ou te naunau ina ia ‘ou maua Keriso e ala i le fa’atuatua ma ia ‘ou tasi ma Ia i ta’iāla ma gaoioiga.

Li’o le Tali: Ioe Lē Mautonu
Fa’amolemole ia e fesoasoani mai e fa’afeso’ota’i atu a’u ma ‘Oe, ma o le a fa’ailoa atu le so’otaga i lenei so’ofa’atasiga.

Li’o le Tali: Ioe Lē Mautonu
O la’u fa’anaunauga ia fa’aalitinoina le ola lelei o le Vine Moni ona o le sasala manogi o lona fua e ala mai iā te a’u.

Li’o le Tali: Ioe Lē Mautonu
Fa’amolemole ia teuteuina a’u ina ia mafai ona fa’amamā a’u mai a’u agasala e tele ma ia ‘ou fua mai pea fua e filemū o le amiotonu e fa’amamaluina ai ‘Oe.

Li’o le Tali: Ioe Lē Mautonu

MANATU FA’AOPOPO

TATALO MANA’OMIA

TALI O TATALO

Mafuta i le ‘Upu e Fa’amamā ai

Lesona 3

E fa’avae lenei lesona i luga o le Ioane 15:3.

(1) E FA’APEFEA ONA AFĀINA I LATOU O Ē FILIFILI E TUMAU PEA I LE AFIGOA A LE ATUA?

Ua uma ona fa’amamāina o outou i le ‘upu na ‘Ou tautala atu ai iā te outou. Ioane 15:3

MAU E TAU I AI: Ioane 17:17; Salamo 119:9, 11; Efeso 5:26; I Peteru 1:22, 23

A fafaguina le fiafia moni i le Tusi Pa’ia, ma amata loa ona iloa e le tagata su’esu’e le lautele o lenei ogāfanua ma ōna ‘olua tāua, o le a ia naunau loa mo so’o se avanoa ia fa’amasani ai ia ma le Afioga a le Atua. O le a lē fa’atua’oia se taimi po’o se nofoāga e su’esu’e ai i Ōna matā’upu, ma o lea masani e pito sili mo le fa’atuputeleina o le fiafia e su’esu’e le Tusi Pa’ia. A fai ma masani le fa’aaogā o avanoa uma e su’esu’e ai ma manatunatu i ‘upu o lo’o faitauina, o le a fa’amalosia ai fo’i le ola fa’aleagaga ona o manatu tāua mai le fale teu’oa o le ‘upu moni. *CT 463.1*

E tumau Keriso i ē mulimuli iā te Ia, e ala i Lana afioga. O le so’otaga tāua lava lea e tasi na fa’asino i ai le a’ai i Lona tino, ma inu i Lona toto. O afioga a Keriso, o le agaga ma le ola. O le talia o ia fa’atusa, o le maua lea o le ola o le Vine. Tou te ola “I afioga uma e tulei mai i le si’ufofoga o le Atua” (Mataio 4:4). O le soifua o Keriso iā te outou e fua mai ai fua pei o lo’o i ai iā te Ia. O lē ola iā Keriso, pipi’imau iā Keriso, fa’alagolago iā Keriso, fafagaina i mea’ai mai iā Keriso, o le a fua mai ai fua e pei o Keriso. *DA 677.1 (FNT 531.2)*

(2) O AI NA AUMAI AI LE AGAVA’A NA TUSIA AI LE AFIGOA A LE ATUA E ALA MAI I MEA FAIGALUEGA FA’ALETAGATA?

O Tusi Paia uma lava e mai le Agaga o le Atua ia, e aogā fo’i ia e a’oa’o ai, e a’oa’i ai, e fa’atonu ai, e fa’apoto ai fo’i i le amiotonu. II Timoteo 3:16

MAU E TAU I AI: II Peteru 1:21; Eperu 1:1; Luka 1:70

O vaega uma o le Tusi Pa’ia ua tu’u mai e ala i le Agaga o le Atua ma e aogā i so’o se mea. Ia faitauina le atoa o Lana Afioga, lona uiga o le Feagaiga Tuai fa’apea le Feagaiga Fou. Pe a tatou su’esu’e i le Feagaiga Tuai, o le a tatou maua vaipuna ola e pupuna malosi a’e mai lau’ele’ele e manatu le to’atele e faitau ma le lē fa’autauta ua na o se toāfa. *CT 462*

Ua tu’u mai e le Tusi Pa’ia le fua o le amio e sili ona ato’atoa. O lenei tusi e pa’ia, na tu’u mai e le Atua ma na tusia e tagata pa’ia, oo se ta’iala e atoa le lelei i so’o se tulaga o le olaga. E tu’u mai ai tiute tāua mo ē talavou fa’apea fo’i ē mātutua. Pe a ‘avea ma ta’iala o le olaga, o le a ta’ita’iina ai aga’i i luga le tagata e ōna a’oa’oga. O le a si’itia i luga le mafaufau, fa’alelei ai le amio, ma aumai ai le fiafia ma le filemū i le loto. *FE 100, 101*

(3) O Ā FA’AMATALAGA E LUA FA’ALE-TUSI PA’IA E FA’ATATAU I LE “AFIGOA” A LE ATUA?

O A’u nei o le leoleo mamoe lelei; ua ‘Ou iloa A’u mamoe, ua iloa fo’i A’u e A’u mamoe;...O le mea lea e alofa mai ai le Tamā ia te A’u, auā ‘Ou te tu’uina atu Lo’u ola, ina ia ‘Ou toe ‘au mai ai. Ioane 10:14, 17

Afai na ta’ua e Ia o atua i latou ē ua i ai le afioga a le Atua, e lē mafai fo’i ona fa’aleaogāina le Tusi. Ioane 10:35

MAU E TAU I AI: Ioane 1:1; 17:14, 17; I Ioane 5:7; Fa’aaliga 19:13; Teuterenome 8:3; Ioane 6:68

Na fetalai Keriso: “Afai tou te lē ‘a’ai i le tino o le Atali’i o le tagata, a lē inu fo’i i Lona toto, ua lē i totonu ia te outou le ola. O lē ‘ai i Lo’u tino ma inu i Lo’u toto, ua ia te ia le ola e fa’avavau; ‘Ou te toe fa’atūina fo’i o ia i le aso gata’aga; auā

o Lo'u tino o le mea e 'ai moni lea, o Lo'u toto fo'i o le mea e inu moni lea. O lē 'ai i Lo'u tino ma inu i Lo'u toto, e tumau o ia iā te A'u, o A'u fo'i iā te ia. E fa'apei ona soifua o le Tamā ua na 'auina mai A'u, o lo'o ola fo'i A'u i le Tamā; e fa'apea fo'i o lē 'ai iā te A'u, e ola lea iā te A'u" (Ioane 6:53-57). E to'afia i latou o lo'o galulue i le 'upu moni ma fa'avae o le talitonuga, o lo'o 'a'ai pea i le tino o Keriso ma feinu i Lona toto? E to'afia o lo'o mafai ona malamalama i lenei mea lilo? Ua fa'amatala mai lava e le Fa'aola lenei mea: "O le agaga lea e tupu ai le ola, e lē aogā le tino i se mea; o 'upu 'Ou te fai atu ia te outou, o le agaga ia, o le ola fo'i ia" (Ioane 6:63). O le Afioga a le Atua e fa'aalitinoi le amio a i latou o ē talitonu i ai. E pau le fa'atuatua ola moni o le fa'atuatua lea e ulufia ma galue fa'atasi ma le 'upu moni, se'ia fai ma itūtino ma le mana o le ola ma gaoioiga o le tagata ola. O Iesu e ta'ua o le Afioga a le Atua. Na Ia talia le tulafono a Lona Tamā, galuea'iina ōna ta'iala i Lona soifuaga, fa'atinoina lona agaga, ma fa'aalia lona mana i le loto. Ua fa'apea mai Ioane: "Ua liu tino tagata le Lokou, sa mau fo'i o Ia ma i tatou, (na matou matamata i Lona mamalu; o le mamalu lava lea o le Ālo e to'atasi o le Tamā,) ua tumu o Ia i le alofa tunoa ma le fa'amaoni" (Ioane 1:14). E tatau i ē mulimuli iā Keriso ona fa'asoa i Āna feuiā'iga. E tatau ona latou teuloto le Afioga a le Atua, ma suia i latou e ala i le mana o Keriso e fa'aātaina ai le uiga fa'a-Atua. E tatau iā i latou ona 'a'ai i le tino ma inu le toto o le Ālo o le Atua, a lē o lea o le a leai se ola iā i latou. O le agaga ma le galuega a Keriso o le a tatau ona 'avea o le agaga ma le galuega a Ōna so'o. 5T 575.2

(4) O AI O LO'O FA'AALIA MAI I LAUPEPA O LE AFIGOA A LE ATUA?

E su'esu'e outou i Tusi, auā ua outou manatu tou te maua ai le ola e fa'avavau; o Tusi fo'i ia o lo'o molimau iā te A'u.
Ioane 5:39

MAU E TAU I AI: Ioane 5:46; Luka 24:27, 44

E leai se mea e sili atu e fafaguina ma fa'amalosia ai le atamai i lo o le su'esu'eina o le Afioga a le Atua. E leai se tasi tusi e malosi atu mo le si'itiaina o manatunatuga, e fa'amalosia itūtino uma, e tusa ma 'upu moni o le Tusi Pa'ia. Pe afai e su'esu'e i le Afioga a le Atua e pei ona tatau ai, manū o le a fa'alauteleina le mafaufau, o le a amio fa'atamāli'i, ma o le a mautū ai fuafuāga o le olaga e lē o va'aia i ōna pō nei. O le a tauia le su'esu'eina o le 'upu moni, ma o le a fa'amatalaina fanua lafulemū mo āna su'esu'ega. CT 460.1

E fa'asusuluina e le Feagaiga Tuai le malamalama i luga o le Feagaiga Fou, ma e fa'apea fo'i ona faia e le Feagaiga Fou i luga o le Feagaiga Tuai. O ia mea uma e fa'aalia ai le mamalu o le Atua iā Keriso. E pei ona fa'atinoina Keriso i le 'au pateriaka, e fa'apei ona fa'asinoia i le sauniga fa'ataulaga, pei ona fa'aātaina i le tulafono, ma e pei ona fa'aalia e ala i perofeta le tamā'aiga o le Feagaiga Tuai. O Keriso i Lona soifuāga, Lona maliu, ma Lona toetū; o Keriso e pei ona fa'atinoina e ala mai le Agaga Pa'ia, o Ia o le 'oa tautele o le Feagaiga Fou. O lo'o tu'uina mai e le Feagaiga Tuai ma le Feagaiga Fou 'upu moni o le a fa'aali mai ai pea uiga e fou ma e loloto i le tagata e sa'ili'ili ma le fa'amaoni. CT 462.3

(5) O Ā NI UIGA MONI MA FA'AMOEMOEGA A LE AFIGOA A LE ATUA?

Auā o lo'o ola le afioga a le Atua, o lo'o matuā galue fo'i, o lo'o sili fo'i lona ma'ai i pelu uma e fa'atau ma'ai itu, o lo'o vaevae fo'i e o'o lava i le vavae'eseina o le loto ma le agaga, o gaugātino fo'i ma a'ano o ivi, o lo'o fa'amasino fo'i i manatu ma filifiliga o le loto. **Eperu 4:12**

O Tusi Pa'ia uma lava e mai le Agaga o le Atua ia, e aogā fo'i ia e a'oa'o ai, e a'oa'i ai, e fa'atonu ai, e fa'apoto ai fo'i i le amiotonu, **II Timoteo 3:16**

MAU E TAU I AI: Fa'ata'oto 30"5; I Tesalonia 2:13; I Timoteo 4:5, 6; Salamo 119:50, 104, 105

O 'upu moni, pe a teuina i le loto ma le mafaufau, ma usita'i i ai i le olaga atoa, o le a liliuina le tagata, suia le amio, ma fa'afilemūina ma si'itia ai i luga le loto....O le Afioga e suia le mimitavale i le loto maulalo, o le lētaupulea i le fa'autauta ma le fa'amaulalo, o le lē usita'i i le usiusita'i. O le a suia āga masani a le tagata o aso ta'itasi ma tu'inaanu fa'aletino. E iloa manatunatuga ma fa'anaunauga o le mafaufau. E to'esea tu'inaanu o le tino a e ta'ita'i le tagata ia malie e fa'apuapuagātiaina mo lona Ali'i. TMK 199.2

E aupito sili le tāua o le Tusi Pa'ia auā o le Afioga lea a le Atua soifua. Na o le pau lea o le tusi o i le lalolagi e mana'omia ia matuā su'esu'e i ai, ona e pau lea o le pogai o le poto ma e fa'avavau. O le Tusi Pa'ia o le tala fa'asolopito e ta'u mai ai

iā i tatou le foafoāga o le lalolagi, ma e tatala mai ai āluga o mea ua mavae. E fa’ailoa mai ai iā i tatou Lē na foafoaina le lagi ma le lalolagi, ma le atulaulau na Ia tu’u mai, ma e fa’asusulu mai se malamalama i mea o lo’o i lumana’i. *CT 421.1*

O le Tusi Pa’ia o se fanua o lo’o nātia ai ‘oa fa’alelagi, ma o le a lilo pea se’ia o’o ina maua ma tu’u a’e i le malamalama, e ala i le su’esu’e malosi ma le fa’amaoni i ai. E matuā tāua ‘oa o lo’o tu’u mai e le Tusi Pa’ia ma e tataua ona avatu i se tulaga e iloa ai le maoa’e o ōna matā’upu. Peita’i o le matagofie ma le silisili ‘ese o nei ‘upu moni e lē iloa ato’atoa e mata fa’aletagata. O mea matagofie o lenei lalolagi e lē mafai ona va’aia se’ia fa’amalamalamaina ina ua oso a’e le lā ma ‘ave’esea ai le pogisā. E fa’apea ma mea tāua o le Afioga a le Atua; e lē mafai ona iloa le matagofie ma le aogā se’iloga ua fa’aalia mai e le Lā o le Amiotonu. *CT 421.2*

(6) O Ā FAIGATĀ E TOLU O LE A MAFAI AI ONA FA’ALĒAOGĀINA LE AFIOGA A LE ATUA I O TATOU OLAGA?

*O le mea na pa’ū i le vao tuitui, o i latou ia ē ua fa’alogo, ua ō atu ai, ona fetina’iina ai lea i mea e popole ai, ma ‘oloa, ma mea fa’afiafia o le olaga nei, ona lē o’o lea ina matua o latou fua. **Luka 8:14***

MAU E TAU I AI: Luka 8:11-15; Mareko 4:19

Na fa’amatala au’ili’ili e Keriso mea e mata’utia mo le agaga. E pei ona tusia e Mareko, na Ia tā’ua ai le loto popole i mea a lenei lalolagi, ma le tau fa’asesē o le ‘oa, ma le tu’inanau i nisi mea. O lo’o ta’ua e Luka fa’apea o mea e popole ai, o ‘oloa, ma mea fa’afiafia o le olaga nei. O mea ia e tineia ai le ‘upu, ma le tuputupu a’e o le fatu fa’aleagaga. Ua gata le maua o le mea e fafaga ai mai iā Keriso, ma ua mate ai le fa’aleagaga mai le loto. *COL 51.1 (AFK 13.1)*

“O mea e popole ai o lenei lalolagi.” E leai se vasega e sa’oloto mai le fa’aosoosoga o le popole i mea o le olaga. Mo ē matitiva, o le galue ma le lē tagolima ma le fefe i le mativa e aumai ai le atuatuvaale ma avega mamafa. I ē mau’oa, e o’o mai le fefe ne’i lē iloa se mea ma le anoanoa’i o mea e popole ai. O le to’atele o ē mulimuli iā Keriso ua galo le a’oa’oga na Ia tu’uina mai e fa’ataua i lau talotalo o le fanua. Ua latou lē talitonu i Lana tausiga faifai pea. E lē mafai ona tau’aveina e Keriso a latou avega, auā latou te lē tu’uina atu ia mea iā te Ia. O lea ua popole ai i mea o le olaga, mea sa tataua ona fa’atosina atu ai latou i le Fa’aola mo le fesoasoani ma le fa’amafanafanaga, a e ua vavae ‘ese ai i latou mai iā te Ia. *COL 51.2 (AFK 13.2)*

“O le pepelo o le ‘oa.” O le alofa i le ‘oa e i ai le malosi fa’atosina, ma e fa’asesēina ai. O le tele o taimi o i latou e i ai le tamao’aiga o le lalolagi e galo o le Atua e aumai ai le malosi e maua ai le ‘oa. Ua latou fa’apea, “O lo’u malosi ma malosi o lo’u lima ua ‘ou maua mai ai lenei oloa” (Teuterenome 8:17). O lo latou tamao’aiga, ua lē fafaguina ai le fa’afetai i le Atua, a ua ta’ita’iina i le fa’ane’ene’eina o ia lava. Ua lē iloa iā te i latou le lagona o lō latou fa’alagolago i le Atua ma lo latou tiute i ō latou uso ā tagata. Ua lē avea le tamao’aiga o se taleni e fa’aaogāina mo le vi’iga o le Atua ma le si’itia i luga o le fanau a tagata, ua latou va’ai i ai o se mea e ‘au’auna ai iā te i latou lava. Ua lē avea o se mea e atina’e ai uiga o le Atua, a o le ‘oa e fa’aaogā fa’apea ua atia’e ai iā te ia uiga o Satani. Ua fetineia’i le fatu o le ‘upu i vao tuitui. *COL 52.2 (AFK 13.5)*

“Ma mea fa’afiafia o le olaga.” E i ai le mea mata’utia i fa’afiafiāga e sa’ili mo le na o le fa’amalieina ai. O amio māsani uma e a’afia ai fiafiāga e fa’avaivaia ai le malosi o le tino, e fa’anefu ai le mafaufau, pe ave’ese ai manatunatuga fa’aleagaga, “o tu’inanau o le tino, o mea ia e tau ma le agaga” (I Peteru 2:11). *COL 53.1 (AFK 13.6-14)*

“Ma le tu’inaunau i nisi mea.” O mea ia e lē o ni agasala iā i latou lava, a e peita’i o se mea ua fa’amuamua mai i lo o le mālō o le Atua. So’o se mea e fa’atosina ‘ese ai le mafaufau mai le Atua, po o se mea e tō’esea ai le loto alofa mai iā Keriso, o le fili lea o le agaga. *COL 53.2 (AFK 14.1)*

(7) O LE Ā LE UMI O LE A TUMAU AI PEA LE AFIOGA A LE ATUA?

*E magumagu le mutia, e to’ulu le fuga; a o le afioga a lo tatou Atua, e tumau lea e fa’avavau. **Isaia 40:8***

MAU E TAU I AI: Isaia 46:10; Mataio 24:35; Mareko 13:31; I Peteru 1:25; Salamo 119:7, 8

Na fetalai Iesu, e fa'apei o ē na fauina nei fale i luga o le papa, e fa'apea lē talia le 'upu na Ia fetalai atu ai ona 'avea lea ma fa'avae o lana amio ma lona olaga. I le tele o seneturi ua mavae, na tusia ai e le perofeta o Isaia e fa'apea,"O le a fioga a lo tatou Atua, e tumau lea e fa'avavau" (Isaia 40:8); e fa'apea ona toe fa'amanatu mai e Peteru nei 'upu ma toe fa'aopoopo i ai, a e ua leva ona mavae le Lauga i luga o le Mauga, "O le a fioga fo'i lea ua folafolaina atu ia te outou na" (I Peteru 1:25). O le mea e tasi e tumau o lo'o iloa e lo tatou lalolagi o le Afioga lea a le Atua. O le fa'avae mautū lea e mautinoa e tumau. Na fetalai Iesu, "E mavae atu le lagi ma le lalolagi, a o A'u 'upu e lē mavae atu lava ia" (Mataio 24:35). *MB 148.1 (MF 64.1)*

"O le a fioga a lo tatou Atua e tumau lea e fa'avavau" (Isaia 40:8). "O galuega a Ōna 'a'ao e moni ia ma le tonu; e fa'amaoni Āna fe'au uma lava. E fa'atumauiina ia mea e fa'avavau fa'avavau lava; ua faia i le fa'amaoni ma le tonu" (Salamo 111:7, 8). E lafotūina so'o se mea e fa'avaeina i luga o le pule a le tagata. Peita'i o le mea e fa'avaeina i luga o le papa o le a fioga lēmasuia a le Atua, e tumau lea e fa'avavau. *GC 288 (FT 243.5)*

(8) O LE Ā LE ALA O LO'O FAUTUA MAI LE TUSI PA'IA IA TATAU ONA SU'ESU'EINA AI ŌNA ITŪLAU?

Auā o lo'o i ai le 'upu ma le 'upu, o le 'upu ma le 'upu; o le vavao ma le vavao, o le vavao ma le vavao; o sina mea itiiti i'inei ma sina mea itiiti i'inā. Isaia 28:10

MAU E TAU I AI: Fa'aaliga 22:18, 19; I Tesalonia 2:13; Kolose 2:8; II Peteru 1:19

Tatou te fa'afetai ona ua iā i tatou 'upu o valo'aga, ia 'aia ai ona fa'asesēina se tasi o i taou. Ua taou iloa le mau manatu sesē ma tala fa'afa'atusa i la tatou lalolagi i lenei vaitaimi, ma o lo'o tatoufia iloa pe o le ā le 'upu moni. O le a tatou taumafai loa e sa'ili ina ia tatou maua lenei malamalamaga mo i tatou lava ia. A e lē mafai pe a na o le faitau o le Tusi Pa'ia, peita'i ia su'esu'e loloto ma fa'atusatusa le Tusi Pa'ia mai ōna vaega 'ese'ese. Ia tatou su'esu'e au'ili'ili le Tusi Pa'ia mo tatou lava ina ia lē ta'ita'i sesē ai i tatou; atonu o le a ta'ita'i sesē le to'atele ona o le tele o itu'aiga talitonuga 'ese'ese o i le lalolagi, a e tasi lava le 'upu moni. Atonu e to'atele o le a ō mai ma ta'u mai iā te 'oe o lo'o iā i latou le 'upummoni, peita'i o lo'o iā te 'oe pea le avanoa e t e sa'ili ai lava e 'oe ia le Tusi Pa'ia. "Inā sa'ili ia i le tulafono ma le mau; afai latou te lē tautala e tusa ma ia 'upu, ua leai lava se malamalama iā te i latou" (Isaia 8:20). E tatau ona tatou iloa lelei le Tusi Pa'ia ina ia tatou malamalama ai i le pogai moni o le fa'amoemoe o lo'o i totonu iā i tatou. *LHU 114:2*

Ua fa'apea mai le aposetolo, "O Tusi Pa'ia uma lava e mai le Agaga o le Atua ia, e aogā fo'i ia e a'oa'o ai, e a'oa'i ai, e fa'atonu ai, e fa'apoto ai fo'i i le amiotonu, ina ia ato'atoa ona lelei ai o le tagata o le Atua, ia saunia lava ia i galuega lelei uma lava" (II Timoteo 3:16, 17). E fa'amatalaina e le Tusi Pa'ia ia lava; o se fuai'upu e tasi o le a avea ma ki e tatatlaina ma fa'amaonia isi fuai'upu, ma o le a fai ma ala e fa'amalamalamaina ai le uiga o 'upu o lo'o lilo i le mafaufau. Pe fa'atusatusa fa'amatalaga 'ese'ese o se matā'upu e tasi, ma su'esu'e i uiga ai itū uma, o le a fa'aailoa ai le uiga moni o le Afioga Pa'ia. "Auā o lo'o i ai le 'upu ma le 'upu, o le 'upu ma le 'upu; o le vavao ma le vavao, o le vavao ma le vavao; o sina mea itiiti i'inei ma sina mea itiiti i'inā" (Isaia 28:10). *FE 187.2*

(9) O LE Ā LE MEA E FA'AMAONIA AI O TATOU O SO'O E TALITONU MA MAFUTA IĀ KERISO?

Ona fetalai atu lea o Iesu iā Iutaia, ē ua talitonu iā te Ia. Afai tou te tumau pea i La'u matā'upu, o O'u so'o moni outou. Ioane 8:31

MAU E TAU I AI: Luka 8:15; Ioane 7:17; Salamo 119:10, 11, 101; Hosea 6:3

E leai se tagata, pe talavou pe ua matua, e mafai ona 'avea ma Kerisiano ua ato'atoa a e na te lē su'esu'e i le Afioga a le Atua. E ala i le sa'ili au'ili'ili ma le fa'aeteete Lana Afioga o le a tatou usita'i ai i le fa'atonuga a Keriso, "E su'esu'e outou i Tusi, auā ua outou manatu tou te maua ai le ola e fa'avavau; o Tusi fo'i ia o lo'o molimau iā te A'u" (Ioane 5:39). O lenei sa'iliga o le a mafai ai ona va'ai le tagata a'oga i le Fa'ata'ita'i fa'a-Atua, auā o i latou ia e molimau iā Keriso. E tatau ona iloilo pea i taimi uma ina ia tonu lelei le fa'ata'ita'iga. Pe a masani lelei loa se tasi i le tala fa'asolopito o le Fa'aola, o le a ia iloa le tulaga lē atoa o lana ia amio; o le a va'ai e 'ese mamao ia ma Keriso ma o le a lē mafai ona 'avea ia ma so'o se'iloga e i ai se suiga tele i lona olaga. E ui i lea, e su'esu'e pea ia ma le naunauta'i ia 'avea o ia ia pei o lana

Fa'aa'oa'o; ia ia maua fofoga, le agaga, o lona Matai pele; e ala i le tepataula'i i ai ona suia ai lea o ia. "Ia va'ava'ai atu iā Iesu o Lē na te ta'ita'iina ma Lē na te fa'a'oto'atoaina le fa'atuatua" (Eperu 12:2). CSW 17.1

E lē lava ona tatou iloa ma fa'aaloalogia 'upu o le Tusi Pa'ia. E tataua ona tatou malamalama lelei i ai, su'esu'e fa'amaoni i ai, ia 'a'ai i le tino ma inu le toto pa'ia o le Ālo o le Atua. O le a fa'aalia e le Kerisiano le maoa'e o lo'o ia faia ai ia mea e ala i le soifua malolōina o lona olaga fa'aleagaga. E tataua ona tatou iloa le fa'aaogāina o Lana Afioga i le atina'eina o tatou lava amio. O le a 'avea i tatou o malumalu pa'ia e mafai ona soifua ma afio ma galue ai le Atua. Ia 'aia lava ne'i tatou taumafai e si'itia i tatou lava i luga a'e o 'aia'una filifilia a le Atua e faia Lana galuega ma fa'amamaluina Lona suafa pa'ia. "O uso tatou uma lava." Ia fa'aaogāina nei afioga mo i tatou uma ta'ito'atasi, fa'atusatusa mau uma mai le Tusi Pa'ia.

Ia 'avea i tatou o fa'amatala'upu ola i aso ta'itasi i luma o uso ma le lalolagi, e fa'amamaluina ai Keriso e ala i le fa'aalia o Lona uiga fa'amaulalo ma Lona loto mauilalo. Ia 'avea Āna a'oa'oga e pei o lau o la'au o le ola mo i tatou. A o tatou 'a'ai i le areto o le ola, o le a fa'aali atu ai se uiga e agatonu lelei. E ala i lo tatou 'au'aumea fa'atasi, ma si'itia a'e isi ia mauiluga i lo o 'oe lava ia, o le a tatou tau 'ave ai i le lalolagi se molimau ola e fa'atatau i le mana o le 'upu moni.

Pe a tu'u atu atoa le tagata i le Atua, e 'ai le areto o le ola ma inu le vai o le fa'aolataga, ole a tuputupu a'e ai ia iā Keriso. O le a aofia i le amio mea e fafaga ma fa'ainu atu e le mafaufau. E ala i le 'Afioga o le ola ua latou maua ma usita'i i ai, o le a fa'asoa ai i le uiga moni fa'a-Atua. O lo latou olaga galue atoa na faia ia pei o Keriso, ma e fa'aeaina ai Keriso a e lē o le tagata. Letter 64, 1900

Ua 'ou malamalama lelei nei o le atoa o le Afioga a le Atua e mai Lona Agaga ma e talia ina ia a'oa'o ai i le 'upu moni, ma ina ia 'ou tupu a'e ai o lo'o tumau iā te Ia.

Li'o le Tali:

Ioe

Lē Mautonu

'Ou te malamalama i le tāua o le "'ai i Lona tino ma inu i Lona toto." O fetalaiga a Keriso o le agaga ia ma le ola; o la'u fa'anaunaga ia maua ia mea ina ia 'ou maua ai le ola ma le Vine.

Li'o le Tali:

Ioe

Lē Mautonu

'Ou te iloa o mea a leni lalolagi, o taufa'asesē a 'olua, ma le mimitavale o le olaga, o mailei ia a Satani o lo'o tu'u i o tatou ala ia tatou pa'u'ū 'ese ai mai lo tatou vā tumau lelei ma Keriso.

Li'o le Tali:

Ioe

Lē Mautonu

'Ou te taumafai pea e su'esu'e i aso ta'itasi mai le afioga a le Atua, e tu'u se 'upu ma se 'upu, ma se fa'atonuga i luga o se fa'atonuga ina ia 'ou tumau ai iā te Ia a e 'alo 'ese mai mailei a Satani.

Li'o le Tali:

Ioe

Lē Mautonu

MANATU FA'APOPOO

TATALO MANA'OMIA

TALI O TATALO

Tumau i le Fa'atuatua

Lesona 4

O lenei lesona e fa'avae i luga o le Ioane 5:4.

(1) O LE Ā LE MEA E TATAU ONA FAIA E LE “LĀLĀ” O LE A MAFAI AI ONA FUA MAI O NI FUA?

Inā tumau ia o outou iā te A'u, o A'u fo'i iā te outou. Fa'apei o le lā e lē mafai ona fua pe a na o ia, pe afai e lē mau i le vine; a fa'apea fo'i outou, pe afai tou te lē tumau iā te A'u. Ioane 15:4

MAU E TAU I AI: II Ioane 9; Ioane 6:56-58; Isaia 26:3

O le tumau pea i se so'otaga ola ma Keriso e matuā mana'omia lea mo le tuputupu a'e ma le fua lelei mai. E lē lava le na o na amana'ia o mea fa'aleagaga i nai taimi pu'upu'u. E lē fa'amalosia le tulaga fa'aleagaga pe a si'ifa'amaua nei le ma'elegā i mea taulelotu, a e fa'apa'ū i lalo le tāua se'i o'o ina lē amana'ia i le aso e soso'o ai. O le uiga o le mafuta ma Keriso o le tatau lea ona feso'ota'i le agaga ma Iesu Keriso i aso ta'itasi ma e tatau ona ola pei ona soifua o Ia (Kalatia 2:20). E lē mafai ona ola fa'alagolago se lālā i isi lālā vaganā e i ai se feso'ota'iga o ia ma le vine. E tatau i vaega ta'itasi ona fua mai ōna ia lava fua. 5 BC 1042

E tu'uina atu e le a'a le mea'ai i le lālā ma o'o ai i se vaega e aupito i mamao o le lālā. E fa'apea ona fa'afeso'ota'i e Keriso le mālōsi fa'ale-agaga i tagata talitonu ta'ito'atasi. Afai lava e so'ofa'atasi le agaga o le tagata ma Keriso, e leai se mea e popole ai ne'i mamae pe mate. DA 676.3 (FNT 530.3)

(2) AISEĀ LE MEA E FOLIGA MAI AI O NISI TAIMI E MATUĀ FAIGATĀ LAVA ONA MAFUTA MA KERISO?

Auā o le tino ua tu'inanau lea e tete'e atu i le Agaga, ua tu'inanau fo'i le Agaga e tete'e atu i le tino; ua fete'ena'i fo'i ia mea, o le mea lea tou te lē fai ai mea tou te loto i ai. Kalatia 5:17

MAU E TAU I AI: Mataio 26:31; Roma 7:18-25; 8:7

O le tagata lava ia, e ala i āna galuega, ona tu'u 'ese Keriso mai iā te ia, e ala i lona tete'eina o Lona Agaga ma mulimuli i Lana fa'aa'oa'o, pe na te ulufale i se so'otaga ma Keriso, e ala i le tu'u'ese o lona uiga fa'apito, ia fa'atuatua, ma ia usiusita'i. E tatau ona filifili e le tagata lava ia Keriso, ona ua Ia muamua filifili i tatou. O lenei feso'ota'iga ma Keriso e tatau ona gaosia e i latou o ē tete'e iā te Ia i lo latou uiga moni, o se vā e matuā fa'alagolago ma e ulu i ai ma se loto e mimitavale. O le to'atele e fai mai latou te mulimuli iā Iesu a e latou te le'i iloa lenei tulaga. E ta'u mai e latou te talia le Fa'aola, peita'i e lē o Ia le pule aoao i o latou loto. FLB 135.2

E tatau i Kerisiano ta'ito'atasi ona tū fa'aleoleo i taimi uma, leoleo ala uma o le agaga o lo'o taumafai Satani e ulufale mai ai. E tatau iā te ia ona tatalo mo le fesoasoani fa'alelagi ma ia matuā taumafai lava e tete'e le tau fia faia o le agasala. E ala i le loto tele, o le fa'atuatua, ma le ma'elegā i galuega, o le a mafai ai e ia ona manumalō. Peita'i ia manatua e ia o le manumalō e maua ona o le mafuta mai o Keriso ma ia, ma ia iā Keriso. E na o le so'otaga o 'oe ma Keriso, o le feso'ota'iga ma Ia i aso ta'itasi, itulā uma, o le a mafai ai loa ona fua mai fua o le Agaga PA'ia. FLB 135.5

(3) O Ā TULAGA E LUA E TATAU ONA TATOU AUSIA INA IA MAUA AI LE MALŌLŌGA O LO'O ŌFO MAI PE A MAFUTA MA KERISO?

Ia outou amoina La'u amo, ma ia outou fa'aa'oa'o ia te A'u, auā o A'u Lē agamalū ma le loto maulalo; ona maua lea e outou o le malōlōga mo outou agaga. Mataio 11:29

MAU E TAU I AI: Mareko 10:21; Kolose 2:6; I Ioane 2:6

E tatau ona tatou tau'ave le amo a Keriso ina ia mafai ai ona ato'atoa la tatou so'otaga ma Ia. Ua fetalai o Ia, "Ia outou amoina La'u amo" (Mataio 11:29). Ia outou usita'i i A'u fautuāga. Peita'i o nei mea e mana'omia tou te faia atonu e tete'e i le manatu ma mana'oga a le sui fa'aletagata. A e o le ā loa le mea e tatau ona fai? Fa'alogi i le fetalaiaga mai le Atua: "Ai sē fia mulimuli mai iā te A'u, 'aue ne'i usiusita'i o ia iā te ia, a ia 'ave e ia lona satauro, i le mulimuli mai ai iā te A'u" (Mareko 8:34). O le amo ma le satauro o ni fa'ailoga e fa'asino i le mea e tasi - o le tu'u atu o le loto i le Atua. O le tau'ave o le amo o le so'ofa'atasi atu lea o le tagata ola pu'upu'u i se mafutaga ma le Ālo pele o le Atua. O le amoina o le satauro e 'ave 'ese ai le uiga fa'apito o le tagata mai le agaga, a e tu'u le tagata i le tulaga e na te iloa ai tau'ave avega a Keriso. E lē mafai ona tatou mulimuli iā Keriso a e lē amoina Lana amo, lē si'i i luga le satauro ma tau'aveina mo Ia. Afai e lē ō gatasi o tatou mafaufau ma mana'oga fa'ale-Atua, e tatau ona tete'e o tatou lava tu'inaanu ma tu'u'ese o tatou naunauta'iga, a e tū i tulagavae o Keriso.... E fafauina e tagata a latou lava amoga e foliga mai e māmā ma e faigofie, peita'i e mulimuli ane latou te fa'amaonia e mamafa ma e faigatā. E silasila mai Keriso i lea tullaga ma fa'apea mai, "Ia outou amoina La'u amo, ma ia outou fa'aa'oa'o ia te A'u, auā o A'u Lē agamalū ma le loto maulalo; ona maua lea e outou o le malōlōga mo outou agaga. Auā e 'avegofie La'u amo, o La'u 'avega fo'i e māmā ia" (Mataio 11:29, 30). E lē faia e le Ali'i se fa'atautu sesū e uiga i Ōna tofi. E Na te futatia tagata o lo'o Ia galuea'iina. Pe a latou gaua'i atu i Lana amo, pe a fa'agata le tauiviga e lē o maua ai se manuia mo i latou lava ma mea mo le Atua, o le a latou maua loa le filemū ma le malōlōga. Pe a latou iloa o latou vaivaiga, o latou lava uiga lē ato'atoa, o la a latou fiafia loa e fai le finagalo o le Atua. O le a latou gaua'i atu i le amo a Keriso. O le a mafai loa ona galue le Atua iā i latou ia faia Lona finagalo e tusa ma Lana pule (Efeso 1:9), o le tele o taimi e lē talafeagai ma fuafuāga o le mafaufau fa'aletagata. Pe a fa'au'uina i tatou fa'alelagi, o le a tatou maua loa le lesone o le loto maulalo ma le agamalū, e aumaia ai le malōlga i le agaga. *RH Oct 23, 1900*

(4) O LE Ā LE MEA FA'AVAE I LE MAFUTAGA MA KERISO?

Auā ua fa'aalia mai ai le amiotonu a le Atua i le fa'atuatua, ina ia fa'atuatua ai, pei ona tusia, 'E ola le tagata amiotonu i le fa'atuatua.' Roma 1:17

MAU E TAU I AI: Eperu 10:38; 12:1, 2; Kalatia 3:11; Kolose 2:6

E te fesili ea, "Pe fa'apefea ona 'ou tumau iā Keriso?" E te tumau iā te Ia i lea lava ala e tasi e pei ona e mua'i taliaina o Ia. "O lenei, fa'apei ona outou talia o le Ali'i o Keriso Iesu, ia savavali ai outou o iā te ia." "E ola lē amiotonu i le fa'atuatua." Ua e tu'uina atu ato'atoa 'oe mo le Atua, e 'au'auna ma usiusita'i iā te Ia, ma ua e taliaina fo'i Keriso ina ia 'avea o Ia mōu Fa'aola. Ua lē mafaia e oe iā te oe lava ona saunia o se togiola mo āu agasala, pe liua lou loto; a e peita'i ua e tu'uina atu 'oe i le Atua ma lou fa'atuatua, ua faia e Ia nei mea uma mo 'oe ona o Keriso. O le fa'atuatua na mua'i 'avea ai oe o la Keriso, i le o le fa'atuatua fo'i o le a e tupu a'e ai iā te Ia—i lou tu'uina atu ma lou taliaina mai. Ia e tu'uina atu mea uma—o lou loto, o lou fa'amoemoe, ma lou malosī—ia e matuā tu'uina atu 'oe iā te Ia ina ia e usiusita'i i Āna fa'atonuga uma. A e lē gata i lea, auā ua tatau fo'i ona e taliaina mai mea uma—o Keriso lea, ma le ato'atoa o Lana fa'amanuiāga, ia afio mau o Ia i lou loto, ia fai o Ia mōu malosī, ma āu amiotonu, ma ōu fesoasoani. Na te foa'iina atu iā te 'oe le malosī e te usiusita'i ai. *SC 69.2 (LSK 76.2)*

E fa'atinoina e lē aunoa e le Ali'i Lona alofa tunoa ma Lona mana, ma ia tatau ai ona tatou iloa e sili le tele o manuia e maua pe a tu'uloto le fa'atuatua, ia talatalanoa i le fa'atuatua, ma fa'agaoioi le fa'atuatua. Ia lē fa'avaivaiina o tatou loto ma lima ona ua fa'atagaina fautuāga mai mafaufau e tumu i le masalosalo o le a totō ai i o tatou loto fatu o le lē mautonu ma le lē talitonu (Eperu 3:12). *Letter 97, 1898*

(5) O LE Ā LE FA'ATUATUA?

A o le fa'atuatua, o le fa'alagolago lea i mea ua fa'amoemoe i ai, o le mautinoa lea o mea e lē o va'aia. Eperu 11:1

MAU E TAU I AI: Salamo 64:10; 27:13; 34:8; 36:7; Mataio 8:13; 17:20

Ua fetalai Iesu, “Ona fetalai atu ai lea o Iesu i le ta'ita'i o le to'aselau, Inā alu ia, e pei ona e fa'atuatua, ia fa'apea lava ona faia mo 'oe” (Mataio 8:13). E mafaia mea uma e le Atua, ma e ala i le fa'atuatua e mafai ona tatou 'u'umau i Lona mana. Peita'i e lē o se mea e va'aia le fa'atuatua; e lē o se lagona; o le fa'atuatua e lē o se mea e fa'amaonia se tino. “O le fa'atuatua, o le fa'alagolago lea i mea ua fa'amoemoe i ai, o le mautinoa lea o mea e lē o va'aia” (Eperu 11:1). O le tumau i le fa'atuatua o le tu'u'ese lea o lagona ma fa'anaunaga fa'apito mo le tagata lava ia, o le savali ma le loto maulalo ma le Ali'i, o le tapa i Āna folafolaga, ma fa'aaogā i taimi uma e tatau ai, ia talitonu o le a galuea'iina e le Atua Āna fuafuāga ma mea e tatau i o tatou loto ma olaga e ala i le fa'apa'iaina o tatou amio; o le fa'alagolago atoa, talitonu e aunoa ma se fa'alētonu, i luga o le fa'amaoni o le Atua. Pe a mulimuli i lenei ala o le a iloa mai e isi fua fa'apitoa o le Agaga o lo'o fa'atinoina i le olaga ma le amio. FE 341.3

(6) AISEĀ E MANA'OMIA AI LE FA'ATUATUA I LE MAFUTAGA MA KERISO?

Ua tatou iloa e lē ta'uamiotonuina se tagata i galuega o le tulafono, a o le fa'atuatua iā Iesu Keriso; o i tatou fo'i ua tatou fa'atuatua iā Keriso Iesu, ina ia ta'uamiotonuina i tatou i le fa'atuatua iā Keriso, a e lē o galuega o le tulafono; auā e lē ta'uamiotonuina se tagata e tasi i galuega o le tulafono. Kalatia 2:16

MAU E TAU I AI: Efeso 2:8; I Ioane 5:4; I Peteru 1:3-5

Pe a leai le alofa tunoa o Keriso, o le a i ai loa le tagata agasala i se tulaga e leai se fa'amoemoe; o le a leai se mea e mafai ona faia mo ia; peita'i e ala i le alofa tunoa o le Atua, o le a tu'uina i le tagata le malosi fa'alelagi, ma o le a galue ai i le mafaufau ma le loto ma le amio. E ala i le alofa tunoa o Keriso, o le a iloa atu ai le leaga o le agasala ma mafai ai ona tuli'ese mai le malumalu o le agaga. E aumai i tatou ia feso'ota'i ma Keriso e ala i le alofa tunoa, ia ō gatasi ma Ia i le galuega o le fa'aolataga. O le fa'atuatua o le tulaga lea ua silafia e le Atua o le a mafai ai ona folafolaina le fa'amagaloga mo tagata agasala; e lē ona o mea e mafai e le fa'atuatua ona tu'u mai ai le fa'aolataga, a e ona o le fa'atuatua e mafai ai ona maua le lelei o Keriso, o le togafiti mo agasala. E mafai e le fa'atuatua ona tu'u mai le usita'i ato'atoa o Keriso a e lē o le solitulafono ma le leaga o le tagata agasala. Pe a talitonu le tagata o Keriso o lana lava lea Fa'aola, o le a fa'amagaloina loa e le Atua ana agasala e fa'atatau Āna folafolaga, ma o le a fa'asa'olotoina ai o ia. E iloa e le agaga ua salamō o ia ua fa'amagaloina ona o Keriso, o Ia o lona sui mautinoa, na maliu mo ia, o Ia o lana fa'aleleiga ma le amiotonu. 1 SM 366, 367

(7) A O AGA'I INA LOLOTO LO TATOU FA'ATUATUA MA LE FA'ALAGOLAGO IĀ KERISO, O LE A FA'APEFEA LA TATOU LAGONA I ASO TA'ITASI?

E te leoleoina ia fīfilemū lava lē ua mausalī lona loto; auā ua ia fa'atuatua iā te 'Oe. Isaia 26:3

MAU E TAU I AI: Ioane 14:27; 16:33; Filipi 4:6, 7; Isaia 57:19-21; Salamo 85:8

O le olaga ua iā Keriso, o le olaga to'a filemū lea. Atonu e lē o lagona se fiafiāga ua sili atu ona tele, a e peita'i o le a to'a filemū pea le loto talu ai ona ua fa'alagolago iā Iesu ma ua fa'atuatua iā te Ia. Ua e lē o toe fa'amoemoe iā te oe lava, a e peita'i o Keriso. Ua fa'afeso'ota'iina lou vaivai i Lona malosi, o lou valea i Lona poto, o lou uiga vaivai ma le fetō'ai i Lona malosi tumau. O lea, 'aua ne'i e toe va'ai ai iā te oe lava, 'aua fo'i ne'i fa'apito iā te oe lava mafaufauga o lou loto, a e ia e va'ava'ai atu pea iā Keriso. Ia e mafaufau atu i Lona alofa, ma Lona matagofie, ma le ato'atoa ona lelei o Lona uiga ma Lana amio. O Keriso i Lona fa'afiti iā te Ia lava, o Keriso i Lona fa'amaulaloina, o Keriso i Lona mamā ma Lona pa'ia, o Keriso i Lona alofa lē mafa'atusaina—o mata'upu tāua lava ia ia fa'a'atūina ai mafaufauga o le agaga. O lou alofa atu iā te Ia, ma lou fa'aa'oa'o iā te Ia, ma lou fa'alagolago ato'atoa iā te Ia, o le a liua ai 'oe ia foliga iā te Ia. SC 70.2 (LSK 77.2-78)

Ua fetalai mai Iesu, “Inā tumau ia o outou iā te A’u.” Ua momoli mai e lea fetalai iā te i tatou le malōlōga, le lē mafa’agae’etia, ma le fa’atuatua malosi. Ua toe valaau mai foi o Ia iā te i tatou, “Ia outou o mai iā te A’u ... o A’u fo’i e malōlō ai outou” (Mataio 11:28). O ‘upu mai le faipese e fa’asino lava lea i le manatu e tasi: “Ia e fa’alologo i luma o Ieova, ma fa’amoemoe iā te Ia” (Salamo 37:7). A e molimau mai Isaia, “O le filemū ma le fa’atuatua, o lo outou malosi lea” (Isaia 30:15). O lenei malōlōga, e lē o lona uiga le fa’afilemū; auā o le fetalai a le Ali’i Fa’aola ua soso’o fa’atasi ai le folafolaga i le malōlōga ma le vala’au mo le galuega: “Ia outou amoina La’u amo . . . ona maua lea e outou o le malōlōga mo outou agaga” (Mataio 11:29). O lē ua ato’atoa ona malōlō atu iā Keriso, o ia fo’i lea o le a matuā fa’amaoni ma filigā i le faiga o Āna fe’au ma galuega. SC 71.1 (LSK 78)

(8) O AI E MAUA MAI AI E LE “LĀLĀ” LE MALOSI E TUMAU AI I LE VINE MA FA’AALI ATU LONA FA’ATUSA?

‘Ou te mafaia mea uma lava i le fa’amalosi mai o Keriso iā te a’u. Filipi 4:13

MAU E TAU I AI: II Korinito 12:9; Efeso 3:16; 6:10, 11; Kolose 1:11; Isaia 41:10

Ua ōle mai Keriso ia fa’apa’iaina i tatou mo Ia. Ua Ia tu’uina se fa’aailoga aloā’ia i luga o le aigā tagata; ma ua Ia fetalai, “A o i latou uma ē na talia o Ia, ma fa’atuatua i Lona suafa, na Ia avatu i ai o le manuia, ia ‘avea i latou ma fanau a le Atua” (Ioane 1:12). E lē tataua e la ona tatou tu’u iā Keriso le mea na Ia maliu e togiolaina? Pe a tatou faia lenei mea, o le a Ia fafaguina lou lotofuatiaifo, fa’afou lou loto, fa’apa’ia ōu lagona, fa’amamā ōu manatunatuga, ma fa’atutū ōu malosi uma e galue ai mo Ia. O fuafuāga uma ma manatu uma o le a aumai e taofiofimaui iā Iesu Keriso. 7 BC 909

Ua fetalai Keriso, “E lē mafaia e outou ona fai o se mea e tasi pe a A’u lē i ai. “ (Ioane 15:5); peita’i pe a galuea’iina Lona alofa tunoa e ala i taumafaiga fa’aletagata, ona tatou mafaia lea o mea uma. O le a fa’aulu i le amio Lona uiga onosa’i ma le lotomaulalo, ma fa’alauteleina le salalau o le pupula e fa’amalamalamaina ai le ala i le lagi. Pe a va’aia ma fa’ata’ita’i i Lona soifuāga, o le a fa’afouina ai i tatou i Lona fa’atusa. O le a fa’asusuluina mai i o tatou olaga le mamalu o le lagi ma ole a fa’aātaina i luga o isi. I le nofoāli’i o le alofa tunoa e tatou te maua ai le fesoasoani o lo’o tatou mana’omia, ina ia mafai ona tatou ola i se olaga e fa’apea. O lea le fa’apa’iāga moni, ma o le ā se isi tulaga fa’aeaina e mafai e tagata ona fa’anaunau i ai ina ia feso’ota’i ai ma Keriso ma ‘avea pei o se lālā o lo’o so’ofa’atasi atu i le vine? 5 T 306

(9) O LE Ā LE MEA OFOFOGIA TELE E TUPU O LE A TATAU AI ONA FA’AMAUTŪ O TATOU MAFAUFAU I ASO TA’ITASI INA IA FA’ATELEINA AI LO TATOU FA’ATUATUA MA IA TALITONU ATO’ATO A IĀ KERISO?

Na fa’apea fo’i Keriso, ua tasi lava ona avatua o Ia ma taulaga, ina ia ‘aveina ai agasala a le to’atele, e fa’aali fo’i o Ia iā te i latou o ē fa’atalitali atu iā te Ia i Lona fo’i fa’alua mai, e lē ina ia ‘aveina agasala, a ia latou ola ai. Eperu 9:28

MAU E TAU I AI: I Peteru 3:18; I Ioane 3:5; Isaia 53:4-7

E fa’apei o Enoka, o i latou o ē mautū ona talitonu iā Keriso, o le a lagona le fa’atasi mai o le Atua. Aiseā e to’atele ai i latou e lagona le lē mautonu, e lagona o latou e pei o ē e mātuaoti? - Ua fa’apea ona o latou e lē o fa’atupuina se fa’atuatua e talitonu ai o Iesu Keriso o Lē e tau’aveina a latou agasala. O na o i latou ua solitulafono, ua afio mai ai Iesu i le tino tagata ma ‘avea e pei lava o i tatou, ina ia tatou maua le filemū e mautinoa e fa’avavau. E i ai i le lagi la tatou fautua, ma so’o se tasi e talia o Ia e fai ma āna Fa’aola o le a lē ‘avea o sē e mātuaoti e tau’ave le fetu’u a ia lava agasala. SD 287.2

E tataua ona tatou fa’atupu lelei i aso ta’itasi le fa’atuatua, ia mafaufau loloto iā te Ia i aso ta’itasi, o Lē ua tau’ave la tatou tulaga agasala, o la tatou faitaulaga sili e alofa mutimutivale ma e fa’amaoni; “Auā na tigāina o Ia ina o tofotofoina, o le mea lea ua mafai ai e Ia ona fesoasoani i ē ua tofotofoina” (Eperu 2:18). Ma “Auā e lē iā te i tatou se faitaulaga sili e lē mafaia ona tigā alofa fa’atasi ma i tatou i o tatou vaivai” (Eperu 4:15). I le lagi e o’o mai lava i le taimi nei, o lo’o tigā pea

o Ia mai o tatou tigā,; a o Ia o le Fa’aola o lo’o soifua, o le Fautua e fa’atāua i tatou, o lo’o Ia molimau pea mo i tatou. SD 287.3

E tatau ona tatou gaoioi ina ia fa’amalosia ai le fa’atuatua i aso ta’itasi; ma o le a fa’amalosia lenei fa’atuatua pe a fa’agaoioi i aso ta’itasi, a o tatou iloa e lē na o na Ia togiolaina i tatou, peita’i e alofa iā i tatou ma ua Ia fa’amamā a tatou agasala i Lona lava toto pa’ia ma ua faia i tatou e ‘avea ma tupu ma faitaulaga mo le Atua ma le Tamā. SD 287.4

Ua ‘ou iloa pe a tumau pea i se so’otaga ola ma Keriso, o le mea lea e mana’omia mo le tuputupu a’e ma le fua lelei mai, ma e lē mafai e se lālā e tasi ona fa’alagolago ia na o se isi fo’i lālā mo lona ola malosi.

Li’o le Tali:

Ioe

Lē Mautonu

‘Ou te filifili e tumau ma talia le malosi ma le fafaga fa’aleagaga o lo’o ofo mai e Keriso - le Vine Moni - e ala i le tu’u atu atoa o lo’u olaga ma su’esu’e i Lana Afioga.

Li’o le Tali:

Ioe

Lē Mautonu

Ua ‘ou iloa e na o le feso’ota’iga i taimi uma ma Keriso o le a tatou mafai ai ona fua mai fua o le Agaga. O la’u tatalo ma le fa’anaunauga o lo’u agaga ia i ai pea lenei so’otaga ina ia ‘ou fua mai ma fa’amamaluina ai le Atua!

Li’o le Tali:

Ioe

Lē Mautonu

‘Ou te tatalo mo le alofa tunoa fa’a-Atua o Keriso ia galue e ala i la’u taumafaiga vaivai fa’aletagata ina ia fa’asusuluina mai i lo’u olaga le fua o Lona alofa ma le amio e fai ma fa’aata e fa’aali atu ai Lona mamalu i isi.

Li’o le Tali:

Ioe

Lē Mautonu

MANATU FA’AOPOOPO

TATALO MANA’OMIA

TALI O TATALO

O le Pogai o le Mafutaga

Lesona 5

E fa'avae lenei lesona i luga o le Ioane 15:5.

(1) O LE Ā LE MEA O LE A FETALAI ATU AI IESU I SE ASO IĀ I LATOU O Ē SA TAUMAFAI E 'AU'AUNA IĀ TE IA A E LE'I I AI SE FESO'OTA'IGA TUMAU MA IA?

Ona 'Ou ta'utino atu ai lea iā te i latou, 'Ou te le'i iloa lava outou; inā ō 'ese ia outou iā te A'u, o outou o ē fai amio leaga. Mataio 7:23

MAU E TAU I AI: Mataio 7:20-22; 13:40; Ioane 10:14; Luka 13:25-27; II Timoteo 3:1-5

Ma e to'atele o lo'o galulue mo se i'uga e 'ese lava, e pa'ū i le sesē lava lea e tasi. E latou te galulue mo le lelei o isi; o ō latou tiute e mamafa, o o latou tiute tau'ave e tele na'uā, ma ua latou fa'atagaina a latou galuega e 'avea ma mea ua lē maua ai se taimi mo le Ali'i. O le feso'ota'iga ma le Atua e ala i le tatalo ma le su'esu'eina o Lana afioga ua lē amana'ia. Ua galo iā i latou na fetalai mai Keriso, "Auā e lē mafaia e outou ona faia o se mea e tasi pe a A'u lē i ai" (Ioane 15:5). Ua latou lē savavali fa'atasi ma Keriso, o ō latou olaga ua aunoa ma le alofa tunoa, ma o le a fa'ailoa mai le uiga fa'apito mo ia lava. Ua fa'aleagaina la latou 'au'aunaga i le naunau i le fia sili, ma uiga so'ona fai lē matagofie o le loto fa'amaua. O le tasi lenei o mea lilo e sili ona to'ilalo ai i le galuega fa'a-Kerisiano. O le mea lea e lē manuia ai le taunu'uga. COL 52.1 (AFK 13)

(2) O LE Ā LE MEA O LO'O FETALAI MAI KERISO E MAFAI ONA TATOU FAIA FA'ATAUNU'U PE A TATOU TUMAU IĀ TE IA?

O A'u nei o le vine, o lā outou. O lē tumau iā te A'u, ma A'u iā te ia, o ia lava e fua tele mai; auā e lē mafaia e outou ona fai o se mea e tasi pe a A'u lē i ai. Ioane 15:5

MAU E TAU I AI: II Korinito 3:5; Hosea 14:8; Filipi 1:11; II Peteru 1:3

O lenei so'ofa'atasiga ma Keriso, a fa'avaeina, e tataua ona tausia lelei. Na fetalai Iesu, "Inā tumau ia outou iā te A'u, o A'u fo'i iā te outou. Fa'apei o le lā e lē mafai ona fua pe a na o ia, pe afai e le mau i le vine, e fa'apea fo'i outou, pe afai tou te le tumau iā te A'u" (Ioane 15:4). E leai sē na o le papa'i po o le i ai i nisi taimi a e leai se feso'otaiga i nisi taimi. O le lālā e 'avea o se vaega o le vine o lo'o ola. O le so'otaga o le ola, mālōsi, ma le fua mai, mai le a'a e o'o i lālā e lē motusia ma e i ai pea. A vavae 'ese ma le vine, e lē mafai ona ola le lālā. O le fetalaiga fo'i a Iesu, e lē mafai ona ola pe a lē tumau iā te Ia. O le ola ua outou maua mai iā te A'u e fa'ato'ā mafai ona tumau pe a lē motusia le feso'ota'iga. A aunoa ma A'u tou te lē mafai ona manumālō i se agasala po o le tete'e i se fa'asoosoga. DA 676.1 (FNT 530.1)

"Ina tumau ia o outou iā te A'u, o A'u fo'i iā te outou." O le tumau iā Keriso, o le uiga e maua i taimi uma le Agaga Pa'ia, ma o le olaga e tu'uina atu 'atoa i Lana galuega. E ao ona matala pea le 'auāla o feso'ota'iga i le vā o le tagata ma lona Atua. E pei ona maua e le lālā o le Vine i taimi uma le ola mai le la'au ola, e fa'apea le tataua ona tatou tumau iā Iesu, ma tatou maua mai iā te Ia e ala i le fa'atuatua le mālōsi ma le 'ato'atoa o Lana lava amio. DA 676.2 (FNT 530.2)

E tu'uina atu e le a'a le mea'ai i le lālā ma o'o ai i se vaega e aupito i mamao o le lālā. E fa'apea ona fa'afeso'ota'i e Keriso le mālōsi fa'ale-agaga i tagata talitonu ta'ito'atasi. Afai lava e so'ofa'atasi le agaga o le tagata ma Keriso, e leai se mea e popole ai ne'i mamae pe mate. DA 676.3 (FNT 530.3)

(3) A O TATOU MAFUTA ATU IĀ TE IA, O LE Ā LE FUA E PITO SILI LE TĀUA O LE A TATOU FUAINA MAI?

A o lenei, o tumau le fa'atuatua, ma le fa'amoemoe, ma le alofa, o nā mea e tolu; a o le sili o nā mea o le alofa lea.

I Korinito 13:13

MAU E TAU I AI: I Korinito 13:1-13; I Ioane 4:8; Kalatia 5:6; 5:22, 23; I Peteru 4:8

So'o se mea e i ai le so'otaga ma Keriso e i ai le alofa. O ā lava nisi fua o lo'o tatou fuaina, a leai le alofa, e leai se mea lelei e maua ai. O le 'a'ano o la tatou ola fa'aleagaga o le alofa i le Atua ma o tatou tuā'oī. E lē mafai e se tasi ona alofa iā Keriso a e lē alofa i Lana fanau. Pe a tatou feso'ota'i atu iā Keriso, o le a i ai iā i tatou le mafaufau o Keriso. E fa'asusuluina mai i le amio le alofa ma le loto mamā, a e pulea le olaga e lle 'upu moni ma le agamalū; e matuā fa'ailoa mai lea i le suiga o foliga. O le a i ai le mana e suia ai le agaga o lo'o mafuta ai Keriso, ma o le a fa'aali mai ai i fafo le filemū ma le fiafia o lo'o mau ai i totonu. Tatou te feinu i le alofa o Keriso fa'apei o le lālā o na maua mea'ai ai le vine. Pe a sulu'ia i tatou iā Keriso, pe a ua feso'ota'i o tatou itū uma ma le Vine Ola, o le a tatou avatu le fa'amaoniga o lo'o fua mai fua tautele ma e ola. Pe a tatou feso'ota'i atu i le Malamalama, o le a 'avea i tatou o ala e susulu atu ai le malamalama, ma o le a fai i tatou ma fa'ata e fa'asusulu atu ai i le lalolagi i a tatou 'upu ma galuega. O Kerisiano moni uma e noanoatia e le filifili o le alofa e so'ofa'atasi ai le lalolagi ma le lagi, e fusifusia ai le tagata lē ola umi ma le Atua e leai se gata'aga. O le malamalama e susulu mai i fofoga o Iesu Keriso, e fa'asusuluina i loto o Ōna so'o ma fa'amamaluina ai le Atua. I SM 337.2

(4) O LE Ā LE FOLAFOLAGA E MAFAI ONA TATOU TAPA I AI I LA TATOU TAUIVIGA MA LE AGASALA PE AFAI O LO'O TATOU TUMAU IĀ KERISO?

E lē agasala se tasi o ē tumau iā te Ia; o sē agasala ua lē va'ai o ia iā te Ia, ua lē iloa fo'i o ia e Ia. I Ioane 3:6

MAU E TAU I AI: I Ioane 3:9; 5:4; 5:18; Kalatia 5:16

O le mea lava lenei e tasi na a'oa'o mai ai Iesu ina ua Ia fetalai mai, "Inā tumau ia o outou iā te A'u, o A'u fo'i ia te outou. Fa'apei o le lā e lē mafai ona fua pe a na o ia, pe afai e lē mau i le vine; e fa'apea fo'i outou, pe afai tou te lē tumau ia te A'u . . . auā e lē mafaia e outou ona fai o se mea e tasi pe a A'u lē i ai" [javascript:void\(0\)](#) (Ioane 15:4, 5). O lo tatou fa'alagolago ia Keriso ina ia tatou ola i le olaga pa'ia, ua pei lava lea o le fa'alagolago o le lā la'au i le pogai ina ia tupu ma ia fua mai ai. Pe a tatou tete'a ma Ia, ua leai so tatou ola. Ua leai so tatou malosi e tete'e atu ai i fa'aosoosoga, ma tatou tutupu a'e ai i le alofa tunoa ma le pa'ia. Pe a tatou tumau ia te Ia, o le a lē mafai ona tatou magumagu ai pe lē fua mai. A o le a avea i tatou e pei o le la'au ua totōina i tafatafa ane o vaitafe. SC 68.3 (LSK 75.4)

O lenei so'ofa'atasiga ma Keriso, a fa'avaeina, e tataua ona tausia lelei. Na fetalai Iesu, "Inā tumau ia outou iā te A'u, o A'u fo'i iā te outou. Fa'apei o le lā e lē mafai ona fua pe a na o ia, pe afai e le mau i le vine, e fa'apea fo'i outou, pe afai tou te le tumau iā te A'u" (Ioane 15:4). E leai sē na o le papa'i po o le i ai i nisi taimi a e leai se feso'otaiga i nisi taimi. O le lālā e 'avea o se vaega o le vine o lo'o ola. O le so'otaga o le ola, mālōsi, ma le fua mai, mai le a'a e o'o i lālā e lē motusia ma e i ai pea. A vavae 'ese ma le vine, e lē mafai ona ola le lālā. O le fetalaiga fo'i a Iesu, e lē mafai ona ola pe a lē tumau iā te Ia. O le ola ua outou maua mai iā te A'u e fa'ato'ā mafai ona tumau pe a lē motusia le feso'ota'iga. A aunoa ma A'u tou te lē mafai ona manumālō i se agasala po o le tete'e i se fa'aosoosoga. DA 676.1 (FNT 530.1)

(5) E PEI O LE SAITO O LO'O FA'AMATALAINA I LENEI MATĀ'UPU, O LE Ā LE MEA E TATAU ONA TUPU I LE TAGATA LAVA IA A E LE'I FUA MAI NI FUA E TELE?

E moni, e moni, ‘Ou te fai atu iā te outou, Afai a e lē pa’ū le fua o le saito i le ‘ele’ele ma pala ai, e tumau pea o le mea e tasi; a e afai e pala, ona fua mai ai lea o fua e tele. Ioane 12:24

MAU E TAU I AI: Ioane 12:25; I Korinito 15:36-38; Kalatia 2:20; Mareko 8:35

E ala i le lafoina o le fatu i le ‘ele’ele, ua fa’asino mai ai e Keriso le taulaga ofo, o Ia lava lea mo le togiolaina o i tatou. E pei ona Ia fetalai mai, “Afai e lē pa’ū le fua o le saito i le ‘ele’ele ma pala ai, e tumau pea o le mea e tasi; a e afai e pala, ona fua tele mai ai lea” (Ioane 12:24). E fa’apea fo’i le maliu o Keriso, o le a i’u ina fua mai ai mo le malō o le Atua. E tusa ai ma le tulafono o le malō o la’au, o le ola o le a mafua mai i Lona maliu.

O i latou uma e fua mai fua a o galulue fa’atasi ma Keriso, e tatau ona mua’i pa’ū’ū i le ‘ele’ele ma pala ai. O le ola e tatau ona lafoina i le lua o mana’oga o le lalolagi. E tatau ona fa’aumatia le alofa fa’apito, ma le manatu iā te ‘oe lava; a e o le tulafono o le fia tu’u atu fa’ataulaga ‘oe lava, o le tulafono lea mo le fa’asaoina o ‘oe lava ia. O le fatu e tanumia i le ‘ele’ele e maua mai ai fua ma o le a toe totōina fo’i, ma o le a fa’ateleina ai ma le seleselega. E lafo’eseina e le fai fa’ato’aga ana fatu ina ia fa’asaoina ai. E fa’apea i le olaga o le tagata, a tu’u atu ona ola ai lea. O le ola o le a fa’asaoina o le ola lea e tu’uina atu ma le fiafia e ‘au’auna ai i le Atua ma tagata. O i latou e tu’u atu fa’ataulaga o latou ola i lenei lalolagi ona o le suafa o Keriso, o le a fa’atumau lea mo le ola e fa’avavau. COL 86, 87 (AFK 29.6-30)

(6) O LE Ā LE FA’AGAOIOIGA MUAMUA E TATAU ONA TATOU FAIA FA’ATO’Ā MAFAI AI E KERISO ONA FA’ASINOMIA LONA AMIOTONU IĀ I TATOU?

Ia outou fa’alatalata atu i le Atua, ona fa’alatalata mai lea o Ia iā te outou. Tagata agasala e, inā fafano ia o outou lima, o outou ē fa’alotolotolua e, inā fa’amamā ia o outou loto. Iakopo 4:8

MAU E TAU I AI: Isaia 55:6, 7; Sakaria 1:3; I Nofoa’iga Tupu 28:9; II Nofoā’iga Tupu 15:2

Na fetalai Iesu, “E lē mafaia e outou ona fai o se mea e tasi pe a A’u lē i ai” [javascript:void\(0\)](#) (Ioane 15:4). O fa’ataatau atonu o lo’o e faia i lou malosi, o le a pei e na o ni maea e fafauina i oneone; peita’i a e tatalo ma le fa’amaoni, tu’u’ese oe lava ia, a o lou mafaufau, tino ma le agaga i le Atua, ia e ofu i le ‘ofutau a le Atua ma tatala atu le loto i le amiotonu o Keriso; ma o na pau lea o le mea - le amiotonu o Keriso - o le a mafai ai ona e tū ma tete’e i mailei a le ti’apolo. O le galuega a agaga ta’itasi uma o le tete’e atu lea o le fili i le mana ma le malosi o le Ali’i o Iesu Keriso, ma o le folafolaga ua tu’u mai o le a sola’ese loa le ti’apolo mai iā i tatou. Ia iloa e tagata uma o lo’o tatou i ai pea i taimi faigatā, ma e lē o mautinoa e saogalemū vaganā ua tatou usita’i i tulaga o fa’atonuga. Ua fa’apea mai le Ali’i, “Ia outou fa’alatalata atu i le Atua” (Iakopo 4:8). E fa’apefea ona fai? - E ala i le iloiloia fa’alilolilo ma le fa’amaoni o lou lava loto; e ala i le fa’alagolago ma le loto maulalo i le Atua e pei o le tamaitiiti, ma fa’ailoa ōu vaivaiga iā Iesu; ma e ala i le ta’uta’u atu o āu agasala. O lea le ala atonu o le a e fa’alatalata atu ai i le Atua, ma o le a Ia fa’alatalata mai iā te ‘oe. SD 346.3, 347.1

(7) PE A LEAI SE UIGA E SUIA E LE ALOFA E FESO’OTA’I AI MA KERISO, O LE Ā LE PUGA O A TATOU TAUMAFAGA IA GALULUE MO IA?

Afai ‘ou te tautala i gagana a tagata atoa ma agelu, a e leai so’u alofa, ua ‘avea a’u ma ‘apa memea ta’alili, po o se sumapalo tagitagi. I Korinito 13:1

MAU E TAU I AI: I Korinito 13:2, 3; I Ioane 3:10; Mataio 25:45; I Peteru 4:8

Oi maimau pe ana iloa e tagata uma e leai se mea e mafai ona faia e lelei pe a lē fa’atasi ai Keriso! O i latou e lē fia i ai fa’atasi ma Ia e ō salalau ‘ese’ese i mea mamao, ma o latou manatunatuga ma gaoioiga o le a lē i ai se uiga tonu; o latou āga ma amio e fa’aleaga ai mea e lelei. E sautualua le pulea o a tatou fa’agaoioiga, ona e afāina ai isi a e fa’apea fo’i tatou lava ia. Pe o se manuia pe o se fetu’u o le a afāina ai ē o lo’o feso’ota’i ma tatou, a e o le a tau māmā lava lea iā i tatou. O fa’agaoioiga o le a fai ma masani, ma masaniga e fai ma amio; pe a lē leoleoina a tatou masaniga o le a lē mafai ona tatou ‘aufa’atasi ma sui o le lagi i le galuega o le fa’aolataga, ma lē sauni ai e ulufale i maota fa’alelagi na afio Iesu e sauniuni; e

leai se isi o le a i ai i lugā vaganā i latou o ē ua tu’u atu atoa o latou loto ma ta’ita’iga i le finagalo ma ala o le Atua. O lē ua fa’amaonia le amio, ua tula’i manumalō mai tofotofoga, o lē o lo’o fa’asoa i le uiga fa’a-Atua, o le a i ai ma i latou e ta’u mai e Keriso ua fa’amanuiaina. FE 194.1

A leai Keriso e lē mafai e tatou ona faia se mea. O fa’avae ato’atoa o le ta’uamionuina, uiga tonu, ma le amio lelei e mai le Atua ia. A faia tiute i le lotofuatiaifo, o le tigāalofa pei o Keriso, o le alofa mo isi ma le alofa mo lou lava agaga, ona o ‘oe e ā le Atua ma ua fa’atauina ‘oe i le toto pa’ia o Keriso, o le a ‘avea ‘oe ma ‘aufaigaluega fa’atasi ma le Atua, ma o le a fa’atumulia ‘oe i se mana fa’au’una’i ma fa’atosina. E tatau ona e talitonu i lou tulaga fa’atuatua ina ia mafai ai ona fa’aailoa atu i isi. E ala i lau fa’aa’oa’o fa’apea ma le faia o mea tonu, e tatau ona e fa’aali atu lou āva i lou fa’atuatuāga ma ia tautala ma le fa’aaloalo e fa’atatau i mea fa’aleagaga. Ia ‘aua ne’i fa’amamā pe fa’atauva’aina matā’upu e si’i mai le Afioga a le Atua; ma a o e si’i le Tusi Pa’ia i ou lima, ia manatua o lo’o e i ai i luga o le ‘ele’ele pa’ia. E fa’atasi pea agelu ma ‘oe, ma e mafai ona e va’aia i latou pe a fa’amatala lelei ou mata. Ia ‘avea lau amio ma molimau i agaga uma e te feso’ota’i i ai ona o lou si’osi’omaga e foliga mamā ma pa’ia. Atonu o sina ‘upu fa’avi’ivi’i e tasi po’o se ‘ata fa’alētatau o le a fa’asino ai se agaga i se ala sesē. E mata’utia i’uga pe a lē mautū pea le feso’ota’iga ma le Atua. FE 194.2

(8) O AI LE POGAI O LE ALA O LO’O TU’UINA AI E KERISO LE OLA FA’ALEAGAGA I LE TAGATA INA IA TATOU FUA LELEI MAI AI?

O le Atua fo’i e tupu mai ai le fa’amoemoe, ia fa’atutumuina outou e Ia i le oli’oli uma atoa ma le filemū, ina ua fa’atuatua; ina ia tele lava lo outou fa’amoemoe ona o le mana o le Agaga Pa’ia. Roma 15:13

MAU E TAU I AI: I Ioane 3:24; 4:12, 13; Roma 8:9; Efeso 3:16, 17

E galue Keriso e ala mai le Agaga Pa’ia; o Ia o Lona sui. E ala mai le Agaga Pa’ia e Na te tu’uina le ola fa’aleagaga i le agaga, fa’ate’ia lona malosi mo le lelei, e fa’amamā ai mai ala lē tatau, a e tu’u i ai se agava’a tatau mo Lona malō. E tele na’uā fa’amanuiāga ma meaalofo tautele a Iesu e fa’asoa mai i tagata. O Ia o le Fautua ofoofogia, e lē gata le atamai ma le malosi; pe afai o le a tatou fa’aailoa atu le mana o Lona Agaga, ma gaua’i ina ia gaosia ai tatou, o le a tatou tutūla’i loa ua ato’atoa ma Ia. Oi se manatu a maoa’e! I a Keriso “auā o lo’o mau i totonu iā te Ia le tumu uma lava o le itū Atua ua i Lona tino; o lo’o ua fa’a’ato’atoaina fo’i outou iā te Ia” (Kolose 2:9, 10). O le a lē mafai lava e le loto fa’aletagata ona iloa le fiafia se’iloga e gaua’i atu ia gaosia ai e ala i le Agaga o le Atua. E fa’aōgatasi e le Agaga le tagata ua fa’afou ia pei o le fa’aa’oa’o, o Iesu Keriso lea. E ala i le mana o le Agaga, o le ita i le Atua e suia i le fa’atuatua ma le alofa, o le mimitavale i le loto maulalo. O le a iloa e le agaga le matagofie o le ‘upu moni, ma e fa’amamaluina Keriso i le aupito lelei ma le ato’atoa o le amio. A o faia nei fesuiā’iga, ua fai pesega a agelu, ma o se oli’olisaga iā Keriso ma le Atua ona o agaga ua gaosia ia pei o uiga fa’alelagi. AG 196.4

Ua ‘ou iloa e moni le fetalaiga a Keriso: “ E lē mafaia e outou ona fai o se mea e tasi pe a A’u lē i ai” (Ioane 15:5).

Li’o le Tali:	Ioe	Lē Mautonu
----------------------	------------	-------------------

Ua ‘ou iloa a i ai loa le ma so’otaga ma Keriso, e tatau lava ona tausia lelei. E lē mafai ona ‘ou ola fa’aleagaga a o i ai se feso’ota’iga e so’ona fai ma le fa’amoemoe ia ola pea.

Li’o le Tali:	Ioe	Lē Mautonu
----------------------	------------	-------------------

E pei ona ‘avea le lālā ma se vaega o le vine ola, ua ‘ou filifili e tu’u atu uma a’u nei - mafaufau, tino, ma le agaga - i le Atua e ala iā Keriso - le Vine Moni. ‘Ou te tu’u atu atoa lo’u loto i le fauina ma le fa’atinoia a le Agaga o le Atua ina ia mafai ona ‘ou maua le ola, malosi, ma ia fua lelei ia ala mai ma ia aumai iā te Ia.

Li’o le Tali:	Ioe	Lē Mautonu
----------------------	------------	-------------------

O le Lālā Mamae

Lesona 6

O lenei lesona e fa'avae i luga o le Ioane 15:6.

(1) O Ā I'UGA FAIFAI UMI E TOLU PE A LĒ I AI PEA LE SO'OTAGA E MANA'OMIA A LE LĀLĀ I LE VINE?

Afai e lē tumau se tasi iā te A'u, ona lafoa'iina lea o ia i tua pei o le lā la'au, ma fa'apopoina, ona fa'apotopotoina ai lea e tagata, ma lafo i le afi, ua susunu ai. Ioane 15:6

MAU E TAU I AI: Mataio 3:10; 7:18-20; Isaia 14:19; Esekielu 17:9, 10

O le taofi sesē fa'apea, “a i ai i le alofa tunoa, o le a tumau ai pea i le alofa tunoa,” a e tete'eina lenei tulaga. E mafai lava e i latou sa iā Keriso ona motusia le so'otaga ma Ia ma lē iloa ai. O le fa'aolataga e fa'atatau lea i le mafuta ma Keriso se'i o'o i le i'uga.

Atonu o le a faia pea sauniuniga fa'aleagaga e le Kerisiano a o fa'ailoa mai o le lālā ua motu'ese, peita'i ua lē o i ai le mana e mana'omia (II Timoteo 3:5). E va'aia le papa'u o lana galuega pe a tofotofoina. A o fa'aputuina lālā ua 'ave'ese ma susunu i le afi, e fa'apea le Kerisiano e lē fua ma ē lē galulue ona fa'aumatiaina lea (mataio 10:28; 13:38-40; 25:41, 46). E lē o ta'u mai se amio o le lē usita'i, a e na o le agasala o le fa'atamala. Fa'atusatusa le fa'ata'oto i mamoe ma oti (Mataio 25:31-46). E le'i fa'atasi ai i le malō ē na i le itū agavale o le Tupu ona ua fa'atamala i tiute masani fa'a-Keerisiano. 5 BC 1042

“O Lo'u Tamā o le galue vine ia. O lā uma lava o iā te A'u e lē fua, e ave'eseina e Ia” (Ioa. 15:1b, 2a). E mafai ona foliga mai o lo'o mau le lālā fa'apipi'i i le vine, a e lē o i ai le feso'ota'iga mana'omia. O le a lē tupu ma fua mai. E mafai ona foliga mai o lo'o i ai le so'otaga ma Keriso a e aunoa ma le so'ofa'atasi moni ma Ia i le fa'atuatua. E mafai ona ta'utino le tagata o lo'o 'auai i tapua'iga ma sauniga, peita'i o le amio ma uiga fa'atino e fa'aalia ai pe o feso'ota'i ma Keriso. Afai e leai se fua, e lē o ni lālā moni. O le vavae 'ese mai iā Keriso, e aofia ai le matuā pagātia e pei ona fa'atusa i le lālā ua mate. Ua fetalai Keriso, “Afai e lē tumau se tasi iā te A'u, ona lafoa'iina lea o iā i tua pei o le la la'au, ma fa'apopoina, ona fa'apotopotoina ai lea e tagata, ma lafo i le afi, ua susunu ai” (F. 6). DA 676.5 (FNT 530-531)

(2) O AI E AUMAI AI LE AGAVA'A E OLA AI I SE OLAGA E PA'IA MA E LĒ PONĀ?

Ia ato'atoa ona fa'apa'iaina o outou e le Atua lava e Ōna le manuia; ia tausia lava lo outou agaga atoa uma, i le ma le loto, atoa ma le tino, ia lē mata'uleagaina, i le afio mai o lo tatou Ali'i o Iesu Keriso. I Tesalonia 5:23

MAU E TAU I AI: I Tesalonia 3:13; Levitiko 20:8; Iuta 1:1

O lenei so'ofa'atasiga ma Keriso, a fa'avaeina, e tatau ona tausia lelei. Na fetalai Iesu, “Inā tumau ia outou iā te A'u, o A'u fo'i iā te outou. Fa'apei o le lā e lē mafai ona fua pe a na o ia, pe afai e le mau i le vine, e fa'apea fo'i outou, pe afai tou te le tumau iā te A'u” (Ioane 15:4). E leai sē na o le papa'i po o le i ai i nisi taimi a e leai se feso'otaiga i nisi taimi. O le lālā e 'avea o se vaega o le vine o lo'o ola. O le so'otaga o le ola, mālōsi, ma le fua mai, mai le a'a e o'o i lālā e lē motusia ma e i ai pea. A vavae 'ese ma le vine, e lē mafai ona ola le lālā. O le fetalai fo'i a Iesu, e lē mafai ona ola pe a

lē tumau iā te Ia. O le ola ua outou maua mai iā te A'u e fa'ato'ā mafai ona tumau pe a lē motusia le feso'ota'iga. A aunoa ma A'u tou te lē mafai ona manumālō i se agasala po o le tete'e i se fa'aosoosoga.

“Ina tumau ia o outou iā te A'u, o A'u fo'i iā te outou.” O le tumau iā Keriso, o le uiga e maua i taimi uma le Agaga Pa'ia, ma o le olaga e tu'uina atu 'atoa i Lana galuega. E ao ona matala pea le 'auāla o feso'ota'iga i le vā o le tagata ma lona Atua. E pei ona maua e le lālā o le Vine i taimi uma le ola mai le la'au ola, e fa'apea le tatau ona tatou tumau iā Iesu, ma tatou maua mai iā te Ia e ala i le fa'atuatua le mālōsi ma le 'ato'atoa o Lana lava amio.

E tu'uina atu e le a'a le mea'ai i le lālā ma o'o ai i se vaega e aupito i mamao o le lālā. E fa'apea ona fa'afeso'ota'i e Keriso le mālōsi fa'ale-agaga i tagata talitonu ta'ito'atasi. Afai lava e so'ofa'atasi le agaga o le tagata ma Keriso, e leai se mea e popole ai ne'i mamae pe mate. DA 676.1-3 (FNT 530)

(3) O Ā LA'ASAGA TĀUA E LUA SA A'OA'O MAI PAULO E MAFAI AI E TATOU TAGATA AGASALA ONA FESO'OTA'I ATU AI IĀ KERISO LE VINE OLA MA FUA MAI AI I LE FUA O LE OLAGA E PA'IA?

Ua ou molitino iā Iutaia atoa ma Eleni le salamō i le Atua, ma le fa'atuatua i lo tatou Ali'i o Iesu Keriso. Galuega 20:21

MAU E TAU I AI: Galauega 10:43; 11:18; Roma 3:22-26

A o sunu'i le lālā mate sa vavae'ese mai le la'au ola ma ua amata fa'aaogā ōna uaua ma vaegātino uma e feinū i le ola ma le malosī o le vine se'ia o'o ina fotu mai ma fuga mai ma fua mai loa, e fa'apea le tagata agasala le mafai, e ala i le salamō ma le fa'atuatua ona feso'ota'i ma Keriso, 'avea ma soa o le uiga fa'a-Atua, ma fa'aali i 'upu ma galuega fua o le olaga e pa'ia. OHC 145.2

O Iesu e “i ai le soifua iā te Ia lava,” ma o lenei ola o lo'o ofoina fua mai, e mo agaga ua oti ona o agasala ma soligatulafono. E moni ua Ia fa'asoa mai iā i latou Lona uiga mamā, Lona mamalu, ma le fa'aeaina.... O le lālā e leai se ola, pe a sulunu'i i le vine ola, o le a fai ma vaega o le vine; e ola a o feso'ota'i i le vine. E fa'apea le Kerisiano e ola e ala i lana so'otaga ma Keriso, pe a so'ofa'atasi le tagata agasala i le uiga e pa'ia ma fa'a-Atua. E mafuta iā Keriso le agaga e talitonu, e 'avea ai ia e tasi ma Ia. Pe a feso'ota'i lalata tagata i a latou vā feāloā'i o lenei olaga, o le a talitutusa loa o latou lagona ma mea e fiafia i ai. E fa'apea i latou e tumau iā Keriso ona fiafia i mea e fiafia fo'i Ia i ai. O le a latou teuloto ma usiusita'i i Āna tulafono. OHC 145.3

(4) O LE Ā LE MEA E MAFAI ONA TATOU FAIA IA TUMAU AI IĀ KERISO A O FEAGAI MA TOFOTOFOGA MA TULAGA FAIGATĀ?

Ia tu'uina atu iā te Ia mea uma tou te popole ai, auā o lo'o manatu mai o Ia iā te outou. I Peteru 5:7

MAU E TAU I AI: Salamo 34:7; 34:19; Mataio 6:25-33

Ia i luma pea o le Atua ōu mana'o, ma lou fiafia, ma ōu fa'anoanoāga, ma mea e te mata'u ai. E lē mafai ona mamafa o se avega iā te Ia; e lē mafai ona lē lavā o Ia. O Ia, o Lē Na te faitauina lauūlu i lou ulu, e lē fa'atauva'a iā te Ia mana'oga o Lana fanau. “E mutimutivale tele le Ali'i ma le alofa naunau” (Iakopo 5:11). E o'otia Lona finagalo alofa i o tatou fa'anoanoāga, e o'o lava fo'i i lo tatou ta'uta'u atu i Ōna luma o mea o lo'o tatou mafatia ai. O mea uma e fa'atupuina ai le fa'alētonu ma le fetōa'i i o tatou mafaufau, ia avatu uma lava i Ōna luma. E leai se mea e mamafa iā te Ia, auā o Ia lava Lē o lo'o taofiofi a'e i paneta, o lo'o pulea e Ia le aoao o mea. E leai se mea fa'atauva'a Na te lē silafia o mea uma e fa'amata o le a i ai sona feso'ota'iga ma lo tatou filemū. E leai se matā'upu lilo ma le pouliuli o lo'o lagona i o tatou loto e fa'apea e lē mafai ona ati i ai Lana silafaga; e leai fo'i se femēmēa'iga po o se fenumia'iga ua maua ai o tatou olaga e fa'apea Na te lē mafai ona toe fa'asa'osa'oina. E silafia uma e lo tatou Tamā o i le lagi, ma amana'ia loa i Lona finagalo, so'o se puapuagā e o'o mai i sē aupito fa'atauva'a o Lana fanau, so'o se mea e mafatia ai le mafaufau o so latou, so'o se fiafiāga, po o so'o se 'upu fo'i e sau i o latou laugutu i le tatalo. “E fa'amalōlōina e Ia ē ua loto momomo; e fufusi e Ia o latou manu'a” (Salamo 147:3). O le feso'ota'iga i le vā o le Atua ma agaga ta'ito'atasi uma lava, ua matuā iloga lelei

lava, ma ua ato'atoa, e peiseā'i ua na o lea lava le agaga e to'atasi na Ia 'auina mai ai Lona Ālo pele ina ia lavea'iina. SC 100.1 (LSK 111.3-112)

(5) PE A TATOU FESO'OTA'I MA LE ATUA E ALA I LE TATALO MA 'AI'OIGA MA LE LOTO FA'AFETAI, O LE Ā LE FOLAFOLAGA E MAFAI ONA TATOU MAUA I SO'O SE TULAGA?

Aua ne'i popole outou i se mea e tasi, a ia fa'ailoa atu o outou mana'o i mea uma lava i le Atua, i le tatalo, ma le fa'atoga, atoa ma le fa'afetai. O le manuia fo'i mai le Atua, o lo'o silisili lava i mea uma e manatu i ai, e leoleoina ai o outou loto atoa ma o outou mafaufau iā Keriso Iesu. Filipi 4:6, 7

MAU E TAU I AI: Isaia 26:3, 4; 45:7; Ioane 14:27

O se tatou avanoa manuia pe a i ai se feso'ota'iga e savavali ai ma talanoa fiafia ai ma Iesu i aso ta'itasi. E lē o se mea e fa'apopoleina ai pe uia se ala e i ai tofotofoga ma faigatā. Ia i ai iā i tatou le filemū e lē mafa'amatalaina; peita'i o le a tatou fa'afesaga'i pea ma pule o le pogisā, matuā fete'ena'i ma le manatu fa'apito ma agasala ua tu'uloto. O manumalō o aso ta'itasi e maua e ala i le filigā ma le taumafai e fai mea lelei, o le a tāua iā Keriso Lē na alofa iā i tatou ma tu'uina Ia lava mo i tatou, ina ia Ia togiolaina ai tatou mai a tatou agasala uma lava, ma fa'amamā ai tatou mo Ia, "o Lona lava nu'u, e ma'elegā i galuega lelei" (Tito 2:14). LHU 98.5

E fa'atagaina e Keriso ona o'o tofotofoga i luga o Ōna so'o ina ia ta'ita'iina ai i latou ia atili sa'ili le Ali'i ma le fa'amaoni. Pe a o'o mai loa tofotofoga, ia lē manatu o le Ali'i o lou fili lea. E lē finagalo o Ia ia e fa'avaivai; peita'i o le fa'amaoniga e iloa ai o le a e tū fa'amaoni iā te Ia i so'o se tulaga. E lē finagalo o Ia ia vavae'ese atu 'oe a e ia e aga'i fa'alatalata atu i le Ali'i. O le Atua e na o le pau lea o le fa'amoemoe mo le Kerisiano i taimi o fememea'iga. UL 303.2

Ia 'aua ne'i e talanoa i nisi e fa'atautau i ou tofotofoga, ona o lo'o i ai fo'i a latou 'avega o lo'o tau'ave, ma e seāseā malamalama lelei i aii o tatou uō fa'aletagata. A e i ai lou avanoa e alu ai i Lē o le a malamalama pea i ai, auā o Lona soifuāga i le lalolagi sa tumu i tofotofoga ma fete'ena'iga, na Ia tau'ave e aunoa ma se to'ilalo po o se agasala....UL 303.3

(6) O LE Ā LE FA'AMAONIGA O LO'O MALŌLŌ LELEI MA MAUTŪ LE VĀ FEĀLOA'I MA KERISO?

O le mea lava lenei ua tatou iloa ai ua tumau i tatou i totonu iā te Ia, o Ia fo'i i totonu iā i tatou, auā o Lona Agaga ua Ia foa'iina mai iā te i tatou. I Ioane 4:13

MAU E TAU I AI: I Ioane 3:24; Roma 8:9, 11, 14-16

O le fa'atasi ai o le Agaga i le olaga o le Kerisiano o le a fa'amaonia ai o lo'o mafuta le Atua ma ia, auā e tumau le Atua i le tagata e ala i Lona Agaga.... 7 BC 658

O le Agaga Pa'ia, o le mănāva o le ola fa'aleagaga i le tagata. O le tu'uina mai o le Agaga o le tu'u mai lea o le soifua o Keriso. E fa'aulufia le tagata e taliaina i uiga o Keriso. O le a ulufale le Agaga Pa'ia i le loto e lē mimitavale ma e fa'atumuina e le alofa o Iesu le gaogao e maua ona ua tu'u'ese le manatu fa'apito i le tagata lava ia. O i latou e va'aia Keriso i Lona uiga moni, ma talia o Ia i o latou loto, o le a maua le ola e fa'avavau. E mafuta Keriso i totonu o i tatou e ala i le Agaga; ma o le Agaga o le Atua, pe a talia e le loto e ala i le fa'atuatua, o le amataga lea o le ola e fa'avavau. FLB 57

Tatou te lē va'aia Keriso ma talanoa ma Ia, peita'i o lo'o latalata mai pea Lona Agaga Pa'ia i taimi uma. E galue i totonu o i latou uma e taliaina Keriso. O ē o lo'o mafuta ai le Agaga e fa'aalia mai lea i fua o le Agaga - alofa, oli'oli, filemū, agaalofo, agamalū, agalelei, fa'amaoni. FLB 57.5

(7) E FA'APEI O LE TUPU O TAVITA, O LE Ā LE MEA AOGĀ E MAFAI ONA TATOU ŌLE ATU I LE ATUA INA IA FAIA IĀ I TATOU I ASO TA'ITASI IA TATOU LĒ MAMAE AI?

Ia ou fa'alogologo i Lou alofa i le taeao; auā ou te fa'atuatua iā te 'Oe; ia e fa'asino mai le ala ou te savali ai; auā o lo'o naunau atu lo'u loto iā te 'Oe. Salamo 143:8

MAU E TAU I AI: Salamo 25:4, 5; 32:8; 86:4-7; 5:2, 3; Fa'ata'oto 3:5, 6

Tatou te tutupu a'e i le alofa tunoa e ala i le feso'ota'i ma Ia i aso ta'itasi ma itulā ta'itasi - e ala i le tumau iā te Ia. O Ia o le ta'ita'i ma le fa'aato'atoaina o lo tatou fa'atuatua. O Keriso Lē e muamua ma e mulimuli ma e i taimi uma. E tatau ona ai o Ia ma i tatou i le amataga ma le fa'ai'uga, atoa ma la'asaga ta'itasi uma o le ala. AG 293.4

Ia e fa'apa'iaina oe mo le Atua i le taeao; ia 'avea lenā ma āu galuega muamua lava. Ia fa'apenei lau tatalo: "Le Atua e, ia avatua a'u mo 'Oe ato'atoa. Ou te fa'ata'atiaina mea uma ua ou mafaufauina i Ōu 'a'ao. Ia E fa'aaogāina a'u i le aso nei mo Āu fe'au. Ia ta mafuta ma 'Oe, ma ia ta galulue fa'atasi ma 'Oe i fe'au uma ou te faia." Ia e faia lenei mea i aso uma lava. O taeao uma ia e fa'apa'iaina ai 'oe mo le Atua e tusa ma ōu la'asaga i lenā aso. Ia e tu'uina atu iā te Ia mea uma ua e mafaufauina, ina ia fa'ataunu'uina po o le lē fa'ataunu'uina fo'i e tusa ma Lona finagalo o le a fa'ailoa mai. I le a o fa'apea i aso ta'itasi ona e tu'uina atu o lou ola i Ōna 'a'ao, o le a tauau pea ina foliga ai lou olaga i le soifuāga o Keriso. SC 70.1 (LSK 77.1)

(8) INA IA LĒ MAMAE A E IA TUMAU PEA LA TATOU SO'OTAGA FA'ALEAGAGA I LE VINE, O LE Ā LE MEA E TATAU ONA TATOU FILIFILI IA FAIA I ASO TA'ITASI?

Pe afai fo'i e leaga iā te outou ona 'au'auna iā Ieova, inā filifili ia o outou i le aso nei, po o ai tou te 'au'auna i ai; po o atua na 'au'auna i ai o outou tamā, o ē sa i le la itū o le vaitafe, po o atua o sā Amorī, e o latou le nu'u ua outou nonofo ai; a o a'u nei ma lo'u aiga, matou te 'au'auna iā Ieova. Iosua 24:15

MAU E TAU I AI: I Tupu 18:21; Mataio 6:24; Roma 6:16; I Korinito 10:21; II Korinito 6:14

Ia tatou faia muamua le galuega i o tatou lava loto. E tatau ona fa'aaogā fa'avae moni o le toe fuata'iina. E tatau ona liua ma fa'apa'iaina le loto ina ia i ai sa tatou feso'ota'iga ma Keriso. A o fevaevaea'i o tatou loto, o le a lē mafai ona tatou agava'a ia aogā ai i le olaga nei pe o le ola o i lumana'i. O tatou o foafoāga e atamamai, e mana'omia ia tatou saofafa'i i lalo ma mafaufau po o tatou mua'i sa'ili moni le malō o le Atua ma Lona amiotonu. O le mea e aupito mafai ona tatou faia, o le mafaufau manino lelei ma le fa'amaoni pe o lo'o tatou naunau e taumafai ia maua le fa'amoemoe fa'a-Kerisiano ma fa'amautū le lagi a le Kerisiano. Pe afai ua tatou filifili i lea mea e ala i le alofa tunoa o Keriso, o le a fesili loa: O le ā le mea e tatau ona 'ou vavae'ese mai lo'u olaga ina ia lē mafai ai ona 'ou tau pa'ū? TDWG 48

O la'u tatalo, e ala i Lona alofa tunoa, ina ia mafai ona 'ou mautū i la'u feso'ota'iga ma Keriso.

Li'o le Tali:

Ioe

Lē Mautonu

'Ua 'ou naunau le Ali'i e, e ala i Lou alofa tunoa, ina ia 'ou tula'i pea a o i lalo o iloilogaga ma tofotofoga, ia fua mai fua mo Lou mamalu ma ia fa'amamaluina ai le Tamā.

Li'o le Tali:

Ioe

Lē Mautonu

'Ou te iloa e mana'omia mo lenei vā feagai ma Keriso se feso'ota'iga i itulā uma fa'apea ma aso ta'itasi.

Li'o se Tali:

Ioe

Lē Mautonu

'Ou te ta'u atu o Keriso e lē na o Lē e Ta'ita'i a e o Ia fo'i Lē e fa'aato'atoaina lo'u fa'atuatua. 'Ou te filifili ia i ai Ia i le fa'ai'uga o lo'u ala fa'apea ma o'u la'asaga uma.

Li'o le Tali:

Ioe

Lē Mautonu

Ua ‘ou filifili e vavae’ese mai so’o se mea o i lo’u olaga e mafua ai ona ‘ou tau pa’ū; ma e ala i le fa’atuatua, ia mafai ai ona soifua o Ia ma fa’aalitino Lona uiga Atua i totonu iā te a’u.

Li’o le Tali:	Ioe	Lē Mautonu
<u>MANATU FA’AOPOOPO</u>	<u>TATALO MANA’OMIA</u>	<u>TALI O TATALO</u>

Mafuta i le Tatalo

Lesona 7

O lenei lesona e fa'avae i luga o le Ioane 15:7.

(1) O LE Ā LE P'UGA PE AFAI E TATOU TE TUMAU IĀ TE IA MA LANA AFIOGA?

Afai tou te tumau iā te A'u, a tumau fo'i A'u 'upu iā te outou, o mea uma lava tou manana'o i ai, tou te ōle atu ai, ona faia lea mo outou. Ioane 15:7

MAU E TAU I AI: Ieremia 15:16; Kolose 3:16, 17; Ioane 16:23; I Ioane 5:14, 15; I Ioane 3:21, 22

O le mafutaga e ō gatasi ai pei ona ta'u mai i le Fuai'upu 4. A o tumau tagata iā Keriso, e mafuta Keriso ma i latou ma o le a fa'asoa i le uiga moni fa'ale-Atua (II Peteru 1:4). O latou manatu e mataulia ma le finagalo o le Atua ma o talosaga e faia e ō gataasi ma lea finagalo. E lē gata i lea, e leai se agasala e fa'alavelave mai ia lē maua ai se tali e logolelei.

O A'u fetalai e tumau. O nei 'upu e fa'aali mai ai o le mafutaga a Keriso e lē o se mea e lē mafa'amatalaina pe fa'alilolilo. E maua Keriso e tagata e ala i le maua o Lana Afioga. A o fafagaina i latou i luga o nei afioga, o le a fa'amalamalamaina ai le mafaufau. Ma a o latou filifili e mulimuli i lea afioga ma usita'i fa'amaoni i ai e ala i le mana o le lagi, o Keriso lea, o le a mautū ai ia i totonu, le fa'amoemoe o le mamalu (Kolose 1:27). E lē gata i lea, o le a fafagaina pea i latou i aso ta'itasi e Lana afioga. 5 BC 1043

(2) E FA'APEFEA ONA FA'AMATALA FA'AF'AIOGA MAI E LENEI FUAI'UPU PE MAFAI FA'APEFEA ONA TUMAU I TOTONU O I TATOU AFIOGA A KERISO?

Ona fetalai atu lea o Iesu iā te i latou, E moni, e moni, 'Ou te fai atu iā te outou, afai tou te lē 'a'ai i le tino o le Atali'i o le tagata, a lē inu fo'i i Lona toto, ua lē i totonu ia te outou le ola. Ioane 6:53

MAU E TAU I AI: Salamo 119:11; Galuega 17:11

Su'esu'e le Tusi Pa'ia ia pei o le afioga a le Atua, ma ia taumafa i ōna 'upu moni, o le tino ma le toto lea o le Ālo ole Atua! "Afai tou te lē 'a'ai i le tino o le Atali'i o le tagata, a lē inu fo'i i Lona toto, ua lē i totonu iā te outou le ola. O lē 'ai i Lo'u tino ma inu i Lo'u toto, ua ia te ia le ola e fa'avavau; 'Ou te toe fa'atūina fo'i o ia i le aso gata'aga; auā o Lo'u tino o le mea e 'ai moni lea, o Lo'u toto fo'i o le mea e inu moni lea. O lē 'ai i Lo'u tino ma inu i Lo'u toto, e tumau o ia iā te A'u, o A'u fo'i ia te ia" (Ioane 6:53-56). Ma " O lē tausī fo'i i Āna poloa'iga, o lo'o tumau lea i totonu iā te Ia, o Ia fo'i o i totonu ia te ia; o le mea fo'i lenei ua tatou iloa ai o lo'o tumau o Ia i totonu ia i tatou, auā o le Agaga ua Ia foa'iina mai iā te i tatou" (I Ioane 3:24). FE 385

(3) O LE Ā LE ALA OFOFOGIA O FESO'OTA'IGA UA AUMAIA E LE ATUA INA IA MAFAI ONA TATOU "ŌLE ATU" AI MO FA'ANAUNGA O TATOU LOTO?

O le mea lea 'Ou te fai atu ai iā te outou, o mea uma lava tou te ole mai ai i a outou tatalo, inā fa'atuatua ia o le a maua e outou, ona faia lava lea mo outou. Mareko 11:24

MAU E TAU I AI: Luka 11:9-13; Ioane 14:13; II Nofoa'iga Tupu 7:14; Isaia 55:6

O le tatalo, o le tatalaina atu lea o le loto i le Atua, e pei ona tatalaina atu i se uō. E lē fa’apea tatou te faia lea mea ona ua lē silafia mai e le Atua o tatou loto, a e peita’i ina ia mafai ai e i tatou ona maua o le feso’ota’iga ola ma Ia. E lē aveina ifo le Atua ia i tatou e le tatalo, a e peita’i e ‘aveina a’e ai i tatou iā te Ia. *LSK 102.2 (SC 93)*

Ua sa’ilia e le Ali’i le auala e fa’aali mai ai iā i tatou o lo’o sauni le Atua e fa’afofoga ma tali a tatou talosaga e ala i le fa’aaogāina o se mea ua lauiloa ma e masani ona faia. Ua fetalai o Ia, “O ai fo’i se tagata o outou pe a ole mai lona atali’i se areto, na te avane ea iā te ia se ma’a? A ole mai fo’i se i’a, na te avane ea iā te ia se gata? O lenei, o outou e leaga, afai ua iloa e outou ona avatu o mea lelei mā a outou fanau, e lē sili ea ona foa’iina mai e lo outou Tamā o i le lagi o mea lelei i ē ole atu ai iā te Ia?” (Mataio 7:9-11). Ua ōle mai Keriso iā i tatou e fa’ataui i le finagalo malie o le Atua e fesoasoani mai, e fa’ailoa mai le alofa moni o le mātua i lana fanau. O ai se tamā e mafai ona tuli’ese lona atali’i o lo’o mana’omia se mea e ‘ai? E mafai ea e se tasi ona lē fa’amamaluina le Atua i le manatu o le a Ia lē taliina le vala’au a Lana fanau? Tatou te manatu ea e mafai e se mātua ona fa’atauva’aina sana tama e ala i le si’itia ia maua le tulaga o le mea o lo’o fa’amoemoe i ai a e o le a lē taulau? E i ai ea se tamā e folafola mea’ai lelei i lona atali’i a e mulimuli ane ua ‘ave i ai se ma’a? Pe afai e ‘ave e le tagata e amioleaga mea alofa lelei i lana fanau, e lē sili atu ea la le tele o mea lelei e tu’u mai e lo tatou Tamā o i le lagi iā i latou e ōle atu iā te Ia? O lo’o ta’utino mai le Ali’i iā i latou e talosaga atu iā te Ia o le a tu’uina mai iā i latou le Agaga Pa’ia. *I SM 329*

(4) O LE Ā LE ISI MEA E FA’AOPOPO ATU I LE ŌLEGA E TATAU ONA TATOU FAIA INA IA MAUA AI FA’ANAUNAUGA O O TATOU LOTO?

O le mea lea ‘Ou te fai atu ai iā te outou, o mea uma lava tou te ōle mai ai i a outou tatalo, inā fa’atuatua ia o le a maua e outou, ona faia lava lea mo outou. Mareko 11:24

MAU E TAU I AI: Mataio 21:22; Iakopo 5:15; I Ioane 5:14, 15

O le fa’atuatua moni e u’umauina manuia na folafola mai a o le’i iloa pe lagonaina. E tatau ona si’i a’e a tatou talosaga i le fa’atuatua i totonu o le ‘ie pupuni ma ia fa’atosina lo tatou fa’atuatua ia u’umau i fa’amanuiāga sa folafolaina e ‘avea ma a tatou lava manuia. Ia tatou talitonu ua tatou maua manuia ona o la tatou fa’atuatua, ma e pei ona ta’ua e Lana Afioga, o a tatou mea ia. “O le mea lea ‘Ou te fai atu ai iā te outou, o mea uma lava tou te ōle mai ai i a outou tatalo, inā fa’atuatua ia o le a maua e outou, ona faia lava lea mo outou” (Mareko 11:24). O le fa’atuatua moni lenei, o le talitonu ua tatou maua le manuia, a e tatou te le’i mua’i iloa. Peita’i e to’atele e manatu e tele lo latou fa’atuatua ina ua fa’asoa atu le Agaga Pa’ia ma o le a lē mafai ona i ai se fa’atuatua pe a lē o lagonaina le mana o le Agaga. O se fa’atuatua ofoofogia ua fa’amanuiaina e ala i lea fa’atuatua. O le taimi e mana’omia ia fa’agaoioia ai le fa’atuatua pe a ua lē lagona le fa’atasi ai o le Agaga o le Atua. Pe a foliga mai e na o ao pōuliuli o lo’o ufitia ai le mafaufau, o le taimi lava lea e tatau ona galuea’iina ai le fa’atuatua ola ia ma’ati le pogisā ma fa’asalalau ai ao. O le fa’atuatua moni e fa’alagolago i folafolaga o lo’o i Afioga a le Atua, ma e na o i latou e usiusita’i i Lana Afioga e mafai ona tapa i ōna folafolaga matagofie. “ Afai tou te tumau iā te A’u, a tumau fo’i A’u ‘upu ia te outou, o mea uma lava tou manana’o i ai, tou te ōle atu ai, ona faia lea mo outou” (Ioane 15:7). Ma “O mea uma fo’i tatou te ōle atu ai, e maua mai iā te Ia, auā ua tatou tauti i Āna poloa’iga, tatou te faia fo’i mea e lelei i Ōna luma” (I Ioane 3:22). *EW 72, 73*

Ia lē ona ua tatou va’ai po o le fa’alogo ua fa’afogaina e le Atua i tatou, ona tatou talitonu ai lea. E tatau ona tatou talitonu i Āna folafolaga. Pe a tatou ō mai iā te Ia e ala i le fa’atuatua, o o tatou mana’oga uma lava e o’o atu i le finagalo o le Atua. Pe a tatou ōle atu mo Lana fa’amanuiāga, ia tatou talitonu ua tatou mauaina, ma fa’afetai iā te Ia o lea ua tatou maua. Ona tatou ō atu lea i a tatou galuega, ua mautinoa o le fa’amanuiāga e o’o mai pe a sili ona tatou mana’omiaina. Pe a tatou malamalama i lea tulaga, ona tatou iloa lea e talia a tatou tatalo. O le Atua Na te faia mo i tatou “e fa’asilisili lava i mea tou te ōle atu ai” (Efe. 3:20), “e tusa ma le faula’i o Lona vi’iga” (F. 16), ma “e tusa ma le galuega a Lona mana tele lava” (Efe. 1:19). *DA 200 (LSK 138)*

(5) E FA’APEFEA LE TATAU ONA TATOU TATALO IA MAUA AI TALI MAI LE TAMĀ?

Ia fefa’aalia’i a outou agasala, ma tatalo le tasi mo le tasi, ina ia fa’amalōlōina outou. Ua aogā tele le tatalo fa’atauina a le tagata amiotonu. Iakopo 5:16

MAU E TAU I AI: Ieremia 29:12, 13; Kenese 32:28; Efeso 6:18; Fa’ata’oto 8:17; Hosea 5:15

O le a ‘avea le Atua iā i tatou ma so’o se mea o le a tatou fa’atagaina ia faia e Ia. O a tatou talosaga e faia fa’atauva’a ma le lē loto atoa, o le a aumaia ai se tali lē aogā mai le lagi. Ia tatou tatalo fa’atauānau, i le fa’atuatua, fa’atalitali ma le fa’atuatua, maua i le fa’atuatua, oli’oli i le fa’amoemoe, auā o i latou uma e sa’ili o le a maua lea. Ia fa’amaoni i le matā’upu, ma ia sa’ili le Atua ma le loto atoa. O le tagata e matuā tu’u le agaga atoa ma le fa’amaoni i mea uma fa’alelalolagi na te faia, se’ia o’o ina fa’amanuiaina. O lea ia a’oa’o ma le fa’amaoni ia agava’a e sa’ili fa’amanuiāga tautele ua folafola mai e le Atua, pe a taumafai ma le naunauta’i o le a e maua Lona malamalama ma Lana ‘upu moni ma Lona alofa tunoa ofoofogia. *OHC 131*

Ma le fa’amaoni, ma le agaga ua matelaina, ia tagi atu i le Atua. Ia fai tauiviga ma sui fa’alelagi se’ia e maua le manumalō. Ia e tu’u atu ‘oe atoa i ‘a’ao o le Ali’i, tino, loto, ma le agaga, ma ia filifili e ‘avea ‘oe o Lana sui e alofa ma fa’amaoni, e usita’i i Lona finagalo, pulea e Lana silafaga, e fa’atumulia e Lona Agaga. *OHC 131*

(6) O LE Ā LE ITU’AIGA TATALO E FAIA I ASO TA’ITASI E SILI ONA TĀUA I LE MAFUTAGA MA KERISO?

A o ‘oe, pe a e tatalo, ina ūlu atu ia i lou afeafe, ma pupuni lona puipui, i le e tatalo ai i lou Tamā o i le mea lilo; o lou Tamā fo’i o Lē silasila i le mea lilo, na te avatu fa’aaliali se tau i iā te ‘oe. Mataio 6:6

MAU E TAU I AI: Mataio 14:23; Luka 6:12; 5:16

E matuā tāua le tatalo fa’alilolilo - o le feso’ota’iga a le loto ma le Atua! E na o le Atua fa’afofoga-tatalo etatau ona fa’afofogaina le tatalo e faia fa’alilolilo. Ia lē so’o se taliga e fa’alogo i talosaga e si’i a’e. O le agaga e si’i filemū a’e ma le fa’atauānau iā te Ia o i le mea lilo o le a lagona Lona mafuta ai, o Ia Lē e fa’afofoga i le tatalo e si’i a’e mai le loto. O lē e feso’ota’i ma le Atua e ala i le fa’atuatua o le a maua e ia ‘ave o le malamalama fa’alelagi e fa’amalosia ma fa’atumauiina ai o ia i taimi o fete’ena’iga ma Satani. *TMK 272.4*

E i ai lava taimi mo talosaga fa’aiga ma talosaga faitele; peita’i o le feso’ota’iga fa’alilolilo ma le Atua e fa’amalosia ai le olaola lelei o le agaga. O luga o le mauga ma le Atua na iloa ai e Mose le fa’ata’otoga o le fale ofoofogia sa ‘avea ma mafutaga o Lona mamalu. O lel mauga lea - le nofoāga lilo e feso’ota’i ai - e tatau ona tatou mafaufau lelei ai i Lona finagalo mo le aigā tagata. O lea o le a tatou mafai ona tatou gaosia a tatou amio ina ia fa’ataunu’uina ai le folafolaga, “‘Ou te nofo i totonu iā te i latou, ‘Ou te savali fo’i i totonu iā te i latou; e fai A’u mo latou Atua, e fai fo’i i latou Mo’u tagata” (II Korinito 6:16). *GW 254.1*

(7) O LE Ā SE TAIMI LELEI E TATALO AI INA IA FA’AVAE LAU SO’OTAGA TUMAU MA KERISO I ASO TA’ITASI?

Ieova e, e fa’afofogaina e ‘Oe lo’u leo i le taeao; o le taeao ‘ou te sauni atu ai la’u tatalo iā te ‘Oe, ma ‘ou va’ava’ai. Salamo 5:3

MAU E TAU I AI: Salamo 63:1; 90:14; Isaia 26:9; Iopu 1:5

O le ulua’i manāvāga a le agaga i le taeao ia tatau ona faia mo le fa’atasi mai o Iesu. Ua fetalai o Ia, “E lē mafaia e outou ona fai o se mea e tasi pe a A’u lē i ai” (Ioane 15:5). E tatou te mana’omia Iesu; o Lona malamalama, Lona soifuāga, Lona Agaga, e tatau ona tasi ma i tatou i taimi uma lava. Tatou te mana’omia o Ia i itulā uma lava. Ma e tatau ona tatou tatalo i taeao, a o fa’asusulu mai le lā i le lafanua ma fa’atumulia le lalolagi i le malamalama, fa’apea ona fa’asusuluina le Lā o le Amiotonu i vaega uma o le loto ma le mafaufau, ma ia ‘avea ai tatou uma ma malamalama mo le Ali’i. E lē mafai e tatou ona faia se mea e tasi pe a lē o fa’atasi ai o Ia. E iloa e le fili pe a tatou taumafai se mea a e aunoa ma le Ali’i, ma o le a ia sauni e fa’atumulia o tatou mafaufau i ōna manatunatuga leaga ina ia tatou pa’u’ū ‘ese ai; peita’i e fa’anaunau le Atua ia tatou mafuta iā te Ia i taimi ta’itasi, ma ia ato’atoa ai loa ma Ia. *ML 15*

Ia e fa’apa’iaina ‘oe mo le Atua i le taeao; ia ‘avea lenā ma āu galuega muamua lava. Ia fa’apenei lau tatalo: “Le Atua e, ia avatua a’u mo ‘Oe ato’atoa. ‘Ou te fa’ata’atiaina mea uma ua ‘ou mafaufauina i Ōu a’ao. Ia E fa’aaogāina a’u i le aso nei mo Āu fe’au. Ia ta mafuta ma ‘Oe, ma ia ta galulue fa’atasi ma ‘Oe i fe’au uma ‘ou te faia.” Ia e faia lenei mea i aso

uma lava. O taeao uma ia e fa'apa'iaina ai 'oe mo le Atua e tusa ma ōu la'asaga i lenā aso. Ia e tu'uina atu iā te Ia mea uma ua e mafaufauina, ina ia fa'ataunu'uina po o le lē fa'ataunu'uina fo'i e tusa ma Lona finagalo o le a fa'ailoa mai. I le a o fa'apea i aso ta'itasi ona e tu'uina atu o lou ola i Ōna a'ao, o le a tauau pea ina foliga ai lou olaga i le soifuāga o Keriso. SC 70.1 (LSK 77.1)

(8) PE AFAI O LE A TATOU MAFUTA PEA, E FA'AFIA ONA TATOU FA'AFESO'OTA'I ATU MA LE LAGI?

A o i matou, matou te finafinau i le talotaloga ma le au'auna i le 'upu. Galuega 6:4

MAU E TAU I AI: I Tesalonia 5:17; Luka 18:1; Tanielu 6:10; Kolose 4:2

Ia tatalo e lē aunoa i lou Tamā o i le lagi. O le tele o le taimi e te fa'aogā e tatalo ai, o le a tosina latalata ai lou agaga ia e lata atu fa'aleagaga i le Atua. O le a faufautua le Agaga Pa'ia mo lē o lo'o fai talosaga fa'amaoni e lē o fa'aleoina, ma o le a gaua'i atu le loto ua fa'amalūina e le alofa o le Atua. O ao pogisā o lo'o tu'uina mai e Satani e si'omia ai le agaga o le a fa'ate'a'ese e 'ave o le Lā o le Amiotonu, ma o le a fa'asusuluina vaega uma o le mafaufau ma le loto e le malamalama o le lagi. HP 89.1

Ia e tatalo i lou afeafe, ma ia fai ma au masaniga le si'itia a'e pea o lou loto i le Atua a o e fealua'i i au fe'au i aso ta'itasi. O le amio fa'apea na feōa'i ai Enoka ma le Atua. O le si'itia a'e fa'apea o o tatou loto i le tatalo e aunoa ma se leo, a e alu a'e lava i luma o le nofoāli'i o le alofa tunoa e pei o le asu o mea manogi ua fa'amūina i luga o le fata faitaulaga. E lē mafai ona manumalō mai o Satani i lē ua fa'apea ona mafuta ma le Atua. SC 98.3 (LSK 110.1)

E leai se itulā po o se mea e fa'apea ua lē tatau ona fai ai o se talosaga i le Atua. E leai se mea na te mafai ona vavaoina o le agaga moni o talosaga e si'itia a'e ai o tatou loto. E mafai lava e i tatou ona si'itia a'e pea o se talosaga i le Atua i totonu o se motu o tagata i le ala tele, po o totonu fo'i o galuega, ma tatou ole atu ai ina ia tatou maua le ta'ita'iga fa'alelagi, e pei ona sa faia e Ne'emias ina o fa'ailoa atu e ia lona mana'o i luma o le tupu o Aretaseta. [javascript:void\(0\)](#) I so'o se mea lava tatou te i ai, o le a mafai lava ona tatou maua ai o se afeafe po o se mea tu'ufua tatou te fa'afeso'ota'i ai ma le Atua. E tatau lava ona tatalaina pea puipui o o tatou loto, ma tatou vala'au atu pea iā Iesu ina ia afio mai o Ia e mafuta ma i tatou, o Ia o le malō fa'alelagi i o tatou agaga. SC 99 (LSK 110.2)

(9) O LE Ā LE ULUA'I TULAGA O LE TATALO UA TALIINA?

O lenei fo'i le fa'amalosia ua tatou maua i Ōna luma, pe afai tatou te ōle atu ai se mea e tusa ma Lona finagalo, e fa'afofoga mai o Ia ia te i tatou. Afai fo'i ua tatou iloa, e fa'afofoga mai o Ia iā te i tatou e se mea tatou te fa'atoga atu ai, ua tatou iloa e maua e i tatou mea tatou te fa'atoga atu ai iā te Ia. I Ioane 5:14, 15

MAU E TAU I AI: Mataio 26:39; 7:21; Ioane 4:34; Mareko 11:25; Salamo 66:18; Fa'ata'oto 28:9; Iakopo 4:3

O le ala e talafeagai pea o le tu'u atu lea o a tatou fa'anaunauga i lo tatou Tamā fa'alelagi, ma fa'apea ona tatou talitonu ato'atoa iā te Ia. Ua tatou iloa e fa'afofoga mai le Atua iā i tatou pe a tatou tatalo e tusai ma Lona finagalo. E lē o se mea sa'o le avatu o a tatou talosaga a e lē o gaua'i atu i ai ma le agaga; e tatau ona tatou tatalo fa'atauānuu, a e lē o le fa'atonu atu. MH 230.2

E tau afe tatalo o lo'o tu'u a'e i aaso ta'itasi a e lē o taliina e le Atua. E i ai tatalo e faia e aunoa ma se fa'atuatua. "A leai fo'i se fa'atuatua e lē mafai ona fiasia mai o Ia; auā e tatau i lē alu atu i le Atua ona talitonu o lo'o soifua o Ia, o Ia fo'i na te tauia mai o ē matuā sa'ili iā te Ia" (Eperu 11:6). E i ai tatalo e faia i le loto fa'apito, mai le agaga e teuloto tupua e lē aogā.... E i ai tatalo e faia fa'avavevave ma le popolevavevave, e tau musumusua ona o avega ma gaogaosā o le olaga, a e lē o le sa'ili atu ma le loto maulalo le alofa tunoa ina ia fa'amāmā ai ia mea uma. O i latou uma e tu'u atu ia talosaga, e lē o mafuta ma Keriso, ma e le'i gaua'i atu o latou loto i le finagalo o le Atua. E lē o talafeagai i latou ma le tulaga o le folafolaga, ma e le'i fa'ataunu'uina iā i latou. OHC 147.3

O i latou o ē tumau iā Iesu e iā i latou le mautinoāga o le a fa'afofoga mai le Atua i a latou talosaga, ona e fiasia i latou e fai Lona finagalo. Latou te lē faia nei tatalo u'umi, peita'i e ō mai i le Atua ma le loto maulalo ma le fa'amaoni e pei o le

tamaitiiti i lona tamā alofa, ma sasa’a atu le tala’aga o a latou puapuagā ma agasala ma mea e fefefe ai, ma tu’u atu, i le suafa o Iesu, o latou mana’oga; e o ‘ese mai iā te Ia ua fa’afiafiaina ina ua mautinoa o le alofa tunoa e magalo ai pea. *OHC 147.4*

(10) PE A TATOU TATALO MA LE FA’ATUATUA, O LE Ā LE FOLAFOLAGA OFOFOGIA E MAFAI ONA TATOU TAPA I AI?

O le mea lea ‘Ou te fai atu ai iā te outou, o mea uma lava tou te ole mai ai i a outou tatalo, inā fa’atuatua ia o le a maua e outou, ona faia lava lea mo outou. Mareko 11:24

MAU E TAU I AI: Mataio 7:7-11; Ioane 16:23, 24; I Ioane 5:14, 15; Iakopo 1:1

O le tagata pa’ia e alu atu i le Atua ma le loto fa’amaoni, ma tu’u atu i le fa’atuatua lana talosaga iā te Ia, o le a talia lana tatalo. O le a lē tu’ulafoa’i e lou fa’atuatua folafolaga a le Atua, pe a lē va’ai pe lagona ua talia vave au tatalo i lea lava taimi. Ia e lē fefe e talitonu ato’atoa i le Atua. Ia e fa’alagolago i Lana folafolaga, “Inā ole atu ia, ona outou maua ai lea” (Ioane 16:24). O le Atua e lē fai mea sesē, e lelei o Ia ma e na te lē taofia se mea lelei mai Lana ‘au pa’ia. E fai mea lē le tagata, ma e ui ina tatalo o ia mai se loto fa’amaoni, e lē tatalo ia i taimi uma mo mea e lelei mo ia lava, pe tatalo ia vi’ia i le Atua. Pe a faia fa’apea, o le a fa’afofoga mai la tatou Tamā agalelei ma tali i a tatou talosaga; peita’i e Na te aumai iā i tatou mea mo lo tatou lelei ma Lona lava mamalu. E tu’u mai e le Atua iā i tatou fa’amanuiāga; pe ana mafai ona tatou va’ai i Lana fuafuāga, atonu tatou te iloa manino ai e silafia e Ia mea e sili mo i tatou ma o lo’o Ia tali mai a tatou tatalo. E lē o tu’u mai se mea e fa’atigāina ai i tatou, peita’i o manuia tatou te mana’omia, e sui ai se mea e lē lelei mo tatou. *I T 120*

Ua ‘ou iloa o le Afioga a Keriso e fa’amalamalamaina ma fa’amalosia ai le mafau fau. ‘Ou te naunau ia ‘ou faia se filifiliga lelei e mulimuli ai i Lana Afioga ma usita’i atoa i ai e ala i le mana o le Agaga Pa’ia.

Li’o le Tali:	Ioe	Lē Mautonu
----------------------	------------	-------------------

‘Ou te fa’afetai mo le meaalofa ma le avanoa e tatalo ai ma va’aia le tāua o le feso’ota’i pea ma Keriso.

Li’o le Tali:	Ioe	Lē Mautonu
----------------------	------------	-------------------

Ua ‘ou filifili e talitonu i le folafolaga a le Atua e fa’apea, pe a ‘ou tatalo e tatau ma Lona finagalo, o le a ‘ou maua le mea na ‘ou talosagaina.

Li’o le Tali:	Ioe	Lē Mautonu
----------------------	------------	-------------------

‘Ou te iloa o le fa’atuatua o le mea e matuā mana’omia ina ia mafai ai ona ‘ou u’umau ma tapa atu i fa’amanuiāga a le Atua na folafola mai.

Li’o le Tali:	Ioe	Lē Mautonu
----------------------	------------	-------------------

Ua ‘ou filifili e tatala atu lo’u loto i le Atua i le tatalo i aso ta’itasi, ma minute ta’itasi ina ia mafai ai e Ia ona fa’aulufale mai Lona finagalo pa’ia i totonu o lo’u loto ma lo’u olaga.

Li’o le Tali:	Ioe	Lē Mautonu
----------------------	------------	-------------------

‘Ou te talitonu e silafia e le Atua le mea e sili mo a’u. E maoa’e Lona poto e lē mafai ona i ai se sesē, ma e sili le lelei e Na te lē taofia so’o se mea a e aogā mo a’u, o lea ‘ou te tu’u ai i Ōna a’ao tali o a’u tatalo.

Li’o le Tali:	Ioe	Lē Mautonu
----------------------	------------	-------------------

MANATU FA'AOPOOPO	TATALO MANA'OMIA	TALI O TATALO

Fua e Fa'amamaluina ai le Atua

Lesona 8

O lenei lesona e fa'avae i le Ioane 15:8.

(1) E FA'APEFEA ONA TATOU FA'AMAMALUINA LE TAMĀ A O FAI I TATOU MA ŌNA SO'O?

E vi'ia Lo'u Tamā i lenei mea, pe a outou fua tele mai; ona fai ai lea outou Mo'u so'o. Ioane 15:8

MAU E TAU I AI: Salamo 92:12-14; Isaia 60:21; 61:3; Mataio 5:16

O le lalā vine e fafaga mai e le la'au ola, e olaola malosi ma e fua lelei mai. O ōna fuga manogi e ta'u mai ai o lo'o lelei le so'otaga ma le vine ola. E fa'apea le Kerisiano o lo'o mafuta iā Iesu; o le a fua mai fua lelei. I le olaga ma amio o le a fa'aalitino mai ai, e pei o le fuifui ola lelei o le vine, uiga tāua o le Agaga - o le alofa, o le oli'oli, o le filemū, o le onosa'i, o le mataalofa, o le agalelei, o le fa'amaoni, o le agamalū, ma le lē gaoiā (Kalatia 5:22).... *OHC 145.4*

O le mamalu o le a maua e le faifa'ato'aga pe a fua lelei mai āna la'au. E fa'apea le mamalu e o'o i le Atua pe a fa'aalia Lona fa'atusa i olaga o Ōna so'o. Ua ta'u mai e Satani o mana'oga a le Atua e matuā faigatā, ma e lē mafai e tagata ona 'ausia le tumutumu o le ato'atoa fa'a-Kerisiano. O lea o le a fa'amautūina le uiga o le Atua pe a fai ma soa le tagata, e ala i le alofa tunoa, i le uiga moni fa'a-Atua.

A fa'aalitino uiga lelei fa'a-Kerisiano e fa'amaonia ai le so'o moni. A leai se feso'ota'iga tāua ma Keriso o le a lē mafai ona fua mai fua o le amiotonu. *5 BC 1043*

(2) O LE Ā LA TATOU VAEGA E FA'ATO'ILALOINA AI LE AGASALA, INA IA TATOU FUA MAI AI FUA E FA'AMAMALUINA AI LE ATUA?

A ia outou o'ofu i le Ali'i o Iesu Keriso; 'aua fo'i le sauniuni mo le tino, e o'o ai ona tu'inanau. Roma 13:14

MAU E TAU I AI: Iakopo 4:7; Luka 9:23; Roma 6:11; Filipi 2:5; Kolose 3:1, 2; 2:6; Kalatia 5:16, 17

E tatau ona fa'afetaui ma tete'e fa'aosoosoga uma. O lo'o alu alu pea lenei taua fa'aleagaga i aso ta'itasi. Ia tatou galulue pea i aso ta'itasi mo lo tatou fa'aolataga ma le fefe ma le mata'u. E galue le Atua iā i tatou e faia Lona finagalo mo Lona lelei. E tatau i agaga uma ona taumafai ma le filigā atoa e fa'aopoopo atu ai i mea e maua fa'aleagaga, e fa'amalosia le alofa tunoa, ma ia tupu atili ai le aogā ma le mamalu, e pei o le la'au e fua lelei i le fa'ato'aga a le Ali'i. Ia lē pei o se la'au ua mamae pe lē fua mai i le malamalama o le Ali'i Fa'aola o Iesu Keriso. O le talitonuga moni e ta'ita'iina ai e totō ia ola lelei meaalofa e avea ai le tagata ia sili le tāua i le silafaga a le Atua i lo o le auro o Ofeira.

E telē le uiga o le "filigā atoatoa." O le uiga ia filigā i aso ta'itasi. E i ai le faigatā pe a ua fa'atauasoina i tatou e fa'atatau i galuega a sui fa'a-satani, ma atonu o le a fa'amaileiina ai e ala i fa'aosoosoga ofoofogia a Satani. O lea ua aumai ai iā i tatou ia 'upu, "Ia atili ai ona fa'amalolosi outou," ma fa'aopoopo ai i lau amio uiga lelei e fa'amalosia ai oe e tete'e ai le leaga. "A lē filigā i nei mea, o ia lea ua fa'atauasoina ma e lē mafai ona va'ai mamao atu." E na te lē iloa o ia e mativa fa'aleagaga (II Peteru 1:10, 11). *Letter 144, 1903*

(3) O AI LE POGAI TONU PE A MANUMALŌ I LE AGASALA MA FUA MAI AI FUA O LE AMIOTONU I O TATOU OLAGA?

A o le Atua e Ōna le manuia, o Lē na toe fa'atūina mai nai ē ua oti le Leoleo mamoe sili, o lo tatou Ali'i o Iesu, ona o le toto o le feagaiga e fa'avavau, ia fa'aato'atoaina outou e Ia i galuega lelei uma lava, ina ia outou faia Lona finagalo, ia galue o Ia i totonu iā te outou le mea e mālīe i Ōna luma, ona o Iesu Keriso; ia iā te Ia le vi'iga e fa'avavau fa'avavau lava. Eperu 13:20, 21

MAU E TAU I AI: Ioane 15:5; Filipi 2:13; 1:6; Eperu 13:20, 21; I Peteru 5:10; I Tesalonia 5:23, 24

O i latou uma ua talia Keriso e 'avea ma Ali'i Fa'aola, e ao na fa'aalia i o latou olaga le moni o le talalelei iā Iesu atoa ai ma Lona mana lavea'i. Auā e lē faia fua e le Atua ni mana'oga e aunoa ma ni taunu'uga lelei. O mea uma e finagalo i ai o Ia, tatou te mafaia i le alofa tunoa o Keriso. O tamā'o'aiga uma o i le lagi, e tatau ona fa'aailoa atu e ala i olaga o tagata ua iloa ma talitonu i le Atua. "E vi'ia Lo'u Tamā i lenei mea, pe a outou fua tele mai; ona fai ai lea o outou Mo'u so'o" (Ioane 15:8). COL 301.2 (AFFK 121)

E to'atele ua manatu e tatau ona faia e latou lava ia se vaega o lenei galuega. Ua latou talitonu e fa'amagaloina e Keriso agasala, peita'i o nei ua latou sa'ili e taumafai e latou te fa'asa'o o latou lava olaga. Peita'i e lē mafai ona manuia ia taumafaiga uma, ona ua fetalai Iesu, "E lē mafaia e outou ona fai o se mea e tasi pe a A'u lē i ai" (Ioane 15:5). O lo tatou tuputupu a'e i le alofa tunoa, lo tatou fiafia, lo tatou aogā, - o nei mea uma e fa'alagolago i le tatou feso'ota'iga ma Keriso. E ala i le tatou so'otaga ma Ia i aso ta'itasi ma itulā uma, - e ala i le mafutaga ma Ia - o le a tatou tupu a'e ai i le alofa tunoa. O Ia o le amataga ma le fa'ataunu'uga o lo tatou fa'atuatuga. O Keriso e muamua ma e mulimuli i mea uma. O Ia e i ai ma i tatou, e lē na o i le amataga ma le fa'ai'uga o a tatou fa'agaoioiga uma, a e fa'atasi ai i o tatou ala uma. Ua fa'apea mai Tavita, "'Ou te tu'u Ieova i o'u luma e lē aunoa; auā o i lo'u itū taumatau o Ia, e lē fa'agae'etia ai lava a'u" (Salamo 16:8). AG 293

Na fetalai Keriso, "E lē mafaia e outou ona fai o se mea e tasi pe a A'u lē i ai" (Ioane 15:5); peita'i pe a tatou galuea'iina a tatou taumafaiga e ala i Lona alofa tunoa, e mafai ona tatou faia mea uma. O le a fa'aosofia le amio i le onosa'i ma le agamalū, ma fa'atumulia e le pupula e susulu mai ma fa'amanino ai le ala i le lagi. Pe a tatou vā'ai ma fa'ata'ita'i i Lona soifuāga o le a fa'afouina ai i tatou ia pei o Lona fa'atusa. O le a susulu le mamalu o le lagi i o tatou olaga ma fa'aātaina i olaga o isi. E tatou te maua le fesoasoani o lo'o tatou mana'omia e mafai ai ona tatou ola fa'apea, i le nofoāli'i o le alofa tunoa. O le ola ua fa'apa'iaina moni lenei, ma e mata o le ā se tasi tulaga fa'aeaina e mafai ona naunau i ai tagata ola i lo o le feso'ota'iga ma Keriso e pei o le lalā o lo'o so'ofa'atasi ma le vine? 5 T 306

(4) PE A FA'AUMATIA LE MANATU FA'APITO MO TATOU LAVA IA, E FA'APEFEA LOA ONA MAFUTA MAI KERISO I TOTONU O TATOU?

O le mea lava lenei ua tatou iloa ai ua tumau i tatou i totonu iā te Ia, o Ia fo'i i totonu iā i tatou, auā o Lona Agaga ua Ia foa'iina mai iā te i tatou. I Ioane 4:13

MAU E TAU I AI: I Ioane 3:24; Roma 8:9, 11; I Korinito 3:16

Pe a ua fa'agaogaoina 'oe mai iā 'oe lava, pe a ua tu'u'ese atua pepelo uma o lo'o i le agaga, o le a fa'atumulia lea gaogao e le mafuta mai o le Agaga o Keriso. O le tagata lea e i ai le fa'atuatua e fa'amamāina ai le loto mai mea leaga. Ua faia mea e tusai ma le Agaga, ma e usiusita'i ia i mea o le Agaga. E lē fa'alagolago iā te ia lava, a e o Keriso i so'o se mea. E talia ma le fa'amaulalo 'upu moni o lo'o fa'aalia mai pea, ma e tu'u atu i le Ali'i mamalu uma, e fa'apea, "A ua fa'aalia mai ia mea e le Atua iā te i matou e Lona Agaga" (I Korinito 2:10). Ma "A ua maua e i matou e lē o le agaga o lenei lalolagi, a o le agaga mai le Atua, ina ia matou iloa mea ua foa'ifuaina mai e le Atua iā te i matou" (F. 12). GW 287

(5) A O FA'AAUAU ONA TATOU SAVAVALI PEA I LE AGAGA, O LE A FA'APEFEA ONA AFĀINA AI O TATOU OLAGA O ASO TA'ITASI?

'Ou te fai atu, ia outou savavali i la le Agaga, ona lē faia lea e outou o le tu'inanau o le tino. Kalatia 5:16

MAU E TAU I AI: Kalatia 5:25; 6:8; Roma 8:1-14

E galue Iesu e ala i le Agaga Pa'ia; ona o Ia o Lona sui. E Na te fa'atumulia le ola fa'aleagaga i totonu o le agaga, fa'aaogā ai le malosi mo le lelei, e fa'amamā ai mai mea leaga, ma fa'aleleia ai mo Lona malō. E tele fa'amanuiāga e maua mai iā Iesu, meaalofo tautele e tufa atu i tagata uma. O Ia o le Fautua ofoofogia, e lē gata le potu ma le malosi; pe afai o le a tatou fa'ailoa atu le mana o Lona Agaga, ma gaua'i atu ina ia gaosia ai, o le a tatou tūtūlala'i atoatoa iā te Ia. Oi se manatu a manaia! Iā Keriso, “o lo'o mau i totonu iā te Ia le tumu uma lava o le itū Atua ua i Lona tino; o lo'o ua fa'aato'atoaina fo'i outou iā te Ia” (Kolose 2:9, 10). E matuā lē mafai ona iloa i le loto o le tagata le fiafia se'iloga ua gaua'i atu ia gaosia e le Agaga o le Atua. O le Agaga e suia le loto ua fa'afouina e pei o le fa'aa'oa'o, o Iesu Keriso lea. E ala i le pule a le Agaga Pa'ia, o le a suia i le fa'atuatua ma le alofa le faitana'i e tete'e ai i le Atua, ma le mimitavale e suia i le loto maulalo. E iloa e le agaga le matagofie o le 'upu moni, ma e fa'amamaluina Keriso i le silisili 'ese ma le ato'atoa o le amio. A o o'o mai nei suiga, o le a fai pesega aagelu ma o se oli'olisaga i le Atua ma Keriso ona o agaga na gaosia i le fa'atusa o le Atua. AG 196

(6) O LE Ā LE MEA UA VALA'AUINA I TATOU E FAIA I A TATOU GALUEGA MA FA'AGAOIOIGA O ASO TA'ITASI?

Le 'au uso e, ia ta'ito'atasi ma nofo pea i luma o le Atua i le mea na vala'auina ai o ia. I Korinito 7:24

MAU E TAU I AI: Fa'ata'oto 11:20; 11:1; Filipi 2:3; Mataio 22:37-39

O lālā-vine e fafagaina mai le la'au matua, o le a ola lelei ma fua mai. O ōna fua lelei ma le matagofie e fa'aali mai i le feso'ota'iga ma le vine ola. E fa'apea le Kerisiano e mafuta iā Iesu, o le a fua lelei mai. O le amio ma le olaga o le a fa'atino mai ai, e pei o fua o le vine, o mea tāua ia o le Agaga - o le alofa, o le oli'oli, o le filemū, o le onosa'i, o le mataalofo, o le agalelei, o le fa'amaoni, o le agamalū, ma le lē gaoiā... (Kalatia 5:22, 23). OHC 145

Ua fa'apea mai le aposetolo, “Ia ta'ito'atasi ma nofo pea i luma o le Atua i le mea na vala'auina ai o ia” [javascript:void\(0\)](#) (I Korinito 7:24). E mafaia e se tasi o lo'o galue i se faiva, po o se ali'i fai 'olua, ona faia o lana galuega i se ala o le a vi'ia ai lona Matai ona o lona fai mea fa'amaoni. Pe afai o ia o se so'o moni o Keriso, o le a na tau'aveina le uiga o le fa'atuatuāga ua ia te ia i mea uma na te faia, ma o le a ia fa'aali atu i tagata uma le agaga moni o Keriso. E mafai e lē o lo'o galue i le faiva fa'a-enesinia ona 'avea ma sui ma'elegā ma le fa'amaoni o Lē sa galue i le faiva maulalo i atu mauga iti o Kalilaia. So'o se tasi na te ta'uina le suafa o Keriso, ua tatau lava ona fa'apea ona ia galue ina ia iloa atu e nisi le lelei o ana galuega, ma ia ta'ita'iina atu ai i latou ia vivi'i atu i Lē na faia i tatou ma lo tatou Fa'aola. SC 82 (LSK 90)

(7) A O MAFUTA KERISO IĀ I TATOU MA SUIA AI A TATOU AMIO, O LE Ā LE MEA O LE A TATOU FA'AILOA ATU?

A o outou o le tupulaga ua filifilia outou, o le tupu ma ositaulaga, o le nu'u pa'ia, ma le nu'u na fa'atauina mai, ina ia outou ta'uta'u atu ona lelei na Ia vala'au iā te outou nai le pouliuli e o'o i Lona lava malamalama e matuā ofo ai. I Peteru 2:9

MAU E TAU I AI: Eperu 13:15; Efeso 5:12; Isaia 61:3; 43:21

Na faia tulafono o mea na foafoaina ina ia fa'alototele ma fa'amalosia ai o tatou mafaufau ma lagona a o tatou fa'aaogā e tautala atu ai. A o fa'aaogāina 'upu e ta'u atu ai mafaufauga, a e moni lava fo'i o manatu e mulimuli atu i 'upu. Pe ana mafai ona tatou fa'ailoa malosi atu lo tatou fa'atuatua, ma ia fiafia e sili atu ona o fa'amanuiāga tatou te iloa o lo'o iā i tatou, - o le tele o le alofa tunoa ma le alofa o le Atua, - e tatau ai iā i tatou ona sili atu le tele o le fa'atuatua ma fa'ateteleina le fiafia. E lē mafa'amatalaina i ni 'upu, e lē mafai ona malamalama i ai le mafaufau o le tagata fa'atauva'a, i fa'amanuiāga e maua mai le loto fa'afetai ona o le agalelei ma le alofa o le Atua. E o'o lava i lenei lalolagi e mafai ona

tatou maua le fiafia e pei o se punāvai, e lē mafai ona mate, ona o lo’o fafagaina e alavai e tafe mai le nofoāli’i o le Atua. *MH 251*

“ Ia pule fo’i le filemū mai le Atua i o outou loto;... ma ia outou saga fa’afetai” (Kolose 3:15). Ia fa’agalo o outou faigatā ma puapuagā, a ia tatou vi’ia le Atua mo le avanoa tatou te ola ai e fa’amamaluina Lona suafoa. Ia ‘avea fa’amanuiāga o aso fou ta’itasi e aumaia vi’iga i o tatou loto ma nei fa’ailoga o Lana tausiga alofa. Pe a fa’amatala mai ou mata i le taeao, ia fa’afetaia le Atua mo Lana tausiga iā te ‘oe i le pō. Fa’afetai mo Lana filemū i totonu o lou loto. Ia avea le fa’afetai o se fafua sausu manogi e alu a’e i le lagi i le taeao, aoauli, ma le pō. *MH 253*

O le tatou ta’uta’u atu o Lona fa’amaoni e fai ma sui filifilia a le Lagi ma e fa’aali atu ai Keriso i le lalolagi. E tatau ona tatou fa’ailoa Lona alofa tunoa e epi ona fa’aali mai e tagata pa’ia o aso anamua; peita’i o le mea sili ona aogā o la tatou molimau lea mai a tatou fa’agaoioiga. O tatou o molimau mo le Atua pe a tatou fa’aali iā i tatou le galuega a le mana e mai le Atua. E matuā ‘ese’ese lava olaga o tagata ta’ito’atasi uma, ma e ‘ese’ese le galuea’iina o tagata ta’ito’atasi. E fa’anaunau le Atua ina ia ‘ese’ese a tatou vi’iga e ave a’e iā te Ia, e i ai le fa’ailoga a le tagata to’atasi lava ia. O nei vi’iga i le mamalu o Lona alofa tunoa, pe a tu’uina mai i se ola e pei o Keriso, o le a i ai le mana e galue ai mo le fa’asaoina o agaga. *MH 100*

(8) O LE Ā LE MEA O LE A FA’AMAONIA AI O LO’O TATOU MAFUTA MA LE ATUA MA O LE A FA’AMAMALUINA AI O IA?

Ia fa’aapea ona pupula atu lo outou malamalama i luma o tagata, ina ia latou iloa la outou amio lelei, latou te vivi’i atu ai i lo outou Tamā o i le lagi. Mataio 5:16

MAU E TAU I AI: Isaia 58:8; Efeso 2:10; I Timoteo 5:25; Tito 3:8, 14

O i latou uma o ē talitonu o Keriso lo latou Fa’aola ua fusi atu i le Atua ina ia mamā ma pa’ia, ia faia ma se e galue fa’aleagaga, e sa’ili e fa’asao ē ua lē iloa, tusa pe maua luga pe maua lalo, o le mau’oa po o le mativa, o le pagotā po o le sa’oloto. O le galuega e aupito tāua i le lalolagi o le sa’ili lea ma fa’asao iā i latou o lo’o lē iloa, o ē na togiolaina e Keriso i le tau o Lona lava toto. E tatau i tagata uma ona fai lea galuega.... O mamoe e lē o sa’ilia o le a lē aumaia i latou i le pā o lafu mamoe. *LHU 354*

(9) E FA’APEFEA ONA FA’ATINOINA I GAOIOIGA I O TATOU OLAGA LO TATOU ALOFA MA LE LOTO FA’AFETAI I LE ATUA?

Tou te lē iloa ea, o lo outou tino o le malumalu lea o le Agaga Pa’ia ua i totonu iā te outou, o lo’o ua iā te outou mai le Atua, e lē aiā fo’i outou iā te outou? Auā ua fa’atauina outou i le tau; o lenei, ia outou vivi’i atu i le Atua i o outou tino ma ou outou agaga, o mea a le Atua ia. I Korinito 6:19, 20

MAU E TAU I AI: I Korinito 10:31; Roma 12:1, 2; 6:19

Ua fa’atauina tagata uma lava i lenei tau e lē gata. Ina ua sasa’a ifo i lenei lalolagi le fale teu’oa atoa a le lagi, ma ua tu’u mo i tatou e ala iā Keriso le atoa o le lagi, ua fa’atauina e le Atua le loto, o lagona, o le mafaufoa, le agaga o tagata ola uma. Po o tagata talitonu pe o ē lē talitonu, o tagata uma e ā le Ali’i ia. *AG 173*

O i tatou e ā le Atua ia, e ala i le foafoāga ma na togiolaina. E lē pule tatou i o tatou lava tino, e fai i ai so’o se mea, e fa’aleagaina e a tatou masaniga e i’u ai ina le pala vave, ma lē mafai ai ona galue atoatoa ma le fa’amaoni mo le Atua. E pule Ia i o tatou ola ma itūtino uma, e atoa ai le tomai. O lo’o tausia i tatou e Ia i taimi uma; o a tatou gaoioiga uma e olaola lelei pea i Lana tausiga; pe a tu’ulafoa’i tatou mo sina taimi e tasi, o le a tatou oti loa. O tatou e matuā fa’alagolago i le Atua mo mea uma. *AG 173.3*

E tatau ona tatou maua se lesona tāua pe afai tatou te malamalama i la tatou vā feāloa’i ma le Atua, ma Lona vā ma i tatou. O nei ‘upu, “E le aiā fo’i outou ia te outou; Auā ua fa’atauina outou i le tau” (I Korinito 6:19, 20), e tatau ona tautau i fale o mea fa’amanatu ina ia tatou iloa ai pea le pule a le Atua i a tatou taleni, o tatou mea totino, o tatou aiā, ma tatou uma ta’ito’atasi. E tatau ona tatou iloa tagolima i nei meaalofo a le Atua, i le mafaufau, le agaga, le tino, ona o tatou sa fa’atauina i se tautele e Keriso, ina ia tatou galulue ma le fa’amaoni, ma le soifua maloloina mo Ia. AG 173.4

‘Ou te alofa i le Atua le Tamā ma Iesu le Ālo i lo’i loto atoa ma o la’u fa’anaunauga ia ‘ou fa’amamaluina ai i La’ua. ua ‘ou iloa e lē pule a’u iā te a’u lava, ma na fa’atauina a’u i se tau e matuā maualuga lava, o lea ‘ou te tu’u atu a’u taleni ma mea uma o lo’o iā te a’u e fa’amamaluina ai le Atua ma ia fa’amuamua ai Lona malō.

Li’o le Tali:	Ioe	Lē Mautonu
<u>MANATU FA’AOPOOPO</u>	<u>TATALO MANA’OMIA</u>	<u>TALI O TATALO</u>

Tumau i le Usiusita'i

Lesona 9

E fa'avae lenei lesona i le Ioane 15:9, 10.

(1) E FA'APEFEA ONA FUAINA LE TUMAU O LE ALOFA O KERISO MO I TATOU?

Fa'apei ona alofa mai o le Tamā iā te A'u, e fa'apea lava ona 'Ou alofa atu iā te outou; ia tumau pea outou i Lo'u alofa. Ioane 15:9

MAU E TAU I AI: Ioane 17:21, 26; 15:13; Efeso 3:17-19; I Ioane 3:16

O Iesu na fa'aioaina mai le Tamā, o Ia o Lē e tatau ona tatou matuā talitonu ma tu'u i ai o tatou mana'oga. Pe a ua tatou fefefe i le Atua ma ua fa'atumulia o tatou manatu i Lona mamalu ma le maoa'e, o lo'o fa'asino i tatou e le Tamā iā Keriso Lona sui. O le a e va'aia iā Iesu le agamalū, agaalofo, ma le alofa mutimutivale, o le āta o uiga o le Tamā. E fa'aalia e le satauro o Kalevario le alofa o le Atua i le tagata. E tu'uina mai e Keriso o Ia o le Pule aoao o le vāteatea, o Ia o le Atua alofa. Na ala mai i 'upu a le perofeta, ua fa'apea mai o Ia, "O le alofa e fa'avavau, ua 'Ou alofa atu ai iā te oe; o le mea lea ua 'Ou fa'afualoaina ai Lo'u alofa iā te oe" (Jeremia 31:3). *HP 18*

O le tumau iā Keriso o lona uiga o le mafuta lea i le malu o Lona alofa. E mafanafana le loto i le iloa o le alofa o Keriso mo i tatou e tumau lea e pei o le alofa o le Tamā mo Lona Ālo. A e o le mea e sili atu i lo o lenā, "e alofa mai lava le Tamā ia te outou" (Ioane 16:27) i le alofa lava lea o lo'o Ia alofa ai mo le Ālo. *EGW RH Nov 4, 1890*

(2) O LE Ā LE MEA NA MUAMUA: O LE ALOFA TUMAU O LE ATUA MO I TATOU PO O LE TAULAGA NA FAIA A KERISO?

Auā ua fa'apea lava ona alofa mai o le Atua i le lalolagi, ua Ia au mai ai Lona Atali'i e to'atasi, ina ia lē fano se tasi e fa'atuatua iā te Ia, a ia maua e ia le ola e fa'avavau. Ioane 3:16

MAU E TAU I AI: Jeremia 31:3; Efeso 2:4-7; Roma 5:8; I Ioane 3:1

A e peita'i e le'i saunia lenei taulaga tele ma le tāua ina ia fa'atupuina ai le alofa mo tagata i le finagalo o le Tamā, pe ina ia fa'atupuina ai i le finagalo o le Atua se fia lavea'iina o i latou. E leai, leai lava! "Auā ua fa'apea ona alofa mai o le Atua i le lalolagi, ua Ia 'au mai ai Lona Atali'i e to'atasi" (Ioane 3:16). Ua alofa mai le Tamā ia i tatou e lē ona o le taulaga tele ua Ia saunia; a e peita'i na ala ona Ia saunia o le taulaga ona o Lona alofa tele iā i tatou. Ua 'avea Keriso ma ala ua liligi ifo ai le alofa tunoa o le Atua i le lalolagi ua pa'ū. "Sa iā Keriso le Atua, ua fa'aleleia e Ia le lalolagi iā te Ia" (II Korinito 5:19). Na tigāina lava le Tamā fa'atasi ma Lona Ālo. O le afutoto i Ketesemane ma le maliu i Kolokota, o le tau faigatā lava lea ua fa'atauina mai a'i lo tatou sa'olotoga e le alofa lē mafa'amatalaina fa'ale-Atua. *SC 13 (LSK 12.2)*

Ua fetalai mai Iesu, "O le mea lea e alofa mai ai le Tamā iā te A'u, auā 'Ou te tu'uina atu Lo'u ola, ina ia 'Ou toe au mai ai" (Ioane 10:17). O lona uiga o lea fetalai, "Ua fa'apea ona tele o le alofa o le Atua ia te outou le fanau a tagata, ua fa'ateleina ai fo'i ma Lona alofa iā te A'u, talu ai ona ua 'Ou tu'uina atu Lo'u ola e fai ma Sui o outou. Talu ai ona ua 'avea A'u ma outou Sui, ma outou Malu, i le tu'uina atu o Lo'u ola mo outou, ma Lo'u tau'aveina o a outou soligātulafono, o lea ua atili ai ona noatia o A'u i noataga o le alofa i Lo'u Tamā; auā o le 'avea o A'u e fai ma Taulaga, ua fa'aalitinoina mai ai le amiotonu a le Tamā, ina ia iloa ai o Ia o Lē amiotonu, ma ua ta'uamiotonuina e Ia lē ua fa'atuatua ia Iesu." *SC 14.1 LSK 13.1*

(3) E FA’APEFEA ONA FA’AMATALA MAI E KERISO LE FESO’OTA’IGA O LE MAFUTAGA ALOFA O LO’O IA FA’ANAUNAU I AI I LE VĀ O LE TAMĀ, O IA, MA I TATOU?

O A’u o i totonu ia te i latou, o ‘Oe fo’i o i totonu iā te A’u, ina ia fa’a’ato’atoaina i latou ia tasi; ina ia iloa ai fo’i e le lalolagi, na E ‘auina mai A’u, ma E alofa mai iā te i latou, fa’apei ona E alofa mai iā te A’u. Ioane 17:23

MAU E TAU I AI: Ioane 17:21, 26; 16:27; 3:35; 5:20, 21; Efeso 3:17-19

Oi se ta’utinoga a matagofie lenei, i le alofa o le Atua e tumau i le loto o i latou uma o ē talitonu iā te Ia!... Ua fa’apea mai Lē e silafia lea mea, “e alofa mai lava le Tamā iā te outou” (Ioane 16:27). O Ia Lē e silafia le umi, lautele, maua, ma le loloto o lea alofa, ma ua Ia ta’u mai iā i tatou lea fa’amaoniga ofoofogia. O lenei alofa e mo i tatou e ala i le fa’atuatua i le Ālo o le Atua, o le so’otaga lea ma Keriso e matuā tāua mo i tatou. E tatau ona tasi i tatou ma Ia e pei ona tasi Ia ma le Tamā, ma o le a pele i tatou i le Atua soifua e ‘avea ma vaega o le tino o Keriso, fa’apei o lālā o le Vine ola. E tatau ona tatou pipi’i atu i le la’au matua, ma ia maua mai ai mea’ai mai le Vine. O Keriso o la tatou Ao fa’amamaluina, ma o lo’o tafe mai le alofa fa’ale-lagi mai le finagalo o le Atua, malu ai iā Keriso, ma feso’ota’i atu ai iā i latou uma o ē ua so’ofa’atasi ma Ia. O lenei alofa fa’alelagi e ulufia ai le agaga i le loto fia fa’afetai, e fa’asa’oloto ai mai vaivaiga fa’aleagaga, mai le mimitavale, tu’inaanu ma le manatu fa’apito, ma mea uma e fa’aleaga ai le uiga moni fa’a-Kerisiano. FE 178

(4) O LE Ā LE AVANOA TĀUA MA LE TIUTE A KERISIANO TA’ITO’ATASI UMA?

E sa’ili mai outou iā te A’u, tou te maua fo’i, pe a outou sa’ili mai iā te A’u ma outou loto atoa. Ieremia 29:13

MAU E TAU I AI: Ieremia 24:7; Teuterenome 4:29; Salamo 119:2

E lē na o le avanoa a e o le tiute fo’i a Kerisiano uma ia tasi lelei le so’otaga ma Keriso ma ia lelei le galuea’iina o mea a le Atua. O le a maua ai lea i lona olaga o ni fua mai galuega lelei. Na fetalai Keriso, “E vi’ia Lo’u Tamā i lenei mea, pe a outou fua tele mai” (Ioane 15:8). Pe a tatou faitau i olaga o ē tulaga maua lelei ona o lo latou amiotonu, tatou te fa’atatau e lē mafai ona tatou ‘ausia le tapula’a o a latou galuega. Peita’i e lē tonu lea manatu, auā na maliu Keriso mo tagata uma. Ua Ia ta’utino mai i Lana afioga e matuā finagalo Ia e tu’u mai Lona Agaga Pa’ia iā i latou uma o ē ole atu iā te Ia, e sili mamao atu i lo o mea alofa e tu’uina e mātua i a latou fanau. E le’i fa’aleleiina amio Kerisiano a perofeta ma aposetolo ona o se vavega. Sa latou fa’aaogā mea na tu’u i ai e le Atua; ma o i latou uma e fa’apea ona taumafai, o le a latou maua fo’i lea lava i’uga. SL 83.3 (OFP 31)

(5) O LE Ā LE FA’AMAONIGA E TATOU TE ALOLOFA I LE ATUA MA O LO’O IĀ I TATOU LONA ALOFA TUMAU?

A o lē tasi i Lana afioga, e moni, ua ato’atoa le alofa i le Atua i totonu iā te ia. O le mea lea ua tatou iloa ai o i totonu iā te Ia i tatou. O lē fa’apea o lo’o tumau Ia i totonu iā te ia, e tatau ona savali o lenā tagata fa’apei ona savali o Ia. I Ioane 2:5, 6

MAU E TAU I AI: I Ioane 3:21-24; 5:3, 4; Ioane 14:15, 21; I Tesalonia 4:1

E lē maua e i tatou le fa’aolataga ona o lo tatou usiusita’i; auā o le fa’aolataga, o le mea foa’i fua lea a le Atua, e gata ona maua i le fa’atuatua. A e peita’i le usiusita’i, o le fua lava lea o le fa’atuatua. “Ua outou iloa fo’i na fa’aalia o Ia ina ia ‘ave’eseina e Ia a tatou agasala; e lē o iā te Ia fo’i se agasala. E lē agasala se tasi o ē tumau iā te Ia; o sē agasala ua lē va’ai o ia iā te Ia, ua lē iloa fo’i o Ia e ia” (I Ioane 3:5, 6). O le fa’aailoga mautinoa lenei. Pe afai ua tatou maua le mafutaga fa’atasi ma Keriso, ma ua nofo mau le alofa o le Atua i totonu iā te i tatou, o le a ō gatasi ai la tatou fa’alogo, o tatou mafaua, ma mea tatou te faia ma le finagalo o le Atua e pei ona fa’amalamalamaina mai i poloa’iga o Lana tulafono pa’ia. “Le fanau e, ‘aia ne’i fa’asesē se tasi ia te outou; o lē fai le amiotonu, o le amiotonu lea, fa’apei ona amiotonu o Ia”

(I Ioane 3:7). O le tapula'a ua fa'amalamalamaina mai ai le uiga moni o le amiotonu, o poloa'iga lava ia e sefulu o le tulafono pa'ia a le Atua e pei ona sa tu'uina mai i Sinai. SC 61 (LSK 68.1)

E matuā tāua iā Keriso le usiusita'i o Ōna tagata i poloa'iga a le Atua. E tataua ona iā i latou le poto e iloa lelei ai ia mea, ma aumai e fa'aaogā i o latou olaga o aso ta'itasi. E lē mafai e le tagata ona tausi poloa'iga a le Atua vaganā o lo'o i ai ia iā Keriso ma Keriso o i ai iā te ia. Ma e lē mafai ona i ai o ia iā Keriso, ma le malamalama o Lana poloa'iga a e lē tausia sina mea e sili le fa'atauva'a. E ala i le lotomau ma le usiusita'i i Lana Afioga, ua latou fa'amaonia ai lo latou alofa mo Lē na 'auina mai e le Atua. TDWG 142.1

O le lē tausi i poloa'iga a le Atua, o le lē alofa lea iā te Ia. E leai se tasi e tausia le tulafono a le Atua vaganā i latou e alolofa iā te Ia le Ālo to'atasi a le Tamā. A e peita'i e matuā moni lava, pe a latou alolofa iā te Ia o le a fa'aailoa lea alofa i le usiusita'i iā te Ia. O i latou uma e alolofa iā Keriso, o le a alofa i ai le Tamā, ma o le a fa'aalitino mai o Ia iā i latou. I mea fa'afuase'i e tutupu ma latou fa'afitauli uma o le a i ai pea la latou fesoasoani iā Iesu Keriso. TDWG 142.2

O le Atua e lē alofa mo na'o i latou e alolofa i Lona Ālo, a e alofa o Ia i le lalolagi (Ioane 3:16; Roma 5:8). Peita'i pe a tali atu le tagata i le alofa o le Atua, o le a telē atu le fa'atinoina o lea alofa. 5 BC 1049

(6) O LE Ā LE TOFOTOFOGA E AUPITO SILI O LO TATOU ALOFA MA LE FA'AMAONI I LE ATUA MA LE TULAGA O A TATOU AMIO?

Afai tou te alofa mai iā te A'u, ia outou tausi mai i A'u poloa'iga. Ioane 14:15

MAU E TAU I AI: I Korinto 7:19; Fa'aaliga 22:14; II Peteru 2:21

O le fuafuāga a le Atua i le galuea'iina o Lana ta'ita'iga ina ia tofotofoina ai le tagata, o le tu'uina lea o avanoa e atina'e ai lana amio. O lea le fa'amaoniga pe usiusita'i pe lē usiusita'i i Āna poloa'iga, auā e lē mafai ona fa'atau e galuega lelei le alofa o le Atua, a e peita'i e fa'aali mai ai iā i tatou lea alofa. Pe a tu'u atu o tatou loto i le Atua, e mana'omia a tatou galuega ina ia maua ai le alofa o le Atua. O Lona alofa o se meaalofo maua fua ma o le a talia i totonu o le loto, ma o le a tatou fiafia e usiusita'i i Āna poloa'iga ona o lo tatou alofa iā te Ia.

E na o le lua vaega o tagata i le lalolagi i le taimi nei, ma e na o le lua vaega o le a iloa i le fa'amasinoga - o i latou o ē soli tulafono a le Atua ma i latou e usiusita'i i ai. Ua tu'u mai e Keriso le tofotofoga e fa'amaonia ai pe tatou te fa'amaoni pe e leai. Ua fetalai mai o Ia, "Afai tou te alofa mai ia te A'u, ia outou tausi mai i A'u poloa'iga...O lē ua ia te ia A'u poloa'iga ma tausi i ai, o ia lea e alofa mai iā te A'u; o lē alofa mai fo'i iā te A'u, e alofaina o ia e Lo'u Tamā; 'Ou te alofa fo'i ia te ia, ma 'Ou fa'aali iā te ia.... O lē lē alofa ia te A'u, e lē tausia e ia A'u 'upu; o le 'upu fo'i tou te fa'alologologo i ai, e lē Sa'u lea, a o le 'upu a le Tamā ua 'auina mai A'u.... Afai tou te tausia A'u poloa'iga, ona tumau lea o outou i Lo'u alofa; pei ona 'Ou tausia poloa'iga a Lo'u Tamā, ma 'Ou tumau i Lona alofa" (Ioane 14:15, 21, 24; 15:10). COL 283 (AFTK 102)

(7) O LE Ā LE MEA E TUPU PE A AGASALA E FAIA MA LE LOTO I AI, O LE A LĒ MAFAI AI SE MAFUTAGA FA'ATASI MA KERISO?

A e peita'i o a outou amio leaga ua fai ia ma pupuni i le vā o outou ma lo outou Atua, o a outou agasala fo'i ua 'alo ai Ōna fofoga iā te outou ua la lē fa'afofoga mai ai. Isaia 59:2

MAU E TAU I AI: Ieremia 5:25; 2:17-19; Fa'ata'oto 15:29; Mika 3:4

'Aua ne'i sesē se tasi i le manatu fa'apea e mafai lava ona latou maua le amiotonu ma le olaga pa'ia a'o latou solia ma le iloa se tasi o poloa'iga a le Atua. O le faia o se agasala ma le iloa, o le mea lea o le a tapunia ai le si'ufofoga o le Agaga o le Atua ma i'u ai ina motu 'ese lea tagata ma le Atua. "O le agasala o le solia lea o le tulafono." Ma "'Ai se tasi e faia le agasala po o le soli i le tulafono a le Atua, e le'i va'ai lea tagata i le Atua; e lē iloa fo'i e lea tagata le Atua" (I Ioane 3:6).

E ui lava ua fa'amamafa mai e Ioane le alofa o le Atua i lana tusi, peita'i ua ia fa'ailoa mai fo'i le uiga moni o i latou o ē ua fai mai ua latou ola i se olaga fa'apa'aina a ua latou faia pea le soliga o le tulafono a le Atua. Fai mai Ioane: "O sē fa'apea mai ua ou iloa o Ia, a e lē tausi i Āna poloa'iga, o le pepelo lava lea; e lē o i totonu ia te ia le 'upu moni. A'o lē tausi i Lana afioga, e moni ua ato'atoa le alofa i le Atua i totonu iā te ia" (I Ioane 2:4, 5). O le mea lava lenei e iloa lelei ai le fa'amaoni po o le pepelo fo'i o le tagata. E lē mafai ona tatou ta'ua se tasi ua amiotonu po ua ola fa'apa'aina se'i vaganā ua tu'uina lea tagata i le fua fa'atautau a le Atua, o le fua lē sesē lea e tasi a le Atua i le lagi fa'apea ma le lalolagi e fua a'i le amiotonu. A lē lagona e tagata le tāua o le tulafono a le Atua, afai latou te manatu māmā i poloa'iga a le Atua, afai latou te solia se poloa'iga e sili ona itiiti o ia poloa'iga uma, ma latou a'oa'o tagata ina ia latou faia fa'apenā, e lē taulia i latou i le silafaga a le lagi. Tatou te iloa ai fo'i e leai se fa'avae o a latou fa'amatalaga. GC 472 (FT 396.3)

(8) PE A TATOU ALOLOFA I LE ATUA MA FILIFILI E TUMAU IĀ TE IA, E ALA I LE MANA O AI O LE A MAFAI AI ONA TATOU USIUSITA'I I POLOA'IGA MA MANUMALŌ AI I LE AGASALA?

O le tui o le oti, o le agasala lea, o le malosī fo'i o le agasala o le tulafono lea; a e fa'afetai i le Atua, o Lē na te foa'iina mai le manumalō iā te i tatou talu lo tatou Ali'i o Iesu Keriso. I Korinito 15:56, 57

MAU E TAU I AI: Filipi 3:9; Roma 7:22-25; II Korinito 12:9

E to'aititi lava i latou e iloa le uiga fa'anoanoa o le agasala, ma ē e malamalama i le telē o le fa'aleagaina ona o le soliina o le tulafono a le Atua. Pe a iloiloina le fuafuāga ofoofogia o le fa'aolataga ina ia toe fa'afo'i le tagata agasala i le fa'atusa o le Atua, tatou te iloa ai e pau lava le ala e toe lavea'i mai ai le tagata o le tu'u atu lava lea o Ia e fai fa'ataulaga, ma le uiga fa'amaulalo e lē mafa'atusaina o le alofa o le Ālo o le Atua. E na o Ia e i ai le malosī e tau ai taua ma le fili o le Atua ma le tagata, ma o Ia o le Sui ma le mea moni ua Ia tu'u le pule iā i latou o lo'o u'umau iā te Ia e ala i le fa'atuatua, e 'avea ma ē emanumalō ona o Lona suafa, ma e ala i Ōna uiga tataua. FE 135.1

O lenei ofu, ua gaosia ma saunia i le lagi, e leai se fasi filo a se tagata o i ai i totonu. O Keriso i Lona tino tagata, sa Ia fa'aalia Lona uiga tonu ato'atoa, ma o le itu'aiga uiga lea o lo'o ia ofoina mai mo i tatou ia tatou ola ai. "O a matou amio tonu uma e tusa ia ma le 'ie o le ma'i" (Isaia 64:6). O mea uma tatou te faia ua pisia i a'afiāga o le agasala. Peita'i o le Ālo o Le Atua "ua fa'aalia o Ia ina ia 'ave'eseina e Ia a tatou agasala; e lē o iā te Ia fo'i se agasala." O le agasala pe a fa'amatalaina "o le solitulafono lea" (I John 3:4, 5). O Keriso fo'i sa Ia tausi ma savali e tusa o le tulafono. "'Ou te fiefia e fai Lou finagalo; o lo'o i totonu lava iā te a'u Lau tulafono" (Salamo 40:8). A o i ai o Ia i le lalolagi, sa Ia fetalai atu i Ōna so'o, "pei ona 'Ou tausia poloa'iga a Lo'u Tamā" (Ioane 15:10). O Lona usiusita'i ato'atoa ua mafai ai e tagata uma ona tausia poloa'iga a le Atua. Afai tatou te tumau iā Keriso, ua tasi i tatou ma Ia i le agaga ma le mafau'au, o o tatou manatu uma fo'i e fa'ailoa atu ai o lo'o ola Keriso i totonu iā i tatou. O le uiga tonu lea o le tagata ua ofu i le ofu o le amiotonu. Ma a silasila mai le Ali'i i lea tagata, o le a lē toe va'aia le ofu laula'au, po o le lēlavalavā ma le lē ato'atoa ona o a'afiāga o le agasala, a e ua na o Lana ofu talaloa o le amiotonu, o le usita'i ato'atoa lea i Āna poloa'iga ma tausi i Lana tulafono. COL 311.4 (AFTK 127.1)

(9) O LE Ā LA TATOU VAEGA E FAIA INA IA FA'ATO'ILALO AI LE AGASALA, I LA TATOU FAIGĀ PA'AGA TUMAU MA KERISO?

O le mea lea ia outou gaua'i ai i le Atua; ia outou tete'e atu i le ti'apolo, ona sola 'ese ai lea o ia iā te outou. Ia outou fa'alatalata atu i le Atua, ona fa'alatalata mai lea o Ia iā te outou. Tagata agasala e, inā fafano ia o outou lima, o outou ē fa'alotolotolia e, inā fa'amamā ia o outou loto. Iakopo 4:7, 8

MAU E TAU I AI: Galuega 3:19; Ioane 15:4, 5; Mataio 26:41; Kalatia 2:20

Ia 'aia ne'i fa'apea mai se manatu e la'itiiti lava pe leai fo'i se mea a le tagata e faia i le galuega tele o le fa'ato'ilalo; ona e lē faia e le Atua se mea mo le tagata a e la te lē galulue fa'atasi. E lē fa'apea mai fo'i o le a fesoasoani mai Iesu pe a uma ona e faia o lau vaega e te mafai ona fai. Na fetalai Keriso, "E lē mafaia e outou ona fai o se mea e tasi pe a A'u lē i ai"

(Ioane 15:5). Mai le ulua'i tagata e o'o i le tagata mulimuli e tatau ona galulue fa'atasi le tagata ma le Atua. Se'iloga e galue le Agaga Pa'ia i le loto o le tagata, o le a tatou tau teveve ma pa'u'ū i ala uma. O taumafaiga uma e fai e le tagata lava ia e leai se aogā; peita'i a 'aufa'atasi ma Keriso e i'u i le manumalō. E leai se mana e iā i tatou lava ia e salamō ai mai agasala. Se'iloga ua tatou talia le fesoasoani fa'alelagi e lē mafai e tatou ona la'a aga'i i le Fa'aola. O lo'o fetalai o Ia, "O a'u le Alefa ma le Omeka, o le amataga ma le gata'aga" (Fa'aaliga 21:6) i le fa'asaoina o agaga uma. *I SM 381.2*

Peita'i e ui o Keriso mea uma lava, a e tatau iā i tatou ona ta'ita'i tagata uma ia filigā a e 'aue le fa'avaivai. Ia tatou taumafai, tauivi malosi, fa'amafatia, mataāla, ma tatalo ina ne'i fa'ato'ilaloina i tatou e le fili fai togafiti. O le mana ma le alofa tunoa e mafai ai ona faia o nei mea e mai le Atua, ma e tatau ona tatou fa'atuatua iā te Ia i taimi uma, auā o Ia e mafai ona fa'asaoina i tatou uma o ē ō mai i le Atua e ala iā Keriso. Ia lē tu'uina i le mafau fau le manatu e la'itiiti lava pe leai fo'i se vaega e faia a le tagata; peita'i ia a'oa'o le tagata e galulue fa'atasi ma le Atua, ona manuia lea o ia ma ia manumalō. *I SM 381.3*

Ia 'aue ne'i fa'apea mai se tasi o au galuega e leai se aogā mo lou tulaga ma le tofi i luma o le Atua. I le fa'amasinoga o le fa'asalaga e tu'u mai e fa'atatau lava i le mea na faia pe o mea na ta'u mai e le'i faia (Mataio 25:34-40). *I SM 381.4*

E mana'omia le taumafai ma le galue, o le vaega lea a lē e taliaina le alofa tunoa a le Atua; o le fua e fa'aalitinoina le uiga o le la'au. E ui ina e lē tele atu le tāua o galuega lelei a le tagata pe a lē fa'atuatua iā Iesu i lo'o le taulaga a Kaino, peita'i pe a ufitia i le uiga silisili 'ese o Keriso, ona fai lea ma molimau i le aogā o lē na faia e maua ai le ola e fa'avavau. O le mea e manatu le lalolagi o le alasa'o e lē 'ausia le tulaga fa'ale-Atua ma e leai se uiga tatau i luma o le lagi e pei lava o le taulaga a Kaino. *I SM 381.5 (Manuscript 26a, 1892)*

(10) PE A UA TATOU AMO FA'ATASI I SE MAFUTAGA TUMAU MA KERISO, O LE Ā LE FOLAFOLAGA OFOFOGIA E MAFAI ONA TATOU TAPA I AI?

Ia outou ō mai iā te A'u, o outou uma o ē tigāina ma mafatia i avega, o A'u fo'i e malōlō ai outou. Ia outou amoina La'u amo, ma ia outou fa'aa'oa'o iā te A'u, auā o A'u Lē agamalū ma le loto maulalo; ona maua lea e outou o le malōlōga mo outou agaga. Auā e avegofie La'u amo, o La'u avega fo'i e māmā ia. Mataio 11:28-30

MAU E TAU I AI: Ieremia 6:16; Eperu 4:9-11; Isaia 26:3

E tatau ona tatou maua le malōlōga e ala i le amoina o Lana amo ma tau'ave Lana avega. Pe a 'aufa'atasi ma Keriso i le galuega tele na Ia tu'u atu ai Lona soifua, o le a tatou maua loa le malōlōga moni. A o agasala tatou, na Ia tu'u atu Lona soifua mo i tatou. E mana'omia i tatou ia ō atu iā te Ia ina ia a'oa'oina e uiga iā te Ia. O le a maua ai loa e tatou le malōlōga. Ua fa'apea mai o Ia o le a Ia tu'u iā i tatou le malōlōga; "Ia outou fa'aa'oa'o iā te A'u, auā o A'u Lē agamalū ma le loto maulalo" (Mataio 11:29). A faia lenei mea, o le a maua e 'oe lava ia le malōlōga e tu'u mai e Keriso, le malōlōga e maua mai le tau'aveina o Lana amoga ma le si'iina o Lana 'avega. *GCB April 4, 1901*

O le taliaina o le amoga e tau taofiofi ma le usita'i a Keriso, o le a e iloa ai o se fesoasoani e sili atu lea ona tele mo 'oe. o le amoina o lenei amoga, e fa'apipi'i latalata ai 'oe i le itū o Keriso, ma o le a Ia tau'aveina vaega e aupito mamafa o le avega. "Ia outou fa'aa'oa'o iā te A'u, auā o A'u Lē agamalū ma le loto maulalo" (Mataio 11:29). Pe a a'oina le lesonea o lo'o a'oa'oina e Keriso o le 'oa e aupito sili lea e mafai ona maua e tamaiti a'oga. E latou te maua le malōlōga i le lagona ifo i le loto o lo'o laotu taumafai e fa'amalie le Ali'i. *Letter 144, 1901*

'Ou te iloa ona e alofa o Ia iā te a'u, ua aumaia e le Tamā le taulaga ofo o Lona Ālo.

Li'o le Tali:

Ioe

Lē Mautonu

Tumau i le Fiafia

Lesona 10

O lenei lesona e fa'avae i luga o le Tusi o le Ioane 15:11.

(1) O LE Ā LE FA'AMOEMOE A KERISO INA UA FA'ASOA MAI IĀ I TATOU NEI 'UPU MONI E FA'ATATAU I LE MAFUTA IĀ TE IA?

Ua 'Ou fai atu nei mea iā te outou, ina ia tumau ai Lo'u oli'oli iā te outou, ia ato'atoa fo'i lo outou oli'oli. Ioane 15:11

MAU E TAU I AI: Ioane 17:13; 10:10; 14:27;

O le Atua e fa'avavau, o le Pogai o mea lelei uma. O i latou uma e va'ai atu iā te Ia ma talitonu iā ta Ia e iloa o Ia lava lenei. O ē e au'auna iā te Ia, e u'umau iā te Ia, o lo latou Tamā fa'alelagi, o lo'o Ia tu'u i ai le fa'amalosi'aga o le a Ia fa'ataunu'u Āna folafolaga uma. O le a i o latou loto Lana oli'olisaga, ma o le a fa'atumulia lo latou fiafia. *Letter 203, Sept. 14, 1903*

(2) O AI LE POGAI O LE FIAFIA?

O le Atua fo'i e tupu mai ai le fa'amoemoe, ia fa'atutumuina outou e Ia i le oli'oli uma atoa ma le filemū, ina ua fa'atuatua; ina ia tele lava lo outou fa'amoemoe ona o le mana o le Agaga Pa'ia. Roma 15:13

MAU E TAU I AI: Failauga 2:26; Isaia 65:18; Ieremia 32:13; Luka 2:10

O le Atua le pogai o le ola ma le malamalama ma le fiafia mo le vāteatea. E pei o 'ave malamalama mai le lā, e tafe mai iā te Ia fa'amanuiāga i meaola uma na Ia faia. I Lona alofa e lē gata, ua Ia tu'u i le tagata le avanoa e fa'asoa ai i le uiga fa'ale-Atua, ma ia tu'u atu ai e ia lea manuia i ōna uso ā tagata. O le mamalu silisili lenei, o le fiafia e aupito sili, ua mafai e le Atua ona tu'uina i luga o tagata. O i latou ia o ē ua ō lalata mai i Lē na faia i latou ma 'avea o soa i galuega o le alofa. O lē e tete'e i le 'avea ma "lē e galulue fa'atasi ma le Atua," - le tagata e manatu fa'apito ma lē amana'ia mana'oga o ōna uso ā tagata, lē e maumea ma fa'aputu āna 'olua i lalo nei, - o lo'o taofi i tua mai iā te ia le manuia e aupito tautele e mafai e le Atua ona avatu mo ia. *R. & H., Dec. 6, 1887*

(3) O LE Ā LE MEA E MAUA E I LATOU E TALIA KERISO E 'AVEA MA O LATOU FA'AOLA FA'AMAGALO AGASALA, E FA'AFESUIA'I MO LE FA'ANOANO A ONA O AGASALA?

E avatu le fiafia i ē fa'anoanoa i Siona, e foa'iina atu iā i latou le matagofie e sui a'i le lefulefu, o le u'u o le oli'oli e sui a'i le fa'anoanoa, o le 'ofu e fai a'i vi'iga e sui a'i le loto fa'avaivai; e igoa i latou, O la'au o le amiotonu, o le fa'ato'aga a Ieova, e fai Mona vi'iga. Isaia 61:3

MAU E TAU I AI: Isai 35:10; Salamo 70:4; 5:11; Ioane 17:13

E pei ona toe fa'atū a'e e le Atua Keriso mai ē na oti, ina ia Ia aumaia le ola ma e lē gata i le malamalama e ala i le tala lelei, ma o le a fa'asaina ai Ōna tagata mai a latou agasala, e fa'apea ona fa'atū a'e e Keriso tagata ua pa'u'ū i le ola fa'a leagaga, fa'ate'ia i latou i Lona soifuāga, ma fa'atumulia o latou loto i le fa'amoemoe ma le fiafia. *HP 7.2*

O le tiute a le Kerisiano o le fa'atalitonuina lea o le lalolagi i le ekalesia a Keriso, e tu'u'eseina lavalava e mamafa ma le fa'anoanoaga o le agaga a e fa'aofu i le fiafia ma le oli'olisaga. O i latou o ē talia Keriso o le Fa'aola fa'amagalo agasala e fa'aofu i la'ei o le malamalama. E Na te 'ave'esea a latou agasala ma tu'u iā i latou Lona amiotonu. O le a ato'atoa lo latou fiafia. *CME 26.3*

O ai e sili atu i lo Kerisiano i le fai pesega fiafia? E lē o tagata na o lo’o fa’amoemoeina o tagata o le aiga tupu, o fanau a le Tupu o le Lagi? E lē o le tala lelei o fafatala lelei o le fiafia? Pe a talia ato’atoa folafolaga a le Atua, o le a aumaia i le olaga le malamalama fa’alelagi.... *CME 26:4*

(4) AISEĀ E AUMAIA AI LE FIAFIA I LE LOTO PE A MAFUTA IĀ KERISO?

E te fa’ailoa mai iā te a’u le ala o le ola; o i o’u luma le fiafia e mālīe ai; o i lo’u itu taumatau le oli’oli e fa’avavau.
Salamo 16:11

MAU E TAU I AI: Galuega 2:28; I Tesalonia 2:19

Aiseā e lē ato’atoa ai lo tatou oli’oli - atoa, e leai se mea e mana’omia? Ua tatou mautinoa o Iesu lo tatou Fa’aola, ma e mafai ona tatou tosina mai iā te Ia a e leai se tau. E mafai ona fa’asoa i mea lelei uma ua Ia faia mo i tatou o i Lana Afioga. E mafai ona tatou talitonu i Āna fetalaiga, talitonu iā te Ia, ma iloa o le a Ia tu’u iā i tatou le alofa tunoa ma le pule e fai ai mea o lo’o Ia fa’atonu mai iā i tatou.... Ia tatou sa’ili pea le fiafia o Lona fa’atasi mai. E lē mana’omia ina ia tatou tatalo ot’otuli i taimi uma, peita’i ia tatou ōle atu pea mo Lona alofa tunoa, tusa lava pe o savavali i auala po o faia galuega o aso fai so’o. Ia si’itia a’e pea e lē aunoa o tatou mafaufau iā Keriso, o le a Ia aumai iā i tatou Lona alofa tunoa.
2 SAT 293

(5) O AI E TATOU TE MAUA MAI AI LE FIAFIA INA IA TATOU AVATU AI I LE LALOLAGI?

Auā o le malō o le Atua, e lē o mea e ‘ai ma mea e inu; a o le amiotonu, ma le filemū, ma le oli’oli i le Agaga Pa’ia.
Roma 14:17

MAU E TAU I AI: Kalatia 5:22; Galuega 13:52; I Tesalonia 1:6

Na tu’uina i le ‘au so’o le mana o le Agaga Pa’ia, - o le tomai fa’alelagi lea, - e fa’apea ona tu’uina fo’i i ōna po nei iā i latou uma o ē sa’ili i ai. O lenei mana e mafai ona fa’apoto ai tatou i le fa’aolataga ma ina ia feagai lelei ai i tatou mo maota o i lugā. E finagalo Keriso ia tu’u iā i tatou se fa’amanuiāga ia fa’apa’iaina ai i tatou. Ua fetalai o Ia, “Ua ‘Ou fai atu nei mea iā te outou, ina ia tumau ai Lo’u oli’oli iā te outou, ia ato’atoa fo’i lo outou oli’oli” (Ioane 15:11). O le fiafia i le agaga Pa’ia e maua ai le soifua malōlōina ma le olaga e fiafia. Ina ua Ia tu’u iā i tatou Lona Agaga, ua tu’u mai ai e le Atua iā i tatou Ia lava, ua ‘avea ai Ia ma punavai o uiga fa’ale-Atua, ina ia tu’u ai i le lalolagi le soifua malōlōina ma le ola. 7 T 273.1

A o tu’uina mai e le Atua Āna meaalofo iā te ‘oe, ia manatua e faia ina ia e toe fa’afo’i atu ai i Lē na aumai ai, a e na fa’ateleina ina ua tu’u mai. Ia aumai le malamalama ma le fiafia ma le filemū i olaga o isi. E mana’omia e a’oa’oina i tatou ia pulea lelei le loto maulalo, ina ia saunia ai i tatou e talia le meaalofo fa’alelagi, ia lē fa’aputuvale, ia lē gaoia mai le fanau a le Atua Āna fa’amanuiāga, peita’i ia tu’u atu uma i lona atoa i nisi. O le taimi nei lava ua mana’omia ai e tatala atu le loto e talia mea o lo’o tu’u mai. 7 T 273.2

(6) O LE Ā LE MEA E AUMAIA LE FIAFIA I LE FINAGALO O KERISO?

O lenei, ia iā te Ia Na te mafaia ona leoleo iā te outou ina ne’i pa’u’ū, ma tu’uina atu iā te outou ua lē ponā i luma o Lona lava mamalu ma le fiafia tele. **Iuta 1:24**

MAU E TAU I AI: Eperu 12:2; Mataio 25:21; Luka 15:7, 10

A fa’asoa le ola e fa’avavau ma le ‘au fa’aolaina mai augātupulaga uma ma ē e le’i pa’u’ū mai isi lalolagi, o se fa’amoemoe lea na aumaia le fiafia i lo tatou Ali’i a o puapuagātia i Ketesemane ma i luga o le satauro o Kalevario. 7 BC 481

Na fiafia Keriso ina ua Ia lagona ua mae'a manuia Lana galuega. Na maua le fiafia e le Fa'aola ina ua fa'ataunu'u le fuafuāga fa'alelagi i le togiolaina o le tagata ma i le onosa'i se'ia lavea'iina tagata. O Lana fa'amoemoe i Lona soifuāga o le fa'amamaluina lea o Lona Tamā. 5 BC 1043

(7) PE A TATOU MAFUTA IĀ KERISO, O LE Ā LE MEA O LE A AUMAIA LE FIAFIA I O TATOU LOTO?

O lē ua alu atu ma tagi fano, o lo'o 'ave le saito e lūlū, e fo'i mai lava ia ma le 'alaga fiafia, o lo'o 'au mai ana fusi saito. Salamo 126:6

MAU E TAU I AI: Fa'ata'oto 11:25; Isaia 58:6-8; Ioane 4:36

O se tasi e sa'ili ia tu'uina atu le malamalama i nisi, e fa'amanuiaina fo'i o ia. “E i ai uāga e manuia ai” (Esekielu 34:26). “O ia fo'i lē fa'asūsū i nisi, e fa'asūsūina lava o ia” (Fa'ata'oto 11:25). E mafai e le Atua ona fa'ataunu'u Lana fuafuāga mo le fa'asaoina o tagata agasala e aunoa ma sa tatou fesoasoani; peita'i ina ia mafai ona fa'aleleia la tatou amio ia pei o Keriso, e tatau ona i ai se tatou vaega e faia i Lana galuega. Ina ia mafai ona tatou ulufale atu i totonu o Lona fiafia, - o le fiafia e va'ai atu i agaga na togiolaina e Lana taulaga ofo, - e tatau ona fai se tatou vaega i totonu o Lana galuega mo lo latou fa'aolataga. DA 142.2 (FNT 93.3)

E lē o se avanoa ea lenei e 'avea ai ma soa fa'atasi ma Keriso? E lē o se mamalu pe a so'ofa'atasi ma le galuega tele mo le fa'asaoina o agaga, ia faia le vaega ua tu'u iā i tatou e lo tatou Fa'aola? E lē mafai e se tasi ona tu'u se fa'amanuiāga i isi a e lē maua se aogā mo ia. CH 508.1

O le galuega e faia i le loto fa'amaoni e tele lona tau. “O lou Tamā fo'i o Lē silasila i le mea lilo, Na te avatu fa'aaliali se tau iā te oe” (Mataio 6:6). E ala i le olaga o lo'o tatou ola ai i le alofa tunoa o Keriso, o iinei e atia'e ai le amio. O le matagofie na i ai i le amataga, e toe fa'afouina ai le loto. O uiga o le amio a Keriso o le a foā'ia mai, ma e amata ai ona susulu le malamalama mai le fa'atusa o le Atua. O foliga o ali'i ma tama'ita'i o lo'o savavali ma galulue fa'atasi ma le Atua o le a fa'aioa atu ai le filemū o le lagi. O lo'o si'omia i latou i le si'osi'omaga o le lagi. O nei tagata ua amata ai le mālō o le Atua. Ua latou maua le 'oli'oli o Keriso, le 'oli'oli o le 'avea ma fa'amanuiāga i tagata. Ua latou maua le mamalu o le taliaina mo le fa'aaogāina e le Matai; ua talitonuina i latou e faia Lana galuega i Lona suafa. DA 312 (FNT 235)

(8) O LE Ā LE MATĀ'UPU E TATAU ONA MAU I O TATOU MAFUFAU INA IA MAFAI ONA ULUFALE AI I LE ATOATOĀGA O LE OLI'OLISAGA A KERISO?

Ia outou loto lava i mea i lugā, a e lē o mea i le lalolagi. Kolose 3:2

MAU E TAU I AI: Roma 8:5, 6; 12:2; Isaia 26:3; II Korinito 4:18

Pe a tu'u 'ese mai mata o tagata o le Atua mea o lenei lalolagi a e tu'u i mea fa'alelagi o le a avea i latou o ni tagata e fa'apitoa ona o le a latou va'aia le alofa tunoa ma le agalelei ma le alofa mutimutivale o lo'o fa'aalia e le Atua i le fanau a tagata. O Lona alofa o le a aumaia ai se tali mai iā i latou, ma o le a fa'aalia i o latou olaga o lo'o pulea i latou e le Agaga o le Atua, ma o lo'o pele iā i latou mea o lo'o i le lagi a e lē o mea o le lalolagi. Mar 322.1

Pe a tatou mafufau e fa'atatau i le lagi, atonu o le a fa'alautele o tatou manatunatuga i mea e lē mafai ona o'o i ai o tatou manatu, ma o le a fa'avaivai ai i le taumafai ina ia malamalama i le lautele ma le loloto ma le maua o lea matā'upu. E lē mafai e o tatou mafufau taliina i totonu matā'upu tetele e uiga i le fa'avavau. E lē mafai e tusa pe taumafai e malamalama i nei mea a e o le a lē āfaina ai o tatou uiga atoa mo le lelei, ma o le a si'i i luga le tulaga manuia o tatou mafufau. A o tatou manatunatu i le afio mai o Keriso i lo tatou lalolagi e maluu mo le tagata ua pa'ū, o le a tatou malamalama e fa'atatau i le tau na togiina e togiola ai i tatou, ma ua tatou iloa ai e leai se agalelei moni po o se maua o lea matā'upu e sili pe a vavae'ese mai le Atua. Mar 322.2

E na o le malamalama o lo’o susulu mai le satauro o Kalevario o le a mafai ai ona tatou iloa le loloto o le agasala ma le leaga o le tulaga ua pa’ū i ai le aigā tagata mai le agasala. E na o le umi o le filifili o lo’o tu’utu’u ifo mai le lagi e ‘ave a’e ai tatou i luga o le a mafai ai ona tatou iloa le loloto ua tatou magoto i ai. Ma e na o le tu’uloto o mea e lē o va’aia ona mafai lea ona tatou malamalama i se mea e fa’ataata i le autū ofoofogia o le togiola. *Mar 322.3*

Ua tatou latalata lava i lo tatou aiga; ua toeitiiti ona tatou fa’alogoina le si’ufofoga o le Fa’aola, e pito sili ona mālīe i lo o so’o se pese, ua fa’apea mai, “Ua fa’ai’uina le taua. Ia ulufale mai i le fiafia o lou Ali’i.” O fa’amanuiāga fa’ai’u; ‘ou te fia fa’alogo i ai mai i Ōna laufofoga. ‘Ou te vi’ia o Ia; ‘ou te fia fa’amamaluina Ia o Lē e ti’eti’e i luga o le nofoāli’i. ‘Ou te mana’o ia fa’alogoina lo’u leo i maota o le lagi. O le a e i ai i inā?... Le Atua fesoasoani mai, ma fa’atumulia i matou ia ato’atoa ma le mana, ma ia mafai ona matou tofo i fiafiāga o le lalolagi o le a o’o mai. *Mar 322.4*

(9) O LE Ā LE MEA TĀUA IA TATOU FAIA INA IA MAFAI AI ONA TUMAU LONA FIAFIA I TOTONU IĀ I TATOU?

O lenei, o le mea ua outou fa’alogologo i ai talu le amataga, ia tumau lava lea iā te outou; afai e tumau iā te outou le mea ua outou fa’alogologo i ai talu le amataga, ona outou tumau ai lea i le Ālo atoa ma le Tamā. I Ioane 2:24

MAU E TAU I AI: Teuterenome 4:9; Kolose 2:6; Eperu 12:2; Roma 1:17

O le finagalo lenei o le Ali’i mo Lana fanau uma, ia latou fiafia, ma filemū, ma usiusita’i. Ua fa’apea le fetalaiga a Iesu, “‘Ou te tu’uina atu iā te outou le manuia; o Lo’u manuia ‘Ou te avatu ai iā te outou; ‘Ou te lē avatu iā te outou fa’apei ona avatu e le lalolagi. ‘Aua le atuatuvaale o outou loto, ‘aua fo’i tou te matata’u” (Ioane 14:27). Ma “Ua ‘Ou fai atu nei mea ia te outou, ina ia tumau ai Lo’u oli’oli iā te outou, ia ato’atoa fo’i lo outou oli’oli” (Ioane 15:11). *SC 124.1 (LSK 140.1)*

A e peita’i e maua lava le fiafiāga e tagata Kerisiano i le olaga nei i le mafutaga ma Keriso; latou te maua le malamalama o Lona alofa, ma le fa’amafanafanaga tumau o Lona fa’atasi mai. E mafai lava ona ‘avea la’asaga uma o lenei olaga ma ala tatou te fa’alatalata atu ai atili iā Iesu, ma tatou maua ai le malamalama i Lona alofa e sili atu ona tele, ma o le a saga latalata atu ai lava i tatou i lo tatou nofoāga tumau o i ai le manuia ma le filemū. O le mea lea, ‘aua ne’i o tatou lafoa’iina ai lo tatou talitonu, a ia mautū pea lo tatou fa’amoemoe, ia sili atu ona mautū i lo muamua. “Ua fesoasoani mai Ieova iā i tatou, ua o’o mai i le aso nei” (I Samuelu 7:12). I le o le a fesoasoani mai lava o Ia iā i tatou e o’o lava i le i’uga. Ia tatou va’ava’ai atu i ma’a fa’amanatu o lo’o tutū i le ala na tatou savavali mai ai, o ma’a ia e fa’amanatuina ai mea ua faia e le Ali’i e fa’amafanafana a’i ma fa’aolaina a’i i tatou mai lima o le o lo’o leaga. Ia fa’afouina pea i o tatou mafaufau le manatua o le alofa mutimutivale o le Atua ua Ia fa’aalia mai iā i tatou—o loimata ua Ia soloi’eseina, o o tatou tigā ua Ia fofōina, o popole ua Ia ‘ave’eseina, o le mata’u ua Ia fa’amavae ‘eseina, o o tatou mana’o ua Ia fa’amalieina, ma le matalasi o manuia ua Ia foa’iina mai—o le a fa’apea lava ona fa’amalosiiina ai o i tatou mo ogāala o lo’o totoe o la tatou faigā malaga. *SC 125.1 (LSK 140.3)*

(10) E TATAU FA’APEFEA ONA TATOU FA’AALITINOINA I LE LALOLAGI LO TATOU ALOFA MO KERISO PE AFAI O TATOU O ŌNA SO’O?

Inā fiafia ia iā Ieova, ma oli’oli o outou o ē amiotonu; inā alalaga ia ma le fiafia o outou uma o ē ua fa’amaoni o outou loto. Salamo 32:11

MAU E TAU I AI: Salamo 40:16; Salamo 43:4

Aiseā e lē tatau ai ona fa’atumulia lo tatou fiafia - ia tumu, e leai se mea e mana’omia? Ua tatou mautinoa o Iesu o lo tatou Fa’aola, ma e mafai ona tatou aumai fua mai iā te Ia. E mafai ona ‘au fa’atasi ai i mea lelei ua Ia faia mo i tatou mai Lana Afioaga. E mafai ona tatou talia Āna fetalaiga, talitonu iā te Ia, ma iloa o le a Ia tu’u iā i tatou le alofa tunoa ma le pule e fai ai mea ua Ia fa’atonu mai ai tatou.... *OHC 148.3*

Ona ua maliu Keriso, e lē o tu'ua i tatou o ē ua mātuaoti.... E mafai ona tatou maua le manumalō, ma 'avea o tagata e aupito sili le fiafia o i le lalolagi. *OHC 148.5*

Li'o le Tali: Ioe Lē Mautonu

Li'o le Tali: Ioe Lē Mautonu

Li'o le Tali: Ioe Lē Mautonu

Li'o le Tali: Ioe Lē Mautonu

Li'o le Tali: **Ioe** **Lē Mautonu**

TALI O TATALO

[illegible]

Tumau i le Alofa

Lesona 11

O lenei lesona e fa'avae i luga o le Ioane 15:12.

(1) O LE Ā LE POLOA'IGA O LO'O ŌLE MAI KERISO IA TATOU TAUSIA INA IA FA'AALITINO MAI AI LA TATOU FESO'OTA'IGA TUMAU MA IA?

O la 'u poloa'iga lenei, ia outou fealofani, pei ona 'Ou alofa atu iā te outou. Ioane 15:12

MAU E TAU I AI: Ioane 13:34, 35; I Ioane 4:16; Efeso 5:2; I Peteru 4:8

O 'auso'o o faia'oga ta'uta'ua e fa'ataina uiga o a latou faia'oga. O le tasi o uiga aupito sili o Iesu o le alofa lea; ma sa fa'aalitinoina i Lona soifuāga. Pe a fa'atinoina lenei itū'aiga alofa e so'o o Iesu, o le a tu'u atu ai le fa'amaoniga o lo latou vā feāloa'i ma le latou feso'ota'iga latalata ma lo latou Matai. O le alofa lea a e lē o se agava'a e fa'ailogaina le Kerisiano...e faifaiepa, filigā e fa'atino le alofa, a e lē o le faia ta'itasitasi o galuega fesoasoani, o fa'amaoniga ia o so'o moni. 5 BC 1031

E lē fou le poloa'iga ia alofa atu. Sa i ai i fa'atonuga na tu'uina mai e le Ali'i e ala mai iā Mose (Levitiko 19:18)... O le fa'atonuga e fou ona e fou le fa'ata'ita'iga o le alofa na tu'u mai, lea na fa'ailoa i le 'auso'o ina ia latou faia. E ala i Lana fa'aaliga o le uiga o Lona Tamā, na fa'amatala mai ai e Iesu se manatu fou i le alofa o le Atua. O le poloa'iga fou e fa'afeso'ota'i ai tagata ia tausia ai le vā feāloa'i a le tasi i le tasi pei ona atina'e e Iesu ma latou ma tagata uma lava. Na ta'u mai e le poloa'iga tuai ia alofa i lou tuā'oi fa'apei o 'oe lava iā te 'oe, a e ua u'una'i mai e le 'upu fou ia alofa e pei ona alofa Iesu. Ua iloa e faigatā atu le poloa'iga fou i lo o le mea tuai, peita'i ua tu'u mai e leai se tau le alofa tunoa i lona fa'ataunu'uina. 5 BC 1031

(2) E FA'APEFEA ONA FA'AMATALAINA LE ALOFA MA O LE Ā LE MEA E FA'AILOA MAI O LO'O FA'ATASI AI?

O i tatou fo'i, ua tatou iloa ma ua fa'atuatua i le alofa ua i le Atua iā te i tatou. O le Atua, o le alofa lava ia; o lē tumau i le alofa, ua tumau ia i totonu o le Atua, o le Atua fo'i o i totonu iā te ia. I Ioane 4:16

MAU E TAU I AI: I Ioane 4:7, 8; 2:4, 5; 3:16, 17

O le taufa'asesē e sili ona mata'utia pe a manatu e mafai ona maua e le tagata le fa'atuatua e o'o ai i le ola e fa'avavau, a e lē iā te ia le alofa pei o Keriso mo ōna uso ā tagata. O lē e alofa i le Atua ma lona tuā'oi e tumu i le malamalama ma le alofa. E i ai le Atua iā te ia ma e si'omiaina fo'i ia. E alolofa Kerisiano i ē o lo'o vā lalata ma i latou, e pei o agaga na maliu ai Keriso. E leai se Kerisiano moni e fa'apea e lē alofa; ona "O le Atua, o le alofa lava ia" (I Ioane 4:8), ma "O le mea fo'i lea tatou te iloa ai ua tatou iloa o Ia, pe afai tatou te tasi i Āna poloa'iga. O sē fa'apea, Ua ou iloa o "Ia, a e lē tasi e ia i Āna poloa'iga, o le pepelo lava lea, e lē o i totonu iā te ia le 'upu moni" (I Ioane 2:3, 4)... Fa'apea fo'i ma "O La'u poloa'iga lenei, ia outou feālofani, pei ona 'Ou alofa atu iā te outou" (Ioane 15:12). O le fua lenei e tataua ona toe fa'afo'i atu i le Atua. MS 133, 1899

O le alofa i tagata o le fa'atinoina fa'ale-lalolagi lea o le alofa o le Atua. O le totōina o lenei alofa, ia 'avea ai i tatou o fanau a le aiga e tasi, ina ia 'avea le Tupu mamalu o se tasi o i tatou. Pe a fa'ataunu'uina Āna fetalaiga fa'amavae, "Ia outou fealofani, e pei ona 'Ou alofa atu iā te outou" (Ioane 15:12); pe a tatou alolofa i le lalolagi e pei ona Ia alofa i ai, ona mae'a lea o Lana galuega mo i tatou. Ua sauni i tatou mo le lagi; auā ua i ai le lagi i o tatou loto. DA 641.3 (FNT 501.6)

(3) O AI LE POGAI O LE ALOFA MA O LE Ā LE MEA E TATAU ONA TUPU IĀ I TATOU ONA MAFAI LEA ONA FA’AAOGĀ?

Le ‘au pele e, ia tatou feālofani; auā mai le Atua le alofa; o i latou uma fo’i o ē alolofa ua fanau mai i latou mai le Atua, ua iloa fo’i e i latou le Atua. I Ioane 4:7

MAU E TAU I AI: I Tesalonia 3:12; 4:9; II Tesalonia 3:5; II Timoteo 1:7; Roma 5:5

E fafagaina le agaga mai alavai o le alofa o lo’o tafe maile finagalo o Keriso, e pei o se punāvai e lē mafai ona mavae. Oi le loto ua fa’ate’ia, o ōna fuafuāga e maoa’e, e loloto ōna mana’oga, e ala mai i lenei feso’ota’iga! E ala mai lalo o le a’oa’oga ma le ta’ita’iga a le Agaga Pa’ia, o le fanau a le Atua e alofa le tasi i le tasi, e moni, e fa’amaoni, e afaina tatau - “e lē alofa fa’apito, e lē fa’atagā fai” (Iakopo 3:17). Ma o lenei mea e tupu ona o lo’o i ai le alofa mo Iesu i le loto. O lo tatou alofa o le tasi i le tasi e tupu mai i lo tatou vā ma le Atua. *Letter 63, 1896*

O le alofa o le fa’avae o le ola fa’ale-Atua. Pe o le ā le galuega, e leai se tagata e ato’atoa le alofa i le Atua vaganā ua i ai iā te ia o le alofa mo lona uso a e lē o le loto fa’apito. Peita’i e lē mafai ona tatou maua lenei agaga pe a na o na tatou taumafai e alofa i isi. O le mea e mana’omia o le alofa o Keriso ia i ai i le loto. Pe a so’ofatasi ‘oe ma Keriso, o le a mānu a’e ai le alofa. E maua le ato’atoa o le uiga fa’a-Kerisiano ina ua oso a’e pea mai totonu le fa’anaunau e fesoasoani ma fa’amanuia i isi - pe a fa’atumulia le loto i le malamalama o le lagi ma e fa’aalia mai lea i foliga. *COL 384.2 (AFTK 158.4)*

(4) O LE Ā LE MEA E MAFAI ONA FA’ATAUNU’UINA E LE MANA O LE ALOFA?

O le ‘ino’ino e fa’atupu ai misa; a o le alofa e ufiufi ai solitulafono uma lava. Fa’ata’oto 10:12

MAU E TAU I AI: Pese a Solomona 8:6, 7; I Ioane 4:18; Roma 13:10

O le alofa e malosi. O le atamai ma le malosi tatau e a’afia i lenei ta’iala, ma e lē mafai ona vavae ‘ese mai ai. O le mana o le tamā’o’aiga e tauau ina fa’aleaga ma fa’aumatia ai; o le pule a le fia fa’amalosi e malosi ina ia fa’atigā ai; peita’i o le silisili’ese ma le tāua o le alofa moni e atoa ai le fiafia e fai mea lelei, ma e lē faia ai se isi mea a e na’o le lelei. Pe o le ā lava se isi mea e faia mai le alofa moni, po o le ā le itiiti pe o le fa’atauva’a i le va’ai a le tagata, e ato’atoa ona fua mai; auā e fa’atatauina e le Atua le alofa na tu’u i ai i le galuea’iina i lo o le tele o mea na faia. O le alofa e mai le Atua. O le loto e salamō e lē mafai ona amataina pe gaosia lenei la’au e tupu a’e fa’alelagi, ona e ola ma tupu lelei i le mea o lo’o nofotupu ai Keriso. *2 T 135.1*

E lē mafai ona ola le alofa a e leai se fa’agaoioiga, ma o gaoioiga uma e fa’ateleina, fa’amalosia, ma e fa’alauteleina ai. E manumalō le alofa pe a ‘ave’esea le malosi o finauga ma puleaga. E lē galue le alofa ia sili a’e ai pe maua ai se tau; peita’i ua fa’au’uina e le Atua le mea tele e maua mai le i’uga o galuega uma e faia ma le alofa. E lautele lona uiga ma e galue filemū, a e a maoa’e ma malosi ōna fuafuāga ina ia fa’ato’ilalo ai mea leaga. O le a fa’aliua le olaga o le tagata agasala ma fa’aafāina ai le loto e ui ina lē manuia mai isi taumafaiga. So’o se mea e fa’aaogā ai le mana o le poto, pulega, po o le tau fa’amalosi, ma e lē o fa’atino ai le alofa, o le a fa’ateteleina fo’i le tete’e malosi a ē o lo’o sa’ili e galue ai se lelei. O Iesu o le Ali’i o le Filemū. Na afio mai o Ia i le lalolagi e tu’u’ese le tete’e ma le pule malosi a e gaua’i atu iā te Ia. E mafai e Ia ona fa’atonu le poto ma le malosi, peita’i o ala e Na te fa’aaogāina ina ia fa’ato’ilalo ai le leaga, o le poto lea ma le malosi o le alofa. Ia ‘aua ne’i vavae ‘eseina ‘oe mai lau galuega se’ia silasila mai le Atua ua o’o i le taimi e tu’u mai ai iā te ‘oe se isi galuega i le mea lava e tasi. ‘Aua ne’i sa’ili mo le fiafia, ona e lē mafai ona maua pe a sa’ili i ai. Ia e faia lou tiute. Ia fa’ailogaina galuega uma i le fa’amaoni, ma ia fa’aofuina i le loto maulalo. *2 T 135.2*

(5) E FA’APEFEA IĀ I TATOU LE MAFAI ONA ALOFA I ISI FA’APEI ONA ALOFA KERISO MA FA’ATAUNU’U AI LE TULAFONO?

Ia outou au'auna le tasi i le tasi i le alofa. Auā ua ato'atoa le tulafono uma lava i le 'upu e tasi, o lenei, Ia e alofa atu i lē lua te tuā'oi, ia pei o 'oe lava iā te 'oe. Kalatia 5:13, 14

MAU E TAU I AI: Kalatia 6:2; Ioane 15:12, 13; I Ioane 3:16-18; Eperu 13:16; Efeso 5:1, 2

Pe afai e tele le mea na faia e le Mamalu o le lagi e fa'aali mai ai Lona alofa mo le tagata, o le ā se mea o le a lē mafai e le tagata ona faia e fesoasoani atu ai lē tasi i le tasi mai le lua o le pogisā ma le puapuagā! Ua fetalai Keriso, “Ia outou fealofani, pei ona ‘Ou alofa atu iā te outou” (Ioane 15:12); e lē o se alofa e sili atu; auā, “E lē sili lava le alofa o se tasi i lenei alofa, ia tu'uina atu e se tasi lona ola e sui a'i āna uō” (F 13). O le tele o taimi o la tatou alofa e mai le loto fa'apito, ona e tatou te puipua i le mea ia fa'agata mai ai. Pe a tatou ō lalata i le so'otaga ma le mafutaga ma Keriso, o le tatou alofa ma le tigāalofa ma a tatou galuega fesoasoani o le a taunu'u i le loloto ma o le a fa'alauteleina ma fa'amalosia i le fa'aaogāina. Ia lautele e pei o le lalolagi le alofa ma le fīafia o ē mulimuli iā Keriso. O i latou e ola “mo a'u ma na o a'u lava” o le a lē 'ausia le lagi. O lo'o vala'auina 'oe ma lou aiga e Keriso ina ia fa'atupu le alofa, ia lē na o le fa'atatau na o 'oe lava ia a e ia e manatu i mafatiāga ma tofotofoga a isi. O lenei manatu fa'apito na e fa'apele i lou olaga atoa o lo'o fa'asino sa'o i le faitaulaga ma le Sā Levī lea na ui mamao ane i le isi itū. Na lē va'ai o lo'o mana'omia e le tagata puapuagatia le fesoasoani, a e na lā alo'ese mai iā te ia. 3 T 529.2

O le alofa o Keeriso e loloto ma fa'amaoni, e tafe mai e pei o le vaiola mo i latou uma o le a taliaina. E leai se manatu fa'apito i Lona alofa. Pe a o se fa'avae e tumau i lou loto lenei alofa fa'alelagi, o le a fa'ailoa mai lava, e lē ia na o latou o ē pele i a tatou vā fealoa'i, peita'i i a i latou uma e tatou te feso'ota'i. O le a ta'ita'i ai i tatou e fai mea laiti mo isi, ia fesoasoani ma agalelei, ia tautala ma le agamalū ma 'upu moni e fa'amalosi atu ai. O le a ta'ita'iina ai fo'i tatou ia tigāalofa mo ē o lo'o mana'omia se fa'amalosi'aga. MS 17, 1899

(6) O LE Ā LE MEA E FA'AALIA MAI E LE TATOU ALOFA MO O TATOU USO Ā TAGATA E FA'ATATAU I LE TATOU VĀ FEĀLOA'I MA LE ATUA?

E le'i va'aia lava le Atua e se tasi; a tatou fealofani, ua tumau le Atua i totonu iā te i tatou, ua ato'atoa fo'i le alofa iā te Ia i totonu iā te tatou. I Ioane 4:12

MAU E TAU I AI: I Ioane 4:16, 20; 3:10; 3:14, 17; 5:2; Ioane 13:34, 35; 15:14, 17

O le alofa i tagata o le fa'atinoina fa'ale-lalolagi lea o le alofa o le Atua. O le totōina o lenei alofa, ia 'avea ai i tatou o fanau a le aiga e tasi, ina ia 'avea le Tupu mamalu o se tasi o i tatou. Pe a fa'ataunu'uina Āna fetalai fa'amavae, “Ia outou fealofani, e pei ona ‘Ou alofa atu iā te outou” (Ioa. 15:12); pe a tatou alolofa i le lalolagi e pei ona Ia alofa i ai, ona mae'a lea o Lana galuega mo i tatou. Ua sauni i tatou mo le lagi; auā ua i ai le lagi i o tatou loto. DA 641.3 (FNT 501.6)

O le tala i le Samaria agalelei o le fa'avae lava lea e fa'ataunu'uina ai le tulafono, ma na fa'aalia i le soifuāga o Iesu. Ua fa'aalia mai le uiga o le “alofa i le tuā'oi pei o 'oe lava iā te 'oe,” ona o le tāua o lea tulafono i Ōna uiga ma Lana amio, e fai ma molimau i le uiga moni o tulafono fa'ale-lagi pe a fa'atino mai i o latou olaga o le alofa, agalelei, ma le loto fīafia mo so'o se tasi. O lea le molimau e ta'utino ai le fa'amaoni o 'upu a le perofeta, “E fa'amaoni poloā'iga a Ieova, e fa'apotoina ai lē ua faigofie” (Sala. 19:7). A lē fa'atinoina e le tagata lenei alofa o lo'o ta'utino e talitonu i ai, ua lē tausia e ia le tulafono; auā o le agaga lava e fa'aalia ai le alofa i uso ā tagata, o le agaga lava lea e fa'aali atu ai lo tatou usiusita'i i le Atua. O le alofa moni i le Atua e puna mai ai le loto alofa mo lē tatou te tuā'oi. Ua fa'amalamalamaina mai e le aposetolo, “Pe afai e fa'apea mai se tasi, 'ou te alofa i le Atua,' a e ita i lona uso, o le pepelo lava ia; auā o lē e lē alofa i lona uso ua ia va'ai atu i ai, pe mafai fa'apefea ona alofa o ia i le Atua ua ia lē va'ai atu i ai?” (I Ioa. 4:20). Ma ua fa'apea mai, “Le 'au pele e, a tatou feālofani ua tumau le Atua i totonu iā te i tatou, ua 'ato'atoa fo'i le alofa iā te Ia i totonu iā te tatou” (I Ioane 4:12). DA 505.1 (FNT 395.5)

(7) I LE FA'ATA'OTO O LE SAMARIA AGALELEI, O LE Ā LE FA'ATA'ITA'IGA NA A'OA'O MAI MA FAIA E KERISO?

O le poloa'iga fou 'Ou te tu'u atu ai iā te outou, ia outou fealofani; fa'apei ona 'Ou alofa atu ia te outou, ia fealofani fo'i outou. Ioane 13:34

MAU E TAU I AI: Ioane 13:35; Kalatia 6:2; Roma 12:10

Sa tu'uina atu e Iesu i le tala i le Samaria agalelei se āta e fa'asino lava iā te Ia ma le uiga o Lana galuega i lenei lalolagi. Ua fa'aseseina le tagata e Satani ina ua ia fa'alata, fa'asooso, fasi, ma gaoi ana mea ma lona agaga, ona tu'ulafoa'i ai lea o ia a oti. Ua silasila ifo le Fa'aola i le tulaga pagātia ua tatou i ai, ona tu'ua ai lea o Lona mamalu a e afio ifo e fa'asao iā i tatou. Na Ia fa'amamā ma fusifusi o tatou manu'a, ma ufiufi i tatou i Lona 'ofu o le amiotonu. Sa Ia ta'ita'i i tatou i le sulufa'iga e malu ai, ma Ia totogi 'atoa mo le tausiga o i tatou. Na i'u ina maliu Ia, o le togiola mo i tatou. DA 503.6-504 (FNT 394.5-395)

Sa fa'ataunu'u e le tagata Samaria le poloa'iga, "Ia e alofa atu i lē lua te tua'oi ia pei o 'oe lava iā te 'oe," ma na fa'aalia ai e sili atu lona amiotonu i lo o latou o lo'o ta'uleaga iā te ia. E le'i fa'atāuaina e ia lona lava ola, a e na ia tausī le tagata manu'a e pei o sona uso. O lenei Samaria e fa'asino lea iā Keriso. Ua fa'aalitinoina e lo tatou Fa'aola se alofa mo i tatou e lē mafai ona fa'atusaina i se alofa fa'aletagata. A o manu'a ma toe a oti i tatou, ua silasila ifo ma le tigāalofa o Ia; Na te le'i ui ane i le tasi itūala, ma tu'ulafoa'i i tatou ia fano, e leai se fesoasoani ma se fa'amoemoe. E le'i afio mau o Ia i Lona aiga pa'ia ma le fiafia, e fa'amamaluina ma alofagia e 'au uma o le lagi. Ua Ia silafia o tatou mana'oga, tau'ave o tatou tigā, ma tu'u Ia i le tulaga e fa'atasi ai ma i latou o le aigātagata. Na maliu o Ia e fa'asaoina ai Ōna fili; ma tatalo mo ē sa fasiotia o Ia. A o fa'asino i Lana lava fa'aa'oa'o, sa Ia fetalai atu i Ōna so'o, "'Ou te fai atu ia te outou ia mea, ina ia outou fealofani;" ma "fa'apei ona 'Ou alofa atu iā te outou, ia fealofani fo'i outou" (Ioane 15:17; 13:34). COL 381.1 (AFTK 157.2)

(8) O LE Ā LE MEA E SILI ATU ONA TAUTALA LEO TELE I LO 'UPU I LE OLAGA O SE TASI O LO'O TA'U MAI O IA O LE "KERISIANO?"

A ia fai outou ma ē 'ana'ana i le 'upu, a e 'aua le na ona fa'alologologo i ai, o fa'aseseina ai outou e outou. Iakopo 1:22

MAU E TAU I AI: Ioane 13:35; 8:31; Mataio 5:14-16; Luka 11:28

E itiiti le a'afiāga i luga o le lalolagi mai 'upu moni fa'aleagaga, ona e tataua ona fa'aalia le aogā e ala i a tatou gaoioiga. E itiiti le mamafa pe a na o le tele o le ta'uta'u atu o lo tatou tulaga fa'aleagaga. Atonu e tatou te ta'u atu o tatou o so'o o Keriso, atonu fo'i tatou te fa'aailoa atu e talitonu i 'upu moni uma o le afioga a le Atua; peita'i e lē maua se lelei e o tatou tua'oi se'i vaganā ua fa'atinoina i o tatou olaga i aso ta'itasi. Atonu e o'o i le lagi le maua luga o lo tatou lelei, peita'i e lē fa'asaoina ai tatou po o se tasi o tatou uso a tagata se'i vaganā pe a o tatou o Kerisiano moni. O le a tele atu le lelei e maua e le lalolagi mai le fa'aa'oa'oga sa'o i lo molimau uma e tu'u atu. COL 383.2 (AFTK 158.1)

E leai ni gaoioiga e faia fa'apito o le a mafai ona aogā i le fuafuāga a Keriso, ona o Lana galuega e faia lea mo ē matitiva ma puapuagātia. E mana'omia le tigāalofa o Keriso i loto o ē ta'ua o Ōna so'o - se alofa e loloto mo ē sa matuā tāua iā te Ia, na tu'uina ai Lona lava soifua mo lo latou fa'aolataga. O nei agaga e tāua, e aupito sili le tāua i lo se isi taulaga e mafai ona tatou aumaia i le Atua. Pe o le tu'uina o lo tatou malosī atoa e fai ai se galuega tele, a e o le a tatou lē amana'ia ai lē o mafatia pe talu'ese mai mana'oga o le tagata 'ese, e lē o se galuega lea o le a Ia fa'amanuia. COL 383.3 (AFTK 158.2)

(9) O LE Ā LE MEA NA TU'U MAI E LE ATUA, I SE FA'AALIGA OFOFOGIA O LONA ALOFA, I LE AIGĀ TAGATA UA PA'Ū?

Auā ua fa’apea lava ona alofa mai o le Atua i le lalolagi, ua Ia au mai ai Lona Atali’i e to’atasi, ina ia lē fano se tasi e fa’atuatua iā te Ia, a ia maua e ia le ola e fa’avavau. Ioane 3:16

MAU E TAU I AI: Roma 5:8; I Ioane 4:9; 3:1

Na filifili le Atua e tu’u i tagata ola fa’amaoniga o le alofa o lo’o Ia fa’atatauina mo i latou. Ua Ia “alofa mai... i le lalolagi, ua Ia au mai ai Lona Atali’i e to’atasi, ina ia lē fano se tasi e fa’atuatua iā te Ia, a ia maua e ia le ola e fa’avavau” (Ioane 3:16).... CH 222.1

Sa fa’agae’eina le Aiga-Atua i le alofa mutimutivale mo le tagata, ma na tu’u loa e le Tamā, le Ālo, ma le Agaga Pa’ia mo i latou ina ia galueina se fuafuāga o le togiola. Ina ia fa’aauau lenei fuafuāga, sa filifili ai o Keriso, le Ālo pele e to’atasi, e tatau ona tu’u atu Ia e fai fa’ataulaga mo agasala. O le ā se laina e mafai ona fuaina le loloto o lenei alofa? O le a fai e le Atua se mea ia lē toe fa’apea ai le tagata e le’i lava lea mea na Ia faia. Na Ia tu’u mai Keriso e lē mafa’atauina ia leai se mea e toe mana’omia i le fuafuāga mo le si’itiaina o le tagata. O le alofa lenei - a mafaufau loloto i ai, e tatau ona fa’atumulia ai le loto i le fa’afetai e lē mafa’amatalaina! Oi, se alofa e lē mafai ona fa’atusaina! A mafaufau i lenei alofa o le a fa’amamāina ai le loto mai le manatu fa’apito. E ta’ita’iina ai le so’o e tu’u’ese ia lava, tau’ave le satauro, ma mulimuli i le Fa’aola. CH 222.2

E fusimauina tagata uma lava e le alofa o le Atua, peita’i e na o i latou e tali mai i ai o le a maua se aogā. E mana’omia e le alofa feāloā’iga ina ia i’u lelei ai. O le mea e sili le tāua, o le alofa o le Atua e fusimau mai ai i latou e tete’e i ai a e fa’apea fo’i ma i latou e taliaina. E lē mafai e se tasi o le a lēiloa ona tu’ua’ia le Atua, fa’apea e lē alofa iā i latou. 5 BC 929

(10) O LE Ā LE FA’AALIGA O LE ALOFA E AUPITO SILI LE MAOA’E, MA LE TAULAGA OFOFOGIA NA FAIA E KERISO MO I TATOU?

E le sili lava le alofa o se tasi i lenei alofa, ia tuuina atu e se tasi lona ola e sui a’i ana uo. Ioane 15:13

MAU E TAU I AI: Ioane 10:11; Roma 5:6, 7; Efeso 5:2; Filipi 2:8

Na fa’apefea ona fa’aalitinoina e Keriso Lona alofa mo i tatou tagata e tino pala? E ala i le fa’ataulagaina o Lona Ia lava mamalu, o Āna lava oloa, ma Lona ia lava soifua pele. Na fa’atagaina e Keriso se soifuāga e matuā maualalo ma mafatiāga e tele. Na Ia gaua’i atu i tauēmuga sauā a le motu e fia fasioti tagata, ma le maliu e aupito tigāina i luga o le satauro. Na fetalai Keriso, “O La’u poloa’iga lenei, ia outou fealofani, pei ona ‘Ou alofa atu iā te outou. E lē sili lava le alofa o se tasi i lenei alofa, ia tu’uina atu e se tasi lona ola e sui a’i ana uō” (Ioane 15:12-13).

O lo’o tatou maua fa’amanuiāga uma fa’alelalolagi ona o le tautele e lē mafa’agataina na totogiina mo i tatou. Pe afai e tele le tau na togiolaina ai le tagata, ina ia lē fano o ia, a e maua le ola e fa’avavau, ia tatau loa ona fa’afiafiaina i tatou i le avanoa e ‘avea ai ma ē galulue fa’atasi ma Keriso e lavea’i i latou na Ia tu’u atu ai Lona soifua pele! E alofa le Ali’i iā i latou na fai ai e Ia le taulaga aupito maoa’e. Na Ia tu’u atu Lona Ia lava soifua pel ia aumai ai le ola ma le ola e tumau i le malamalama iā i latou uma o ē talitonu. “O le ola e fa’avavau fo’i lenei, ia latou iloa ‘Oe le Atua moni e to’atasi, atoa ma Lē ua E ‘auina mai, o Iesu Keriso lea” (Ioane 17:3). O i latou uma ua talia Keriso e fai latou ma Ōna soa i le la galuega e faia fa’atasi. O le a latou usiusita’i i Āna fetalaiaga. O le a ta’ita’iina latou e ala i le Agaga Pa’ia, o le a fa’apotoina i latou e fa’ataau i mea e finagalo i ai le Atua, ma o le a fa’aali mai ai le alofa ma le alofa tunoa sa fa’aalia i le soifuāga o Keriso mo i latou o ē na fa’afeagai ma Ia. R & H, Jan. 14, 1896; SW 53.1

(11) E FA’APEI O PAULO, O LE Ā LE AUTŪ TELE LAVA E TATAU ONA TAUTALA AI O TATOU LAUGUTU MA TEU PEA I O TATOU MAFAUFAU?

Auā na tonu lo’u manatu, ‘ou te lē iloa se tasi mea iā te outou tau lava o Iesu Keriso, o Ia lava na fa’asatauroina. I Korinito 2:2

MAU E TAU I AI: Efeso 3:17-19; Roma 5:6-8

Oi se autū pe a mafaufau loloto i ai, o le taulaga na faia e Iesu mo tagata agasala ua lē iloa! “A ua manu’a o Ia ona o a tatou solitulafono, ua momomo o Ia ona o a tatou amio leaga; o le a’oa’iga e filemū ai tatou sa i Ōna luga lea, o Ōna fa’alavalava fo’i ua malōlō ai tatou” (Isaia 53:5). E fa’aapefea ona tatou fuaina fa’amanuiāga ua tu’u mai i o tatou luma? Mata na mafai e Iesu ona so’ona puapuagātia ia sili atu? Na mafai ea e Ia ona totogiina mo i tatou nisi fa’amanuiāga e sili atu le tau? E lē mafai ea ona fa’avaivaia ai loto e pito ma’a’a pe a tatou manatu ifo o tatou na Ia tu’ua ai le fiafia ma le mamalu o le lagi, na mafatia i le mativa ma le fa’atauēmu, sauāina ma i’u ai i se maliu mata’utia? Na te le’i tatalaina ea mo i tatou, e ala i Lona maliu ma le toe tū a’e, le faitoto’a o le fa’amoemoe, a e pau le mea sa tataua ona tatou iloa o le mata’utia lea o le pogisā ma le leaga o le atuatuva. I le tulaga o lo’o tatou i ai nei, e fa’apele ma fa’amanuiaina, e lē mafai ona tatou iloa pe o fea le loloto na fa’asao mai ai tatou. E lē mafai ona tatou fuaina le loloto atonu o le a o’o i ai o tatou mafatiāga, pe fa’aapefea le tetele o tatou puapuagā, pe ana lē si’omiaina i tatou e Iesu i Ōna ‘a’ao fa’aletagata o le alofa ma le tigāalofa, ma si’itia a’e ai tatou i luga. 5 T 316.1

E to’atele ē ta’u mai o Kerisiano a e fiafia e fuafuāga fa’alelalolagi, ma fafaguina o latou mafaufau mo mea ma fa’afiafiāga fou, a o latou loto o lo’o malūlū pei ua fa’ama’aliliina i ala o le Atua. O lenei se matā’upu tāua ia fa’afiafia ai ‘oe, e fa’ataua i le ola e fa’avavau. O va’aiga i Kalevario e matuā afāina ai le to’ele o ōu lagona ma o le a fa’agae’etia ai ‘oe. O Keriso e ato’atoa le mamā, e leai se agasala, a e na puapuagātia i se maliu mata’utia, na tau’aveina le mamafa o agasala a le lalolagi, e matuā’i lē mafai e o tatou mafaufau ma manatunatuga ona malamalama lelei i ai. O le lautele, le mauuluga, le loloto o lenei alofa ofoofogia e lē taitai mafai ona ofi i o tatou mafaufau fa’atauva’a. O le fuafuāga o le loloto e lē mafa’atusaina o le alofa o le Fa’aola, e tataua ona fa’atumulia ai le mafaufau, fa’ao’otia ai le agaga, fa’amamā ma si’itia a’e ai lagona, ma suia ato’atoa ai le amio. O le gagana a le aposetolo e fa’apea, “Auā na tonu lo’u manatu, ‘ou te lē iloa se tasi mea iā te outou tau lava o Iesu Keriso, o Ia lava na fa’asatauroina” (1 Korinito 2:2). Ia tatou tepa aga’i atu i Kalevario ma fa’apea atu, “A o a’u, ‘aua ne’i ‘ou mitamita i se mea, tau lava o le satauro o lo tatou Ali’i o Iesu Keriso, o Ia ua fa’asatauroina ai le lalolagi iā te a’u, o a’u fo’i i le lalolagi” (Kalatia 6:14). 2 T 212.3

Ua ‘ou iloa o le alofa a e lē o le agava’a e fa’ailogaina ai le so’o moni o Keriso.

Li’o le Tali:	Ioe	Lē Mautonu
----------------------	------------	-------------------

Ua ‘ou va’ai o le fa’atinoina pea o le alofa, e lē o mea lelei e seāseā faia, o fa’amaoniga tonu ia o faigā so’o moni.

Li’o le Tali:	Ioe	Lē Mautonu
----------------------	------------	-------------------

‘Ou te iloa e moni o le loto e lē salamō e lē mafai ona amataina pe aumaia se alofa. O le Atua o le Pogai ma o Lē e aumaia lea ma e mau ma tuputupu lelei i le mea e nofotupu ai Keriso.

Li’o le Tali:	Ioe	Lē Mautonu
----------------------	------------	-------------------

‘Ou te ōle atu, e ala i le alofa tunoa, o le a fa’aalia Lona uiga iā te a’u ina ia e ui mai le alofa, o lea uiga o le a tupu mai totonu e fesoasoani ma fa’amanuiaina ai pea isi.

Li’o le Tali:	Ioe	Lē Mautonu
----------------------	------------	-------------------

MANATU FA’AOPOPO

TATALO MANA’OMIA

TALI O TATALO

Faigāuō e Tumau

Lesona 12

E fa’avae lenei lesona i le Ioane 15:14, 15.

(1) PE A TATOU ALOLOFA MA FA’AMAMALUINA KERISO I LE TATOU USIUSITA’I, O LE Ā LANA FA’ATATAU IĀ I TATOU?

O A’u uō outou, pe afai tou te faia mea uma lava ‘Ou te fai atu ai iā te outou. Ioane 15:14

MAU E TAU I AI: Ioane 14:21, 23; Isaia 41:8; Iakopo 2:23, 24

O i latou e ola i se mafutaga e vā lalata ma Keriso, o le a Ia si’itia i se tulaga e fa’atuatua. O le au’auna e faia mea e sili ona lelei mo lona Matai o le a fa’atagaina e feso’ota’i ma Lē o ana poloa’iga e fiafia e tausi. Pe a tatou galulue ma le fa’amaoni, atonu o le a mafai ai ona tasi tatou ma Keriso, ona o latou o ē o lo’o usiusita’i i poloa’iga a le Atua e mafai ona talatalanoa ma Ia. O le a talanoa masani ma lana ta’ita’i fa’alelagi e iloa mautinoa e ia Lona maoa’e ma e matuā sili ona usita’i i Āna poloa’iga. *TMK 296.2*

O le amio a lē e sau i le Atua i le fa’atuatua o le a molimau o lo’o mafuta le Fa’aola i lona olaga, pulea mea uma, ma o lo’o afāina ai mea uma. O ia lea e fesili pea, “O Lou finagalo ea lea ma le ala, lo’u Ali’i Fa’aola e?” E tepa pea ia iā Iesu, “o Lē na te ta’ita’iina ma Lē na te fa’a’ato’atoaina le fa’atuatua” (Eperu 12:2). E sa’ili ia i le finagalo o lana Uō fa’alelagi e fa’atatau i āna fa’agoioiga uma, auā e na te iloa o lona malosi e mai lenei talitonuga. Ua fai ma ana masani le si’itia a’e o le loto i le Atua i so’o se fa’afitauli. *TMK 296.4*

O lē e talia le Atua e fai ma ōna matai e tatau ona fa’atautōina lona fa’amaoni ato’atoa iā te Ia. E tatau iā te ia ona ofu i le la’ei fa’a-Kerisiano ma tau’ave le fu’a e fa’aailoa atu ai lana ‘autau. E tatau ona tautō atu i luma o tagata o ia e tū fa’amaoni ma Keriso. E leai se mea e mafai ona nātia. O lona fa’amaoni iā Keriso e tatau ona fa’aalia i le olaga i galuega ua fa’apa’iaina. *TMK 296.5*

(2) E FA’APEFEA ONA FA’AALITINOINA I ASO TA’ITASI E LO TATOU TAMĀ FA’ALELAGI LANA FAIGĀUŌ MA I TATOU?

Lo’u agaga e, ia e fa’amanū atu iā Ieova, ‘aia fo’i ne’i galo se mea e tasi o Āna meaalofa; o Lē fa’amagaloina āu amio leaga uma lava; o Lē fa’amalolōina ōu ma’i atoa uma; o Lē fa’aolaina mai lou ola ai le tu’ugamau; o Lē fa’apaleina ‘oe i le alofa ma le alofa mutimuti vale; o Lē e mālīe ai lou mana’o i mea lelei; o Lē fa’afouina lou taule’ale’a fa’apei o le aeto. Salamo 103:2-5

MAU E TAU I AI: Salamo 103:6-18; Auēga 3:22, 23; Mataio 7:11

“Ia vivi’i atu iā Ioa o mea uma lava e mānava. Ia outou vivi’i atu iā Ioa” (Salamo 150:6). O ai se tasi o tatou e fa’atatauina pe fia le tele o mea o lo’o tatou maua e tatau ona fa’afetai ai? Tatou te manatua o fa’amanuiāga a le Ali’i e fou i taeao ta’itasi ma e lē mavae Lona fa’amaoni? E tatou te fa’aailoa atu o tatou e fa’alagolago iā te Ia ma e fa’aali le agaga fa’afetai mo Āna manuia uma? E lē fa’apea, ona o le tele o taimi e galo iā tatou, “o mea lelei uma e foa’ifuaina mai, atoa ma mea alofa uma e ato’atoa ona lelei, mai lugā lava ia, e alu ifo mai le Tamā o malamalama” (Iakopo 1:17). *5 T 315.1*

O le to’atele o ē o lo’o soifua malolōina e galo fa’amanuiāga ofoofogia o lo’o latou maua pea i aso ta’itasi, pe tau tausaga fo’i. Latou te lē ‘ave a’e se vi’iga fa’afetai mo Āna mea lelei uma. Peita’i pe a o’o mai ma’i, ona manatua lea o le Atua. O fa’anaunaga ia toe fa’afo’i mai le malosi o le a ta’ita’iina ai tatou ia tatalo ma le fa’amaoni, o lea le mea e tatau. O le

Atua lo tatou sulufa'iga malu i taimi uma. Peita'i e to'atele ē e lē aumaia o latou mana'oga i Ōna luma; e latou te fa'ala'e'i'au le lotovaivai ma fa'ama'i ona o le popole. E fa'afo'i vave le tino malolōina pe a tu'u'ese le atuatuva'e ma le popolevale. E tatau ona manatua le tele o taimi o fa'amanuiaina i le soifua malolōina; ma a toe manuia ia lē galo le Atua o le foafoāga e aumaia mea lelei uma. Ina ua fa'amalōlō e Iesu lepele e to'asefulu, na o le to'atasi na fo'i ia maua Keriso ma tu'u i ai se fa'amamaluga. Ia lē pei tatou o le to'aiva, ma loto e le'i afāina i le alofa tunoa o le Atua. 5 T 315.2

(3) E FA'APEI O PETERU MA IOANE, O LE A FA'APEFEA ONA TATOU TALI ATU INA UA FEAGAI MA LE FAIGĀUŌ MONI A KERISO?

Auā ma te lē mafaia ona lē tautala i mea ua ma va'ai i ai ma fa'alogo i ai. Galuega 4:20

MAU E TAU I AI: Galuega 1:8; 18:5; 22:14, 15; II Samuelu 23:2

Pe a sau loa le tagata iā Keriso, o le a oso a'e i le loto le naunau ia fa'a'ailoa atu i isi ua ia maua se uōpele iā Iesu; o le 'upu moni e fa'asao ma fa'apa'iaina ai, o le a lē mafai ona fa'alilo i totonu o lona loto. Pe a o o'ofu i tatou i le amiotonu o Keriso, ma fa'atumuliaina i le fiafia o Lona Agaga o lo'o mafuta ai, o le a lē mafai ona taofia lo tatou filemū. Pe a ua tatou tofo i ai ma iloa e lelei le Ali'i, o le a iā i tatou se mea e tatau ona tatou ta'u atu. AG 305.3

O le a taumafai e fa'amanuia isi o le a taliina fa'amanuiāga o lo'o i o tatou luga. O lea le fuafuāga a le Atua i le tu'uina mai o se vaega iā i tatou e faia i le galuega o le fa'aolataga. AG 305.4

Pe afai o le a e alu e galue fa'apei ona fuafua e Keriso o le a faia e Ōna so'o, ma maua mai agaga mo Ia, o le a e lagona e mana'omia se faiga e loloto ma o le a iloa mea fa'aleAtua, ma o le a fia 'ai ai ma fia inu mo le amiotonu. O le a e ole atu i le Atua, ma o le a fa'amalosia lou fa'atuatua, o le a e inu loa i le loloto o le vai'eli o le fa'aolataga. O le a e sulufa'i i le Tusi Pa'ia ma le tatalo pe a feagai ma tofotofoga ma le tete'e mai. O le a e tuputupu a'e i le alofa tunoa ma o le a iloa Keriso, ma o le a atina'e ai se olaga galue e fa'amanuiaina. AG 305.5

(4) O LE Ā LE MOLIMAU FA'AMAONI A SE FAIGĀUŌ E TUMAU IĀ KERISO?

O A'u uō outou, pe afai tou te faia mea uma lava 'Ou te fai atu ai iā te outou. Ioane 15:14

MAU E TAU I AI: Ioane 14:15; Mataio 12:50; I Ioane 2:5; Eperu 10:38

Ua fetalai Keriso, "Afai tou te alofa mai iā te A'u, ia outou tausi mai i A'u poloa'iga" (Ioane 14:15). O le tulaga lenei na tu'u mai; o lenei le tofotofoga e fa'amaonia ai amio a tagata. O le tele o taimi e taufa'asesē fa'alagona, o lagona e lē mautinoa o le a puipuia ona e fesuisuia'i ma e 'a'afia mai tulaga o mea e i fafo atu. O le tofotofoga lenei: O le ā le mea o lo'o e faia mo Keriso? O ā mea o lo'o e tu'uina atu fa'ataulaga? O ā ni manumalō o lo'o e maua? O se agaga fa'apito ua fa'ato'ilaloina, o le tete'e'ese o se fa'aosoosoga ia lē faia ai se tiute, tu'u 'ese se tu'inaanau, ma o le usiusita'i ma le foliga fiafia e fa'alogo i le finagalo o Keriso, o le fa'amaoniga sili lea e iloa ai o oe o se tasi o le fanau a le Atua i lo o le lelei fa'alialia ma le ola fa'alacagaga e lē mai le loto. 4 T 188.1

(5) O LE Ā LE TĀUA O LE TA'UINA O TATOU O UŌ E KERISO A E LĒ O AU'AUNA?

Ou te lē toe ta'ua outou o au'auna, auā e lē iloa e le au'auna mea e faia e lona ali'i; a ua 'Ou ta'ua outou o uō, auā ua 'Ou fa'a'ailoa atu iā te outou mea uma na 'Ou fa'alogo ai i Lo'u Tamā. Ioane 15:15

O lo'o iā te 'oe le Āta, o Keriso Iesu lea; ia savali i Ōna tulagavae, o le a e mafai ai ona 'avea 'oe ma se tasi e fa'atumulia so'o se tulaga o le a vala'uina ai 'oe. O le a "ia maua'a outou ma ia atiina a'e iā te Ia, ma ia fa'atumauiaina i le fa'atuatua, fa'apei ona a'oa'oina o outou, ia fa'atele i ai ma le fa'afetai" (Kolose 2:7). Ia e lē manatu o 'oe o lo'o nofo fa'apagotā, peita'i o se tasi o le fanau a le Atua; o 'oe e matuā pele ona ua fa'ata'u e tele lou tāua, ua fai 'oe ma mea totino a le Atua e ala i le totogiina o se tau e tele mo lou sa'olotoga. Ua fetalai Keriso, "'Ou te lē toe ta'ua outou o au'auna;... a ua 'Ou

ta'ua outou o uō" (Ioane 15:15). Pe a e lagona lelei Lona alofa ofoofogia, o le a i ai i lou loto le alofa ma le loto fa'afetai e pei o se punāvai o le oli'oli. *FE 303.2*

(6) O FEA O LE A SA'ILI AI LE ALI'I MO SE FA'AMAONIGA E ILOA AI PE O TATOU O ĀNA POLOGA PE O UŌ E TUMAU?

A ua fetalai mai Ieova iā Samuelu, 'Aua e te va'ai i lona tino, po o le mauuluga o lona tino, auā ua 'Ou tete'e iā te ia; auā e lē va'ai Ieova pei o le va'ai o tagata, auā e va'ai tagata i le tino, a e va'ai Ieova i le loto. I Samuelu 16:7

MAU E TAU I AI: I Samuelu 15:22; Fa'ata'oto 21:27; 15:8, 9

O le asō o le taimi o avanoa e mamalu ma fa'amoemoega e pa'ia i au'auna a le Atua. Pe a tausī ma le fa'amaoni nei fa'amoemoe, o le a tele le tau i le au'auna fa'amaoni ma o le a fa'apea mai le Matai, "Tala mai ia le tala i mea na e pule i ai" (Luka 16:2). O le galue fa'amaoni, o le galuega e lē faia ma le loto fa'apito, o le taumafai ma le onosa'i, o le a matuā'i tauia; o le a fetalai mai loa Keriso, Ma le taimi nei o le a 'Ou lē ta'ua outou o au'auna, peita'i o uō, o malō. E lē tauia e le Pule ona o le maoa'e o le galuega na faia, ona o le tele o mea na maua, peita'i ona o le fa'amaoni e tusa lava i mea laiti. E lē o tau i ua maua mai, a e o le agaga na tatou faia ai e sili atu ona tāua i le Atua. E fa'aailoga e Ia le agalelei ma le fa'amaoni e sili atu i lo o le mauuluga o le galuega na mae'a ona fa'ataunu'uina. *2 T 510.2*

(7) E PEI O APERA'AMO, O LE Ā LA TATOU VAEGA I LENEI FAIGĀUŌ MA KERISO?

Sa taunu'u ai fo'i le Tusi, ua fa'apea mai, Na fa'atuatua Apera'amo i le Atua, ona ta'ua ai lea iā te ia e fai ma amiotonu; sa ta'ua fo'i o ia o le uō a le Atua. Iakopo 2:23

MAU E TAU I AI: Kalatia 3:9; Eperu 11:6; Iakopo 4:4

O le fa'atuatua o le fa'amaoniga o le olaga Kerisiano. Pe a e maua le fesoasani ma le fa'amafanafanaga, ia e pese ni vi'iga o le Atua. Talanoa ma le Atua. O le a 'avea ai 'oe ma uō a le Atua, ma o le a e fa'alagolago iā te Ia. O le a e maua se fa'atuatua e mafai ai ona talitonu e tusa pe e te fia fa'atuatuaina pe leai. Ia manatua e lē o se fa'amaoniga lea o 'oe o se Kerisiano. O le fa'atuatua i le Atua e fa'aalia ai o 'oe o se tasi o Lana fanau. Fa'atuatua i le Atua e manuia ai 'oe. Ua Ia fa'apea mai, "Ou te lē tu'ua outou o mātuaoti, 'Ou te sau iā te outou. E toe itiiti ona lē va'ai mai lea o le lalolagi iā te A'u, a e va'ai mai pea outou iā te A'u; 'Ou te ola A'u, o le mea lea e ola ai outou" (Ioane 14:18-19). E tatou te lē va'aia Keriso i le itū tagata, a e ala i le fa'atuatua e tatou te iloa ai o Ia. Ia tatou u'umau i Āna folafolaga e ala i lo tatou fa'atuatua. O le mea lea na fa'apea ai ona savavali Enoka ma le Atua. *MS 27, 1901 (3 MCP 538.2)*

(8) O LE Ā LE 'UPU VALA'AULIA E TATAU ONA FAIA MA FA'AMALOSI'AGA MO I TATOU E SA'ILI AI LE FAIGĀUŌ MA KERISO?

Inā tofotofo ia outou, ma ia outou iloa e lelei Ieova; amu'ia lava le tagata o lē fa'atuatua iā te Ia. Salamo 34:8

MAU E TAU I AI: Mataio 11:29, 30; Efeso 3:17-19

Ona ua pu'upu'u le taimi o lea ua avea ma una'iga ina ia tāua ai le sa'ili o le amiotonu ma ia faia Keriso ma o tatou uō. E lē tatau ona avea lea ma pogai o le tatou filifiliga, ona e fa'aailoa mai o lo'o faia i le manatu fa'apito. E mana'omia ia tu'u mai i o tatou luma faigatā o le aso o le Atua, atonu o le a tatou faia ai le mea tonu ona o le fefe? E lē tatau ona faia fa'apea. O Iesu e tumu i le alofa, alofa tunoa, ma le alofa mutimutivale. E finagalo ia avea tatou ma uō, e tatou te savavali fa'atasi i so'o se ala faigatā o le olaga. Ua Ia fetalai mai iā i tatou, O A'u le Ali'i lou Atua; savalivali ma A'u, ona 'Ou fa'atumulia lea o lou ala i le malamalama. O Iesu le Mamalu o le lagi, e finagalo ia si'itia i luga le mafutaga ma Ia a i latou e ō mai iā te Ia ma a latou avega, o latou vaivaiga, ma mea o lo'o mafatia ai. O le a Ia fa'atatauina i latou Lana fanau, ma i'u ai i le tu'u iā i latou o se tofi e sili ona tāua i lo o malō a tupu, se paleali'i e sili le mamalu ma tautele i lo o se mea na fa'apaleina ai le tupu e aupito maoa'e fa'alelalolagi. *LHU 98.3*

O la tatou tiute o le alofa lea iā Iesu lo tatou Fa’aola. E tatau ona tatou alolofa iā te Ia, peita’i ua Ia vala’aulia i tatou e tu’u atu o tatou loto iā te Ia. O lo’o Ia vala’au i tatou ia savavali ma Ia i le ala o le loto maulalo ma ia usita’i fa’amaoni. O Lana vala’aulia o se vala’au e mamā, e pa’ia ma se olaga e fiafia - se olaga e filemū ma e malolō ai, e sa’oloto ma alofa - ma se tofi e ofoofogia i le ola e fa’avavau o i lumana’i. O le ā sa tatou filifiliga - o le sa’olotoga iā Keriso, pe o le fa’apagotā ma sauāina i le galuega a Satani?...Pe a tatou filifili e fa’atasi ma Keriso i le ola e fa’avavau, aiseā e lē filifilia ai nei o Ia e avea ma uō e sili le alofagia ma e fa’atuatuaina, o la tatou fautua e pito sili ma e aupito maoa’e le atamai. *LHU*

(9) O LE Ā LE MEA O LO’O MANA’OMIA E KERISO MAI IĀ I LATOU O Ē FA’ANAUNAU E MULIMULI IĀ TE IA?

*Ona fetalai atu ai lea o Iesu i Ōna so’o, Ai se tasi e fia mulimuli mai iā te A’u, ‘aia ne’i usiusita’i o ia iā te ia, a ia ‘ave e ia lona satauro, i le mulimuli mai ai iā te A’u. **Mataio 16:24***

MAU E TAU I AI: I Peteru 2:21; Mataio 6:31-33; 5:39-42; 11:29; Mareko 12:42-44

E i ai lava ē foliga mai o lo’o latou sa’ili’ili pea mo le penina fa’alelagi. A e peita’i latou te lē o tu’u ‘ese atoa o latou masaniga sesē. E lē o fa’aumatia e latou o latou lava uiga e masani ai ina ia mafai ai ona soifua Keriso i totonu iā i latou, o lea ua ala ai ona latou lē maua le penina tāua. Latou te le’i fa’ato’ilaloina mana’oga lē pa’ia ma lo latou tu’uina i mea fa’afiafia fa’alelalolagi. Ua latou lē aveina le satauro ma mulimuli iā Keriso i le ala o le fa’afitia o ia lava, ma tu’uina atu ia fa’ataulagafo. O le toe ‘avea ma Kerisiano, a e le’i ato’atoa, e foliga mai ua latou lata atu lava i le malō o le lagi, peita’i e lē mafai ona latou ulufale i ai. O le toeitiiti a e lē o fa’aolaina ato’atoa, o lona uiga, e lē o le toeitiiti a e o le a malaia ato’atoa. *COL 118.1 (AFTK 42.3)*

O tatou o molimau a Keriso, ma e lē tatau ona tatou fa’aaogā le taimi i mea o le lalolagi a e lē amana’ia ai mea na fetalai mai le Atua e tatau ona fa’amamua. “A ia outou mua’i sa’ili le malō o le Atua ma Lana amiotonu; ona fa’aopoopoina atu lea o ia mea uma iā te outou” (Mataio 6:33). Na tu’u atu e Keriso mea uma i le galuega na Ia afio mai e fai, ma o Lana afioga iā i tatou, “Ai se tasi e fia mulimuli mai iā te A’u, ‘aia ne’i usiusita’i o ia iā te ia, a ia ‘ave e ia lona satauro, i le mulimuli mai ai iā te A’u” (Mataio 16:24). “O O’u so’o moni outou” (Ioane 8:33). Na fiafia Keriso e tu’u atu Ia lava ina ia fa’ataunu’u le finagalo o le Atua. Na usiusita’i o Ia se’ia o’o i le oti, e o’o lava i le maliu i luga o le satauro. O le a tatou lagona ea e faigatā ona tete’e i tatou lava ia? E tatau ea iā i tatou ona ‘alo’ese mai a e lē fa’asoa ma Ia i Ōna mafatiāga? E tatau ona fa’agae’etia itūtino uma mai Lona maliu, a ia tatou loto malie e fa’apa’ia ato’atoa i tatou mo Lana galuega. Pe a tatou manatunatu i mea uma na Ia faia mo i tatou, e tatau ona fa’atumulia o tatou loto i le alofa. *MYP 314.3*

Pe a fa’afitia e ‘oe lava ia le loto fa’apito o lo’o tu’u mai i le afioga a le Atua, o le a alu malosi loa le fe’au a le ‘upu moni. O le a fa’afofoga mai le Ali’i i a tatou tatalo mo le liliuina o agaga. O tagata o le Atua o le a fa’asusuluina lo latou malamalama, ma o le a va’aia a latou galuega lelei e le ‘au lē talitonu, ma o le a latou fa’amamaluina ai lo tatou Tamā fa’alelagi. *MYP 315.1*

(10) E FA’APEFEA ONA MAUA LE SA’OLOTOGA I LE FAIGĀUŌ TUMAU MA KERISO INA UA TU’UINA MA TAUSIA E ŌNA SO’O?

*Ona fetalai atu lea o Iesu iā Iutaia, ē ua talitonu iā te Ia. Afai tou te tumau pea i La’u matā’upu, o O’u so’o moni outou. **Ioane 8:31***

MAU E TAU I AI: Ioane 6:53-58; Fa’aaliga 1:3; 22:7; Luka 11:28

E lē o mava’aia le Amataga o lenei ola fa’aleagaga, fa’apea ma le faiga na aumai ma tausia ai lea ola, e lē mafai e le malosi ma le poto o le tagata ona fa’amatalaina. Peita’i o fa’agaoioiga a le Agaga e talafeagai pea ma afioga ua tusia; e pei o mea o le foafoāga, e fa’apea fo’i ma le lalolagi fa’aleagaga. O le ola e tausia i taimi ta’itasi e ala mai le mana fa’alelagi; peita’i e lē sapaia mai se vavega e sau sa’o, a e ala mai fa’amanuiāga o lo’o tatou maua ma fa’aaogāina. O lea o le ola fa’aleagaga e tumau e ala i le fa’aaogāina o mea o lo’o aumai e le Ali’i. Pe a tupu a’e le so’o o Keriso, “ina ia fai ma

tagata matua ia o’o i le fua o lē ua matua, e tatau ma le tumu o Keriso” (Efeso 4:13), e tatau ona ia ‘ai le areto o le ola ma inu i le vai o le fa’aolataga. E tatau iā te ia ona mataāla ma tatalo ma galue, ia usita’i i fa’atonuga uma a le Atua o lo’o tu’u mai i Lana Afioga. AA 284.2

O lo tatou olaga e tatau ona fusia fa’atasi ma le soifuāga o Keriso; e tatau ona fa’atosina pea tatou mai iā te Ia, ia fa’asoa o Ia, le Areto ola na afio mai le lagi, ia aumaia mai le puna o lo’o tu’u mai pea lava pea ōna ‘oloa e tele na’uā. Pe afai e tatou te fa’amuumua pea le Ali’i i o tatou luma, e fa’atagaina o tatou loto ia ō atu ma le vi’iga ma le fa’afetai iā te Ia, o le a maua pea se fa’afouina i o tatou olaga fa’aleagaga. O le a ‘avea a tatou talosaga o se talanoāga ma le Atua e pei ona tatou talanoa ma se uō. O le a Ia fa’ailoa mai Āna mea lilo iā i tatou ta’ito’atasi. O le a tele ni taimi e lagona ai e i tatou le fiasia o le fa’atasi mai o Iesu. E i ai taimi o le a lagona le mafanafana i o tatou loto a o Ia fa’alatalata mai e feso’ota’i ma i tatou fa’apei ona Ia faia iā Enoka. Pe afai o lenei tonu le lagona o le a iloa e le Kerisiano, o le a va’aia loa i lona olaga se uiga faigofie, o se loto maulalo, agamalū, ma le agaga e uiga maulalo, e fa’ailoa atu ai i tagata uma e latou te feso’ota’i sa fa’atasi o ia ma Iesu ma ua na iloa o Ia. COL 129.3 (AFTK 47.6)

(11) A TATOU I AI LOA I SE FAIGĀUŌ MA IESU, O LE Ā LE TA’IALA O LE A TATOU FA’AAOGĀINA I O TATOU VĀ FEĀLOA’I MA ISI?

Ia savavali i le alofa, fa’apei o Keriso fo’i na Ia alofa mai iā i tatou, ua na foa’i mai fo’i e Ia iā te Ia e sui a’i i tatou, o le taulaga ma le togioa i le Atua o le mea manogi lea. Efeso 5:2

MAU E TAU I AI: I Ioane 4:7, 8; Fa’ata’oto 17:17; 18:24; Iopu 6:14

O le alofa e fa’aosofia ai, e ala i le alofa o lo’o iā i tatou mo Iesu, o le a va’aia lea i so’o se agaga, le mau’oa pe o le mativa, o le tāua e lē mafai ona fuatia e se fua fa’aletagata. E matuā magoto i lalo le lē tāua pe a fa’atusatusa ma le tāua o le agaga e tasi. O le alofa o le Atua o lo’o fa’aali mo le tagata e sili mamao atu i lo o se fa’aaofa’i fa’alletagata; e lē mafa’agataina. O le sui fa’aletagata o lo’o fa’asoa i le uiga fa’ale-Atua o le a alofa pei ona alofa Keriso, o le a galue fa’apei ona galue Keriso. O le a i ai le alofa mutimutivale ma le tigāalofa o le a lē mavae ma lē fa’avaivaia. O le agaga lenei e tatau ona fa’amalosia ia olaola lelei i loto uma ma fa’aalia i olaga uma. O lenei alofa e na o le mafai ona i ai ma fa’amamāina, e pa’ia, ato’atoa, ma si’itia a’e ai e ala i le alofa i le agaga mo Iesu Keriso, e fafagaina e le feso’ota’iga ma le Atua i aso ta’itasi. O lenei ma’alili ua o’o i le itū o Kerisiano ona ua tete’e i le fa’atuatua. Peita’i o le a te’a’ese lenei agaga ina ua i luma o Lona so’o ‘ave malamalama o le alofa o Keriso. O le a ia usiusita’i ato’atoa i le fa’atonuga, “O le poloa’iga fou ‘Ou te tu’u atu ai ia te outou, ia outou fealofani; fa’apei ona ‘Ou alofa atu ia te outou, ia fealofani fo’i outou” (Ioane 13:34). WM 83.1

Ua ‘ou iloa o i latou o ē tete’e ia lē usita’i e faia le finagalo o le Atua ona o le fefe ne’i lē fiasia mai uō fa’alelalolagi, o latou e lē o ni uō a le Atua. ‘Ou te filifili e sa’ili le finagalo o le Atua e sili a’e i lo a’u uō o lenei lalolagi.

Li’o le Tali:

Ioe

Lē Mautonu

‘Ou te fa’afetai na ave Keriso ma taulaga mo a’u. Ua ‘ou iloa e leai so’u aogā ia ta’u ai a’u o Lana au’auna, peita’i ua Ia ta’ua a’u o Lana uō. Ona o lenei avanoa ofoofogia, ‘ou te ‘ave a’e ai le fa’afetai e lē mafai ona gata.

Li’o le Tali:

Ioe

Lē Mautonu

‘Ou te tatalo o le a Ia tu’uina iā te a’u se alofa e malosi atu ma le fiasia i lo’u loto mo Ia ona o le usiusita’i, ma e mafai ona ta’ua a’u o Lana uō.

Li’o le Tali:

Ioe

Lē Mautonu

Ua ‘ou iloa ona o a’u o Lana uō o lo’o vala’auina a’u e alu e galue ia maua mai ni agaga. ‘Ou te iloa o le taimi o le avanoa lea ma ua tu’u mai e ‘avea ma au’auna a le Atua.

Li'o le Tali:

Ioe

Lē Mautonu

‘Ou te fa’afetai mo lenei avanoa ofoofogia ma ‘ou te tepa taula’i i gaoioiga e loloto atu ma le poto e sili atu o mea fa’alelagi o le a aumaia.

Li'o le Tali:

Ioe

lē Mautonu

‘Ou te naunau ia savali i tulagavae o Keriso, ma fa’ataga Ia e fa’aaogā a’u e fa’atumulia so’o s e tulaga o lo’o Ia vala’auina a’u i ai, e o’o ai i se asi o le a mafai ona ‘ou fa’alogoina nei ‘upu, “ le au’auna lelei e, ma le fa’amaoni,...inā ulufale mai ia i le fiafia o lou Ali’i”.

Li'o le Tali:

Ioe

Lē Mautonu

MANATU FA’AOPOPO

TATALO MANA’OMIA

TALI O TATALO

Filifilia ma Fa'au'uina

Lesona 13

O lenei lesona e fa'avaeina i luga o le Ioane 15:16.

(1) E UI INA E LĒ TATAU AI MO I TATOU, O Ā MEA OFOFOGIA NA FAIA E KERISO MO I TATOU?

Ua lē filifilia A'u e outou, a ua filifilia outou e A'u; ua 'Ou tu'uina atu fo'i outou, ia outou ō, ma ia outou fua mai ni fua, ma ia tumau o outou fua; ina ia foa'iina atu iā te outou e le Tamā mea uma lava tou te ōle atu ai iā te Ia i Lo'u igoa.

Ioane 15:16

MAU E TAU I AI: Fa'aaliga 17:14; Isaia 41:8, 9; Teuterenome 7:6; Salamo 33:12; Iakopo 21:5; I Peteru 2:9

O le fuafuāga na sa'ili le Atua e fa'ataunu'uina, e ala i Ōna tagata i le asō, o lea fo'i na naunau o Ia e fa'ataunu'u e ala iā Isara'elu ina ua Ia 'ave 'ese mai latou mai Aikupito. Pe a va'aia le alofa tunoa, le agalelei, le agatonu, ma le alofa o le Atua o lo'o fa'aalia i le ekalesia, e tatau ona i ai i le lalolagi se sui e fa'ailoa ai Lona uiga. Pe a tu'u mai i le olaga le fa'ata'ita'iga fa'apea o le tulafono a le Atua, o le a iloa fo'i e le lalolagi le maoa'e o i latou o ē e alolofa ma matata'u ma au'auna i le Atua, i luga a'e o isi uma tagata o i le lalolagi. E silasila ifo le Ali'i i Ōna tagata ta'ito'atasi; e i ai Āna fuafuāga e fa'atatau mo i latou uma. E fuafua Ia o le a lauiloa fa'apitoa ē tausi Āna tulafono pa'ia. Mo tagata o le Atua i le asō a e fa'apea ma Isara'elu o anamua, o nai 'upu ia sa tusia e Mose e ala mai le Agaga, "Auā o oe o le nu'u pa'ia mo Ieova lou Atua, na filifilia oe e Ieova lou Atua ina ia 'avea ma nu'u Mona, o le 'olua tāua e sili i nu'u uma lava o i le fogā'ele'ele" (Teuterenome 7:6). 6 T 12.1

Ina ia fa'aalitinoina le uiga o le Atua, ina ia tatou lē taufa'asesē tatou lava ia, o le ekalesia, ma le lalolagi e ala i Kerisiano e fa'afoliga, e tatau iā i tatou ona fa'amasani lava le tagata ia ma le Atua. Pe a tatou mafuta ma le Atua, o tatou o Āna 'aufaigaluega, tusa pe tatou te lē lauga atu i se fa'alapotopotoga. E galulue fa'atasi tatou ma le Atua e fa'ailoa atu Lona uiga e ato'atoa ma e lē ponā i le aigā tagata. 6 T 13.3

(2) O AI O LE A LĒ VALA'AUINA E LE ATUA E FAI MA FAUTUA SILI MO LANA MATĀ'UPU?

Auā ua outou iloa lo outou vala'auina, le 'au uso e; e lē to'atele o ē popoto i la le tino, e lē to'atele faipule, e lē to'atele ali'i. **I Korinito 1:26**

MAU E TAU I AI: I Korinito 1:27; 3:18-20; Mataio 11:25; Iakopo 3:13-18

E i ai le 'aufaigaluega Kerisiano e le'i o'o latou i ni a'oa'oga maualuluga ona o le faigatā o tulaga e mafai ai ona maua lea fa'amanuiāga, peita'i ua tu'u i ai e le Atua fa'amaoniga na Ia filifilia ma fa'au'uina i latou ia ō atu ma galulue i Lana tovine. Na Ia faia i latou ia galulue lelei fa'atasi ma Ia. E iā i latou le agaga e mafai ona a'oa'oina; e latou te lagona lo latou fa'alagolago i le Atua; ma e fa'atasi pea le Agaga Pa'ia ma i latou e fesoasoani i o latou vaivaiga. E fa'amalosia ai le mafaufau, e ta'ita'iina manatunatuga, ma e fesoasoani i le folafolaina atu o le 'upu moni. CT 509

Ua tatou va'ai nei atonu ua maua le tapula'a e pito maualuga o a'oa'oga fa'alalolagi, peita'i o ē o lo'o i lenei tulaga fa'apitoa atonu e latou te lē amana'ia ulua'i ta'iala e 'avea ai latou o tagata o le malō o le Atua. E lē mafai ona 'ausia lenā malō mai a'oa'oga fa'aletagata. E lē maua tagata mo le malō o Keriso e ala i gaoioiga ma sauniga, pe ala i le su'esu'eina o ni tusi. "O le ola e fa'avavau fo'i lenei, ia latou iloa 'Oe le Atua moni e to'atasi, atoa ma Lē ua e 'auina mai, o Iesu Keriso lea" (Ioane 17:3). O tagata o le malō o Keriso o vaega latou o Lona tino, auā o Ia lava o le Ūlu. O i latou o fanau filifilia a le Atua, "A o outou o le tupulaga ua filifilia outou, o tupu ma ositaulaga, o le nu'u pa'ia, ma le nu'u na fa'atauina mai" (I

Peteru 2:9), e tatau iā i latou ona fai vi'iga iā te Ia Lē na vala'auina i latou i fafo mai le pogisā i totonu o Lana malamalama matagofie. *FE 413.1*

(3) E PEI O LE PEROFETA O ISAIA, O LE Ā LA TATOU TALI TATAU PE A FA'ALOGAINA LANA VALA'AU?

Ona 'ou fa'alogo atu ai lea i le si'ufofoga o le Ali'i, ua fa'apea mai, O ai ea 'Ou te 'auina atu? o ai fo'i e alu atu mo i matou? Ona 'ou fa'apea atu ai lea, O a'u lenei, inā 'auina atu a'u. Isaia 6:8

MAU E TAU I AI: Ioane 9:4; Efeso 2:10; Mataio 28:18-20

O lo'o silasila ifo le 'au usufono a le lagi iā te 'oe lē ua fa'ailoa mai ua e talia Keriso e avea ma ōu Fa'aola, ia iloa 'oe o lo'o e ta'u atu le fa'aolataga a le Atua i ē o lo'o nonofo i le pogisā. O lo'o silasila ifo pe o e fa'ailoa atu le tāua o le fa'asoa atu o le Agaga Pa'ia; e ala i le galuega a lenei sui fa'alelagi, atonu o le a fa'aliliu 'ese mafaufau o tagata ua fa'aleagaina e le agasala mai taufa'asesē ma pepelo a Satani, a e liliu atu iā Keriso lo latou fa'amoemoe, lo latou Fa'aola. *TDWG 51.3*

Ua fetalai Keriso, "Ua filifilia outou e A'u; ua 'Ou tu'uina atu fo'i outou, ia outou ō, ma ia outou fua mai ni fua, ma ia tumau o outou fua" (Ioane 15:16). Ona o tatou o sui o Keriso, ia tatou faitau i nei 'upu ma usita'i i ai a o ta'ua le taimi nei o le asō. "O le aso nei afai tou te fa'alogo ai i Lona si'ufofoga, 'aua tou te fa'ama'a'a i o outou loto" (Eperu 3:15; 4:7). Ia lē fa'atali mo se minute, a e fesili, O ai a'u iā Keriso? ma o ai Keriso iā te a'u? O le ā la'u galuega? O le ā le uiga o le fua ou te fuaina? *Review and Herald, Feb. 12, 1895 (TDWG 51.4)*

(4) O EL Ā LA TATOU GALUEGA MUAMUA MA E AUPITO MAUALUGA NA MUA'I VALA'AUINA AI TATOU A O TATOU SAUNI MO LE AFIO UA LATA MAI O KERISO?

O lenei fo'i, le fanau e, ia outou tumau iā te Ia, ina ia maua ai e i tatou le fa'amalosi pe a fa'aali mai o Ia, ia lē fa'amāina fo'i i tatou i Ōna luma i Lona afio mai. I Ioane 2:28

MAU E TAU I AI: I Ioane 2:27; II Ioane 1:9; Ioane 15:4, 5

O le tatou ulua'i tiute ma e aupito mauualuga o le iloa o lo'o tatou mafuta iā Keriso. E tatau ona faia e Ia lea galuega. E tatau iā i tatou ona sa'ili ia iloa pe "O le ā le fetalaiga mai le Ali'i," ma gaua'i atu o tatou olaga i Lana ta'ita'iga. Pe a iā i tatou le Agaga o lo'o mafuta mai o Keriso, o le a suia ai mea uma. E na o le Fa'aola e mafai ona tu'u iā i tatou le malōlōga ma le filemū o lo'o tatou mana'omia. Ma i so'o se vala'au o lo'o Ia tu'u mai e sa'ili ai le Ali'i atonu o le a maua ai Ia ma tatou, o lo'o Ia vala'au pea tatou ina ia tumau iā te Ia. O lea le vala'au, ia lē na ona sau iā te Ia, a e ia tumau i totonu iā te Ia. O le Agaga lea o le Atua o lo'o fa'agaioiina i tatou ia ō mai. Pe a iā i tatou lenei malōlōga ma le filemū, o le a lē 'avea ai mea e tatou te popole ai i aso ta'itasi ia so'ona fai ai isi ma le lē fa'aaloalo. O le a tatou lē toe faia o tatou lava loto pe mulimuli i o tatou lava ala. O le a tatou fia fai le finagalo o le Atua, ma mafuta iā Keriso fa'apei o le lālā i le vine. *TDWG 140.3*

(5) O LE Ā LE MEA UA VALA'AU MAI KERISO IA TATOU FAIA MA, E ALA I LONA AGAGA, O LE Ā LE FUA E TATAU ONA TATOU FUAINA MAI?

Sa outou pouliuli anamua, a o lenei ua outou malamalama i le Ali'i; inā savavali ia pei o ē ua malamalama; auā o le fua o le Agaga, o le agalelei uma lava lea, ma le amiotonu, ma le fa'amaoni. Efeso 5:8, 9

MAU E TAU I AI: Efeso 1:4; I Peteru 2:9; Kalatia 5:22, 23; II Tesalonia 2:13; Fa'aaliga 17:14

O lo'o i ai le galuega mo 'oe e faia i totonu o le ekalesia ma i fafo atu fo'i. "E v'iia Lo'u Tamā i lenei mea, pe a outou fua tele mai" (Ioane 15:8). O le fua tatou te fuaina e tofotofoina ai le uiga o le la'au i luma o le lalolagi. O le fa'amaoniga lenei o tatou o so'o moni. Pe a fa'aali mai uiga o a tatou galuega e pei lea o lālā o le Vine ola e tatou te fuaina fua e tautele

ma e tāua, o le a tatou tula'i atu i luma o le lalolagi ma le tagāvai a le Atua lava ia e fa'ailoa atu ai o tatou o Āna fanau. O tatou o molimau ola, e lauiloa i tagata uma. 5 T 348.2

O le uiga moni o le Kerisiano e fa'aalia mai lea i lona olaga o aso faiso'o. Ua fetalai mai Keriso, "E fa'apea fo'i la'au lelei ta'itasi ma fua mai i fua lelei; a o le la'au leaga e fua mai i fua leaga" (Mataio 7:17). Ua fa'atusaina e lo tatou Fa'aola Ia lava i se vine, a o Ōna so'o o lālā ia. Ua Ia fa'ailoa manino mai o i latou uma e fia 'avea ma Ōna so'o e tatau ona fua mai; ma na Ia fa'aalia mai pe fa'apefea ona 'avea ma lālā e fua tele mai. "Inā tumau ia o outou iā te A'u, o A'u fo'i iā te outou. Fa'apei o le lā e lē mafai ona fua pe a na o ia, pe afai e lē mau i le vine; a fa'apea fo'i outou, pe afai tou te lē tumau iā te A'u" (Ioane 15:4). SL 80.1 (OFP 30.1)

Ua fa'amatala mai e le aposetolo o Paulo le fua e tatau ona fua mai ai le Kerisiano. Ua fai mai o ia e i "le agalelei uma lava lea, ma le amiotonu, ma le fa'amaoni" (Efeso 5:9). Ua toe fa'apea mai fo'i, "A o le fua o le Agaga o le alofa, o le 'oli'oli, o le filemū, o le onosa'i, o le mataalofa, o le agalelei, o le fa'amaoni, o le agamalū, ma le lē gaoiā" (Kalatia 5:22, 23). O nei uiga tāua o ni ta'iala o le tulafono a le Atua e tatau ona tau'aveina i le olaga atoa. SL 80.2 (OFP 30.2)

(6) O LE Ā LE FE'AU MA LE AVANOA O LO'O TU'UINA MAI E KERISO I ŌNA SUI O LO'O FUA MAI?

Ia outou ō atu e fai nu'u uma lava ma so'o, ma papatiso atu iā te i latou i le suafa o le Tamā, ma le Atali'i, ma le Agaga Pa'ia. Mataio 28:19

MAU E TAU I AI: Isaia 49:6; Mareko 16:15; Luka 24:46, 47; Galuega 1:8; 26:16; Mataio 5:14-16

O le vala'auina e Keriso o Ōna sui filifilia mo tagata, e le'i filifilia agelu e le'i pa'ū'ū, peita'i o tagata e i ai o latou lagona e pei lava o tagata o lo'o latou sa'ili e fa'aola. DA 296.4 (FNT 221.4)

O Ia lea na vala'auina tagata fai faiva o Kalilaia, o lo'o vala'auina pea tagata mo Lana galuega. Ma o lo'o naunau e fa'aalitino Lona mana e ala atu iā i tatou e pei ona Ia fa'ailoa atu e ala i Ōna so'o maumua. E tusa po o le ā lo tatou lē 'ato'atoa ma le agasala, ua ofo mai lava e le Ali'i ia tatou galulue fa'atasi ma Ia, ma a'oa'oina ai i tatou e Keriso ia iloa fai Lana galuega. Ua Ia vala'auina i tatou ia ō mai i lalo ifo o le a'oa'oga mai le Atua, ina ia tatou fa'atasi ai ma Keriso, ma tatou galulue ai i le galuega a le Atua. DA 297.1 (FNT 222.1)

O le tagata faigaluega moni mo le Atua e fetauivia'i i le tatalo ma le Atua, ma e matuā galue ma le fa'amaoni i lana galuega o le fa'asaoina o agaga ua lēiloa. Na te lē sa'ili e si'itia lava ia e ala i 'upu ma galuega, peita'i e na ona sa'ili ia maua mai agaga. E fa'ailoa mai e le Atua le Kerisiano e sili ona pei o le tamaitiiti, e pito mamā, e pito loto maulalo, o lē e galue sili mo Ia, e sili le malosi i le galuega mo agaga. E mafai e 'au fa'alelagi ona galulue ma tagata o le a fa'amamaluina i latou lava ia, peita'i o ē o le a tu'u mamalu uma i le fa'aaloaloga o le Atua. O le tagata e lagona e na te mana'omia le poto fa'ale-Atua, o le tagata e talosagaina le mana fa'alelagi, o ia lea o le a alu atu mai le feso'ota'iga ma Keriso, ma avatu le tala lelei i agaga o le a fano i a latou agasala. Ua tu'uina mai e le Atua lesona e aogā fa'atautau i le galuega a so'o uma. E lē tatau ona i ai se isi i le pogisā; ua fa'amaonia o Kerisiano uma o molimau ola, ia iloa ma faitau ma su'esu'e e tagata uma. LHU 358.3

(7) O LE Ā LE MEA O LE A TATOU FA'AALIA ATU I LE LALOLAGI PE A O TATOU MAFUTA IĀ KERISO?

O outou, o le malamalama o le lalolagi outou. E lē mafai ona lilo le a'ai ua tū i luga o le mauga.... Ia fa'apea ona pupula atu lo outou malamalama i luma o tagata, ina ia latou iloa la outou amio lelei, latou te vivi'i atu ai i lo outou Tamā o i le lagi. Mataio 5:14, 16

MAU E TAU I AI: Fa'ata'oto 4:18; Isaia 58:8; 60:1-3; I Tesalonia 5:4-9

E tatau ona fa'asusuluina le malamalama o le 'upu moni, ona a va'aia e tagata le ala o le amiotonu a i latou e iloa le 'upu moni, o le a iloa ai e i ai le mana i le 'upu moni ona ua fa'ataunu'u galuega e tele mo i latou ua taliaina. O le a pele iā i latou ta'iala o le fa'apa'iaina o lo'o susulu atu i olaga o sui o le 'upu moni, ma o le a latou talia le 'upu moni ma fa'amamaluina ai le Atua e ala i le fa'apa'iaina o latou iā te Ia, ia 'avea ma malamalama i le lalolagi. *HP 315.3*

E fa'apei o Aperā'amo ma isi tagata pa'ia o asoanamua ona 'avea ma malamalama i a latou augātupulaga, ia fa'apea le tatau ona fai ma malamalama i le lalolagi tagata o le Atua. Ia susulu atu mai iā i latou 'ave matagofie o le lagi, e fa'aali atu ai na o le ala e tonu ma lelei, ma fa'ailoa ai pea le maoa'e o le tulafono a le Atua i lo o mea e faia e tagata. Ia lē fa'alilo i se mea pogisā 'upu moni o le Tusi Pa'ia. So'o se 'ave malamalama e fa'asusuluina i luga o a tatou ala e i le fuafuāga a le Atua e aumai ai se malosi fou, ma fa'aopoopo ai se mana e mafai ai ona tosina mai le lalolagi i le Atua. *HP 315.4*

Ua fetalai Keriso, "O outou, o le malamalama o le lalolagi outou" (Mataio 5:14). O Keriso o le Pogai o le malamalama ma le mana mo Lana ekalesia. Pe a mamā ma tonu le loto, pe a o mafuta ai le amioatua, o le a fa'aalia mai i le olaga. O le a fa'atumulia ai talanoāga ma fa'afeagaiga uma a le tagata i ōna uso ā tagata. O le a 'avea o ia ma lē e faia afioga a Keriso....O āna gaoioiga uma o le a susulu mai ma se mamalu pa'ia. O le a iā te ia le malosi ona o lo'o fa'atasi ai le Atua ma ia. *HP 315.5*

(8) A O TATOU - LANA 'AU FILIFILIA - Ō ATU IA FUA MAI I LE FA'ATUATUA, O LE Ā LE FOLAFOLAGA E LĒ GATA E MAFAI ONA TATOU TAPA I AI PE A TATOU ŌLE ATU I LE SUAFA O KERISO?

Ua lē filifilia A'u e outou, a ua filifilia outou e A'u; ua 'Ou tu'uina atu fo'i outou, ia outou ō, ma ia outou fua mai ni fua, ma ia tumau o outou fua; ina ia foa'iina atu ia te outou e le Tamā mea uma lava tou te ōle atu ai iā te Ia i Lo'u igoa.
Ioane 15:16

MAU E TAU I AI: Ioane 14:13; 16:23, 24; Isaia 41:9, 10

E ala iā Keriso, o le a mafai ona tatou avatu a tatou talosaga i luma o le nofoāli'i o le alofa tunoa. E ala mai iā te Ia, e mafai e tatou ona maua manuia fa'aleagaga uma, e ui ina e leai so tatou aogā. *AG 85.2*

O'u uso e, ia outou ōle atu mo le Agaga Pa'ia, e tula'i le Atua e lagolagoina folafolaga uma na Ia faia. Ia e u'umau i lau Tusi Pa'ia, ma fa'apea mai, "Ua 'ou faia le mea na e fetalai mai ai, ua 'ou ta'u atu Āu folafolaga," "Ia outou ōle atu, ona foa'iina mai ai lea iā te outou; ia outou sa'ili, ona outou maua ai lea; ia outou tu'itu'i atu, ona tōina ai lea iā te outou" (Mataio 7:7). Ua fetalai Keriso, "O mea uma lava tou te ole mai ai i a outou tatalo, ina fa'atuatua ia o le a maua e outou, ona faia lava lea mo outou" (Mareko 11:24). Ma "O mea uma fo'i tou te ole atu ai i Lo'u igoa, 'Ou te faia lava; ina ia vi'ia le Tamā ona o le Atali'i" (Ioane 14:13). *8 T 23.1*

Ia fa'ailoa ōu mana'oga i Lē na faia 'oe. E lē te'ena se tasi e sau iā te Ia ma le loto salamō. E leai se tatalo fa'atauānu e lē iloa. A o faia vi'iga a le 'aufaipese fa'alelagi, a e o lo'o fa'afofoga ifo le Atua i le tagi mai a se tagata e pito vaivai lava. Tatou te tu'u atu fa'anaunaga o tatou loto mai o tatou afeafe, e tatou te faia sina tatalo pu'upu'u a o tatou savavali i le ala, ma e o'o atu lava a tatou 'upu i luma o le nofoāli'i a le Tupu o le atulaulau. Atonu e lē lagona e taliga o tagata, peita'i e lē mafai ona mavae 'ese atu, pe o le a mafai ona lē iloa ona o fa'agaoioiga o galuega o lo'o faia. E leai se mea e mafai ona fa'aliloina naunauta'iga o le agaga. E si'itia a'e i luga o le pisaō a le alatele, i luga a'e o le gaogaosā o le motu o tagata, a e alu a'e i maota o i le lagi. O lo'o tatou talanoa ma le Atua, ma o lo'o fa'afofoga mai Ia i la tatou tatalo. *AG 85.3*

(9) PE A UA UMA ONA TALIA LE VALA'AU FA'APITOA INA IA 'AVEA AI MA Ē UA FILIFILIA E KERISO, O LE A MAFAI FA'APEFEA ONA TATOU FUAINA MAI PEA NI FUA?

Sa'ili ia outou iā Ieova ma Lona malosi; sa'ili'i iā te Ia, 'aia le aunoa. I Nofō'iga Tupu 16:11

MAU E TAU I AI: Ioane 15:4, 7, 9; 6:56-58; I Ioane 4:15; 2:10; II Ioane 9

E lē na o se tago e so'ona fai e mana'omia e Keriso, peita'i o le mafuta lea ma Ia. Na Ia vala'auina 'oe ia mafuta ma Ia. E Na te lē fa'amoemoe mo se manuia e maua mo sina taimi pu'upu'u pe a sa'ili ma le fa'amaoni i le Ali'i ona mavae'ese lea a o e feagai ai ma tiute o aso faiso'o o le olaga. O lou mafuta ma Keriso e fa'amāmāina ai tiute uma e tataui, ona o Ia e tau'aveina le mamafa o avega uma. Ua Ia sauni mo 'oe ina ia mafuta ma Ia. O lona uiga ua e iloa le Keriso e tumau, o lo'o e fa'atasi pea ma Keriso, o lo'o fa'alototele ma fa'amalosia ai lou mafaufau. *HP 55.2*

Ia 'aue ne'i e tū i fafo atu o Keriso, fa'apei o le to'atele o i latou i nei ona pō o lo'o ta'u mai o Kerisiano. O se mea e mafai le, "tumau ia o outou iā te A'u, o A'u fo'i iā te outou" (Ioane 15:4), ma se manū e lē tu'u maia le vala'au pe ana lē mafai ona faia o lea mea. O lo'o fa'atosina mai pea 'oe e Iesu lo tatou Fa'aola e ala i Lona Agaga Pa'ia, o lo'o galue ma lou mafaufau ina ia e mafuta ma Keriso....O fa'amanuiāga o lo'o Ia aumai e feso'ota'i uma ma āu lava fa'agaoioiga. O le a te'ena ea Keriso? Ua fetalai mai o Ia, "O ia fo'i e sau ia te A'u, 'Ou te lē tulia lava i fafo" (Ioane 6:37). Ua fetalai fo'i Ia i le tasi vasega, "E lē mafafai outou ina o mai ia te A'u, ia outou maua ai le ola" (Ioane 5:40).... *HP 55.3*

Ua e iloa, ma ua 'ou malamalama lelei i le vala'au alofa, "Ia outou o mai iā te A'u"? (Mataio 11:28). Ua fetalai o Ia, "Inā tumau ia o outou iā te A'u," (Ioane 15:4) a e lē o le tumau ma A'u. "Ia malamalama i La'u vala'au. O mai iā te A'u e nonofo ma A'u." O le a Ia tu'u mai fa'amanuiāga uma o lo'o feso'ota'i ma Ia iā i latou uma e o mai iā te Ia mo le ola. O lo'o iā te Ia se mea e sili atu i lo o se manuia pu'upu'u e lagona, pe a sa'ili ma le fa'amaoni i le Ali'i. O le mea lea e na o sina tulu e tasi, pe ana mafai ona maua se 'upu ma Keriso. O se manuia fa'apitoa Lona mafuta tumau ma i tatou i lo se avanoa pu'upu'u a o tatou feagai ma tiute o le olaga. *HP 55.4*

(10) PE A TATOU SAVAVALI MA LE ATUA E PEI ONA SAVALI AI ENOKA, O LE Ā SE TALA O LE A FAIA E 'AVEA MA MOLIMAU I O TATOU OLAGA?

O le fa'atuatua na 'ave'eseina ai Enoka ina ia lē o'o ia te ia le oti, na lē iloa fo'i o ia, auā na 'avea o ia e le Atua; auā a o le'i 'ave'eseina na ta'ua ai o ia o lē ua fiafia i ai le Atua. A leai fo'i se fa'atuatua e lē mafai ona fiafia mai o Ia. Eperu 11:5

MAU E TAU I AI: II Korinito 3:2, 3

"O le fa'atuatua na 'ave'eseina ai Enoka ina ia lē o'o ia te ia le oti,... na lē iloa fo'i o ia, auā na 'avea o ia e le Atua; auā a o le'i 'ave'eseina na ta'ua ai o ia o lē ua fiafia i ai le Atua" (Eperu 11:5).... O lo'o vala'auina i ai tatou e le Atua i lenei so'otaga. E fa'apei o Enoka, ia fa'apea ona fa'apa'iaina a latou amio, o ē o le a fa'asaoina mai le motu o tagata i le afio fa'alua mai o le Ali'i. *GW 54.1-2*

I le ogātonugalemū o lona olaga galue, na tumau pea le feso'ota'iga a Enoka ma le Atua. O le faigatā atu ma le fa'ateleina o lana galuega, o le faia fa'aso'oso'o lea ma le pito fa'atauānu atu lea o āna tatalo. Na ia te'ena pea le fa'atasi atu i fa'alapotopotoga i isi taimi. Pe a o fa'atasi ai i isi taimi ma tagata, na galue ia e a'oa'o ma fa'atonu i ai mo lo latou lelei, ona vavae'ese mai lea ia ālaāla to'atasi na o ia, ia 'ai ma inu i le malamalama fa'alelagi e na o le Atua e mafai ona aumaia. *GW 52.1*

O le alofa e lē gata o le Atua e ala mai iā Keriso, e lē mafa'amatalaina, ma na faia ma autū o talosaga a Enoka i le ao ma le pō. Na ia sa'ili ma le matuā naunautā'i i lona agaga e fa'aali atu le alofa i tagata o lo'o latou aumau fa'atasi. *GW 51.2*

O le savaliga a Enoka ma le Atua e lē mai se fa'aaliga pe o se miti, peita'i sa i tiute uma o lona olaga i aso ta'itasi. E le'i aveia o se tagata e mauto'atasi, vavae'ese mai le lalolagi; o ia na i ai i le lalolagi, i le galuega e na te faia mo le Atua. I le aiga ma feuia'iga ma tagata, o se tane ma se tamā, se uō, se tagatanu'u, o ia o le au'auna mautū a le Atua, e le'i taumāluē gofie. *GW 51.3*

“...O le so’otaga ma Keriso e matuā tāua iā i tatou. E tatau ona tatou tasi ma Ia fa’apei ona tasi Ia ma le Tamā, ma o le a fa’apele tatou e le Atua e avea o itū o le tino o Keriso, pei o lālā o le Vine ola. E tatau ona pipi’i atu tatou i le la’au, ma maua mai ai mea’ai mai le Vine....” *Ed 178*

Ia tumau ona e talitonu o ‘oe o le a ‘avea ma se tasi e fua mai le Vine ola. E olaola lelei le sulī a o maua mai le ola ma le malosi mai le mātua moni. Ia fa’aleleia loa avanoa uma e feso’ota’i latalata atu ai ma Keriso. E ala i lou talitonu iā te Ia, alofa iā te Ia, fa’ata’ita’i iā te Ia, ma fa’alagolago ato’atoa i Ōna luga, o le a ‘avea ai ‘oe o sē e tasi ma Ia; ma e ala iā te ‘oe, o le a fa’aali atu i le lalolagi Lona soifuāga ma Ōna uiga. *OHC 145.5*

E ala mai nei lesona, ua ‘ou iloa ai a mafuta iā Keriso o lo’u avanoa muamua ma e aupito maua luga lea. ‘Ou te iloa e tatau ona ‘ou faia lenei mea ina ia ‘ou fa’aalitino ai le uiga o le Atua i le lalolagi. ‘Ou te filifili e sa’ili Ia ma lo’u loto atoa ina ia ‘ou feso’ota’i ai pea iā te Ia.

Li’o le Tali:

Ioe

Lē Mautonu

Ua ‘ou malamalama a ‘ou talia Keriso e avea ma o’u Fa’aola, o le a vala’auina a’u ma fa’au’uina ia fuaina fua mo Lona malō. E lē mafai lenei mea pe a leai se so’otaga ola. ‘Ou te fa’anaunau ia fa’aaogā le taimi ma Ia i aso ta’itasi ina ia mafai ona avea a’u o se lālā e fua mai.

Li’o le Tali:

Ioe

Lē Mautonu

‘Ou te iloa o le fua ou te fua maia e tofotofoina ai la’u amio i luma o le lalolagi, ma tofotofo ai o a’u o le so’o moni. O la’u tatalo ia ‘ou fuaina ni fua e tāua ma tautele, e ala i le mana o le Agaga Pa’ia. ‘Ou te naunau ia ‘ou ofuina i luma o le lalolagi le pinefa’amau a le Atua mo Lana fanau. Ia avea a’u o se tusi apoapoa’i ola e lauiloa ma faitauina e tagata uma i le mamalu o le Atua.

Li’o le Tali:

Ioe

Lē Mautonu

Mai le asō ua ‘ou filifili e sa’ili e feso’ota’i pea iā Keriso - le Vine Ola - e ala i le tatalo, su’esu’eina o Lana Afioga, ma fa’asoaina atu lo’u fa’atuatua ma isi. ‘Ou te fia tasi ma Keriso fa’apei ona tasi Ia ma le Tamā, ma ona o a’u Sona lālā, o le a mafai ai ona ‘ou maua mea’ai mai le Vine.

Li’o le Tali:

Ioe

Lē Mautonu

MANATU FA’AOPOPO

TATALO MANA’OMIA

TALI O TATALO

FA'AMATALAGA O FA'APU'UPU'UGA

E Uiga i Fale Lomi Tusi

PPPA = Pacific Press Publishing Association (Mountain View, CA)

RHPA = Review and Herald Publishing Association (Washington, D.C.)

SPA = Southern Publishing Association (Nashville, TN)

AA = The Acts of the Apostles. 1911. PPPA (O Galuega a le 'Au Aposetolo)

AG = God's Amazing Grace. 1973. RHPA. (O le Alofa Tunoa Ofoofogia o le Atua)

ARSH = Advent Review and Sabbath Herald. RHPA.

BC = SDA Bible Commentary. 1953-1970. RHPA

COL = Christ's Object Lessons. 1900. RHPA (A'oa'oga Fa'afa'atusa a Keriso)

CS = Christian Services. 1925. RHPA. (O le Galuega Fa'a-Kerisiano)

DA = Desire of Ages. 1898. PPPA. (Fa'anaunauga o Tupulaga)

EW = Early Writings. 1882. RHPA. (O Ulua'i Tusiga)

Ev = Evangelism. 1946. RHPA. (O le Galuega Fa'atala'i)

FE = Fundamentals of Christian Education. 1923. SPA. (Ta'iala o A'oa'oga Fa'a-Kerisiano)

FLB = Tha Faith I Live By. 1958. RHPA. (O le Fa'atuatua o lo'o 'Ou Ola ai)

FW = Faith and Works. 1979. SPA (O le Fa'atuatua ma Galuega)

FEP = From Eternity Past. 1983. PPPA (Mai le Fa'avavau ua Mavae)

GC = Great Controversy. 1888; 1911. PPPA (O le Finauga Tele)

HP = In Heavenly Places. 1967. RHPA. (I Maota Fa'alelagi)

IC = The Impending Conflict. 1960. PPPA. (O le Fete'ena'iga o i Lumana'i)

LDE = Last Day Events. 1992. PPPA. (O Mea e Tutupu i Aso Fa'ai'u)

LHU = Lift Him Up. 1988, RHPA. (Si'itia A'e o Ia)

Mar. = Maranatha. 1976. RHPA. (Maranata)

MB = Thoughts from the Mount of Blessings. 1896. PPPA. (Manatu Mai le Mauga o Fa'amanuiāga)

#MCP = Mind, Character, Personality. 1977. SPA. (Mafaufau, Uiga, ma le Amio)

MLT = My Life Today. 1952. RHPA. (O Lo'u Ola i le Asō)

MS# = Manuscript (vol). Date. (O Tusiga)

OHC = Our High Calling. 1961. HPA. (O le Vala'au Maa'e mo i Tatou)

PK = Prophets and Kings. 1917. PPPA (O Perofeta ma Tupu)

PP = Patriarchs and Prophets. 1890. PPPA. (Pateriaka ma Perofeta)

RC = Reflecting Christ. 1985. RHPA. (Fa'aataina Keriso)

RH = The Review and Herald. Date. RHPA.

SC = Steps to Christ. 1892. PPPA. (O La'asaga iā Keriso)

SL = The Sanctified Life. 1956. RHPA. (O le Ola ua Fa'apa'iaina)

SP = Spirit of Prophecy. 1870-1884. RHPA. (O le Agaga o Valo'aga)

#SM = Selected Messages. RHPA. (Fe'au ua Filifilia)

ST = Signs of the Times. Date. (O Fa'ailoga o Taimi)

#T = (vol) Testimonies for the Church. PPPA. (Molimau mo le Ekalesia)

TDG = This Day with God. 1979. RHPA. (O le Asō ma le Atua)

TMK = That I May Know Him. 1964. RHPA. (Ina ia 'ou Iloa o Ia)

UL = The Upward Look. 1982. RHPA. (Tepa a'e i luga)

TMGW = Testimonies to Ministers and Gospel Workers. 1900. PPPA. (Molimau i Faife'au ma le 'Au Faigaluega o le Tala Lelei)